

BIBLIOTECA NAZ.  
Vittorio Emanuele III


XXIV

B

36

NAPOLI

36







RATIONALIS  
PHILOSOPHIÆ  
INSTITUTIONES.

S I V E,

*De emendandâ, regendâque Mente.*


A

JANO GUALBERTO DE SORIA,

*In celeberrimâ Pisanâ Academiâ  
Philosopho publico.*



AMSTELODAMI,  
*Apud PETRUM HUMBERT.*  
M. DCC. XLI,



# AUCTORIS MONITUM

E T

## OPERIS DELINEATIO.



Uum Rationalis hujus  
Philosophiæ Exemplaria  
plurima ex iis, quæ olim  
dictabam transcripta, at  
omnia ut semper accidit, huc illuc  
mutila, manca, & errata tum ci-  
tra, tum ultra Etruriæ fines per ma-  
nus vagantur, & à pluribus explicen-  
tur; quumque jam diu optaverint  
qui Philosophiam hanc à me exce-  
perunt, quique eam perlegerunt,  
ut ipsam publicis literis emendatam,  
castigatamque consignarem, aut  
consignandam curarem, id à ratio-  
ne alienum nullatenus mihi visum  
fuit, & pluribus pluries promisi.  
Jamque aliquot ab hinc annis Opus-  
culum hoc in publicam prodiisset  
lucem, si & domesticæ curæ, & mor-  
borum sese succedentium tristis se-  
ries, & publicum, quod sustineo, mu-  
nus,

14 *Auctoris Monitum*, &  
nus, & commoda occasio permi-  
sissent, qualis quidem est, quam  
mihi offert Vir illustrissimus, erudi-  
tissimus, amicissimus, cujus bene-  
volentiae, comitatuque plurimum de-  
beo, libentissimèque debere fateor.  
Nil autem uspiam obtinere à me po-  
tuisset, ut quidem assentirem tantum,  
nedum ut curarem Operis hujus edi-  
tionem, si illud inutile futurum fo-  
re arbitrarer.

Mirabitur fortasse quispiam opi-  
nari me Rationalem hanc Philoso-  
phiam opportunam utilemque futu-  
ram, postquam, repositis Disciplinis,  
summi Viri, & de Humano Genere  
optimè meriti de Ratione excolen-  
dâ, moderandâque scripserunt, &  
nil nisi actum agere pluribus vide-  
bor. At spero non ita sentient, non  
supervacaneum Opus hoc dicent, si  
animadvertant Rationalem Philoso-  
phiam numeris omnibus absolutam  
esse non posse, & scopum, ad quem  
tendit, attingere, nisi omnia hæc  
si.

si nul munera obeat , & complectatur : Nimirum primò , omnis obscuritatis , omnis Paralogismi , hypothesis omnis , & anticipationis , nulli Scholæ addicta , expers sit necesse est : Secundò , occasiones errorum universas ad certa , constitutaque genera redigat , retegatque oportet , ut prudens quisque ab ipsis sibi caveat : Tertiò , unde oriatur certitudo fallere nescia , ostendat : Quartò , Verisimilitudinis , & Improbabilitatis , earundemque graduum certas notas , characteres indubios , mensurasque tutissimas constituat , opus est : ( neque enim plerumque certò scire , veritatemque complecti dedit Natura Mortalibus ). Quintò , quæ nunquam assequi homines poterunt rerum genera ab iis , quæ intra humanæ scientiæ limites posita sunt , secernere diligenter debet : Sextò , quæstionesque omnes , inquirendasque notiones in determinatas classes distribuere , extra

\* 3

quas

VI *Auctoris Monitum , &*

quas vagari nulla quæstio , nullum problema possit , legesque ferre ad exoptati veri peruestigationem sapienter instituendam singulis quæstionum classibus accomodatas, cui-cumque tandem fonti quæsitum quodcumque verum pertineat; Ac denique septimò demonstret necesse est, quam ratione resecta quæque veritas in tantâ luce sit collocanda , ut nullus eam non agnoscere minime possit , si mentis suæ compos sit , & adhibitum calleat idioma. Quæ quidem omnia nativo, concinnoque ordine sese succedentia , connexaque sint oportet , ut quisque facilè integri Operis integram , luculentissimamque notionem sibi efformet , retineatque.

Præterea quælibet Thesis non conjecturis quidem , & verisimilitudine quâdam suadenda , sed certissimâ demonstratione evincenda, & quantum fieri possit, brevi, minimèque operosâ , non longè peti-

ti-

*Operis Delineatio.* VII

tità, non per tortuosum tramitem deductâ. Ne nimirum conjecturæ, & verisimilitudo aut illudant, aut tenebras relinquunt, & implexæ, arduæque Ratiocinationes laborem pariant nimium, labor tædium, tædium verò operis fructum perdat; illustranda tandem sunt præcepta exemplis, illorumque usus ostendendus, at exemplis aptis, non difficilibus, nec à peritioribus Disciplinarum doctrinis petitis: Rationalis quippe Philosophia non sapientibus, sed iis qui ad Sapientiam contendunt scribitur: quæ sanè universa intra arcus parvi Voluminis fines, quantum fieri possit, maximè sunt coerenda, illæscâ tamen profectò accuratissimâ perspicuitate, & facilitate.

Quæ cum ita sint, nescio sanè an omnibus videatur omnia hæc munera implevisse aliquis eorum, qui Rationalem Philosophiam scrip-

VIII *Auctoris Monitum, &*

ferunt. Attamen maximi momenti res est emendandæ, regendæque mentis scientia, ex quâ nimirum exactum, solidumque iudicium, sapiens analyticae ingenii vis regimen, cogitationum, sermonisque perspicuitas, disciplinæ universæ, tum quæ ad mores, & vitæ usum, tum quæ ad Naturæ interpretationem pertinent, potissimum pendent.

An autem Rationalis hæc Philosophia exposito superiùs Exemplari, magnâ saltem ex parte, conformis sit, nec ne, & pleraque ex enunciatis muneribus exequatur, aliorum sit iudicium, ipse quidem ut id præstaret operam dedi. Quæ in Philosophicis hisce Exercitationibus continentur plura aliis, plura naturæ rerum, & meditationi debeo. Quisque Auctor sua sibi vindicet, ab eis enim haud pauca didicisse me gratissimus fateor, quam-



quamvis ipsos singulis vicibus non nominem.

En autem Operis totius œconomia , & specimen. Bifariam dividitur. Pars prima, quæ ad emendandam Mentem, altera verò, quæ ad ipsam regendam in inquisitione veri pertinent, complectitur. Pars igitur prior universa perceptionum nostrarum genera in primis recenset, in classes distribuit, aptis illustrat exemplis, iis tantum adhibitis divisionibus, quæ in vitæ usu, & disciplinis alicujus esse possunt commodi. De Judiciis secundo loco agit, eorumque genuinam naturam exponit, utilissimas quasque ipsorum divisiones, quamvis non omnes usitatas, proponit, & explicat. Veritatis, & falsitatis criteria demonstrat, de Evidentiâ, & Certitudine metaphysicâ, physicâ, moralique differit, earum discrimina, & characteres constituit, illustratque exemplis, & expolita-

\* 5

rum

\* *Auctoris Monitum, &*

rum doctrinarum usum ostendit. Mox de Verisimilitudine, & Inverisimilitudine verba facit, luculentissimè de utrâque, & satis fusè, earum naturam explicat, & quomodo quocumque in casu dijudicanda, & mensuranda sit Verisimilitudo, aut Improbabilitas eventuum, & opinionum monstrat. Magni fanè momenti est Verisimilitudinis, & Inverisimilitudinis perspicuas, certissimasque habere notiones, veramque probabilitatem, & improbabilitatem certo dignoscere, & mensurare nosse; attamen passim qui Rationalem Philosophiam scribunt, doctrinam hanc cæteroquin opportunissimam, mirum quàm negligent, quàm perfunctoriè, quàm parum accuratè, quàm paucis ab hâc tractatione se expediant. Quam reprehensionem satis declinasse arbitror Rationalem hanc Philosophiam.

Hisce absolutis, de Ratiocina-  
tio-

tione agit , errorumque fœcundiores causas, vel occasiones, tum in judicando , tum in ratiocinando fusè profequitur , quas ad tria hæc potissimum genera redigit , Ideas nempe, Voces, & Animi pathemata. Ostendit diligenter quânam ratione , quibusque maximè in casibus Menti nostræ illudent, errandique occasione passim sint in judicando de rebus tum Ideæ per sensus acquisitæ , quales in animo ab extrinsecis causis excitantur , tum Ideæ , quæ ab humanâ mente, sive abstrahendo, sive componendo efformantur : Ostendit deinde quàm sæpè , & quomodo vocabula , & locutiones in causa sint , ut à verâ mente, genuinisque ideis Auctorum, & loquentium aberremus : Vitia Vocabulorum recenset , & cautiones proponit. Denique monstrat adfectuum illusiones, quâque ratione in suadendo , & dissuadendo valeant plurimum , & passim homi-

mi-

XII *Auctoris Monitum*, &  
mines in errores impellant. Omnia  
aptis exemplis à communi vitæ usu,  
& disciplinis semper petitis illustran-  
tur. Quæcumque huc usque indi-  
gitata cursim sunt Pars prior com-  
plectitur, quæ in mentis emenda-  
tionem incumbit.

Ad Partem alteram Rationalis  
hæc Philosophia accedens, in quâ  
quæ rationem docent enodandi  
Quæstiones, sive inquirendi, ac-  
quirendique veri continentur, in  
primis humanæ scientiæ limites  
constituit, ea nimirum, quæ ultra  
humanæ Scientiæ sphaeram consti-  
tuta, & posita sunt, quæque ho-  
mines nunquam assequuntur ab iis  
rerum generibus, quæ nosci à no-  
bis possunt, secernit, ne quis in-  
cassum venetur quæ semper huma-  
num latebant Genus. Hisce limiti-  
bus constitutis, quæstiones omnes,  
universa problemata in tria summa  
genera distribuenda esse ostendit,  
extra quæ nulla quæstio vagari po-  
test.

rest. Mox veritatis indicat fontes, quos tres tantum esse demonstrat, Rationem nempe, Experientiam, & alienum Testimonium. Ideo autem Quæstiones in sua capita redigit, ideo de veritatis fontibus differit, quia non eadem regulæ adhibendæ sunt ad cujusvis quæstionis solutionem inveniendam, cujuscumque generis quæstio sit, & ad quemcumque fontem optatum verum pertineat. Hinc perspicuissimâ Methodo Leges illæ primo loco traduntur, quæ in quâcumque quæstione solvendâ servandæ sunt, deinde Leges conduntur, quæ ad enodandas quæstiones illas manu ducunt, quarum solutio à ratione pendet. Dein Leges illæ constituuntur, juxta quas inquirendæ sunt questionum illarum solutiones, quæ dirimi non possunt, nisi ex alieno Testimonio.

Ostendit igitur nostra hæc Philosophia quomodo dijudicanda sint  
cer-

XIV *Auctoris Monitum, &*

certa, & genuina Auctorum monumenta à spuriiis, & interpolatis; quomodo veras, genuinasque cæterorum hominum, & potissimum Scriptorum Ideas, legitimosque sensus venari, retegere, & constituere debeamus, ubi id fieri possit, ne Ideas, opinionesque nostras aut à Scriptoribus alienas, mutuas ipsis demus, ut sæpè sæpius contingit; ac denique quænam regulæ adhibendæ sint, & cautelæ in adjungendâ, denegandâve narrantibus, & testibus fide proponit, quibusque in casibus cohibendum Judicium sit. Quæ quidem omnia passim opportunis exemplis demonstrantur.

Plura, quæ huc faciunt, à præstantissimâ Criticâ Arte petita sunt, quibus celeberrimus Auctor facem prætulit. Qui mentis Philosophiam docuere, qui regendæ Rationi consulere deberent, toti sunt in emendandâ mente, in adnotandis erroribus, toti in docendo quomodo inventum  
jam

jam verum demonstrandum cæteris sit ad evincendum assensum; at vix, aut ne vix quidem differunt quomodo verum inveniatur, quomodo sint quæstionum enodationes cujusvis generis sapienter instituendæ. Methodum nimirum Analyticam, Methodum Inventionis prætereunt, aut nimis paucis ab eâ sese expediunt, scilicet à præcipuo, præstantissimoque Rationalis Philosophiæ munere, quasi docere quomodo pervestigandum quodcumque verum sit, ut agnoscat, apex & scopus non esset Philosophiæ Mentis, aut analytica methodus maximum non foret, eximium, utilissimum universæ sapientiæ organum, & instrumentum.

Quidam profectò Methodum illam attingunt, at Leges, quas tradunt, aut nimis generales sunt, & incompletæ, & inefficaces, aut vix extra Mathematicæ limites usum ullum habent. Absolutâ Analyticâ Methodo, ad Syntheticam Philosophia  
hæc

hæc gradum facit. Quatuor luculentissimas, & perbreves Leges condit, quibus si conformis fiat data quælibet Ratiocinatio, invictæ Evidentiæ omnino sit oportet, sique ad Leges illas data quælibet Ratiocinatio expendatur, an manca illa sit, ubi manca, & cur manca sit, non possumus certissimè non intueri.

Claudit Opus brevis de Arte Syllogistica Diacrisis, quam Artem plures tanquam divinum scientiarum instrumentum jactitant, magnique faciunt, quasi opportunissimam Methodum, per quam hominum mentes rectæ Ratiocinationi formentur.

Cæterum perspicuitati summæ, cum optandâ brevitate conjunctæ, & nitidissimo rerum ordini diligenter consului.





# RATIONALIS PHILOSOPHIÆ INSTITUTIONES.



## C A P U T I.

### *De Ideis.*



**U**T æquivocatio omnis è medio tollatur, constituimus primò hos Ideæ nomine perceptionem quamcumque cujusvis rei appellare. Igitur omnis notio, vel comprehensio, vel perceptio quæcumque sit, Idea à nobis dicitur. Hinc, *ex. gr.* notio, perceptiove figuræ, plantæ, animalis, coloris, voluptatis, &c. Idea est.

## §. I.

Ideæ autem omnes ad tres summas Classes, summaque Capita rediguntur. Primæ Classis, sunt Ideæ substantiarum; secundæ Classis, Ideæ modorum, seu modificationum, tertiæ tandem Classis, Ideæ relationum.

Substantia dicitur quidquid existit, aut existere potest, quin alteri rei inhæreat necessariò.

Modus autem rei vel modificatio, est quidquid existere non potest, quin alteri rei insit, seu quin sit alterius rei affectio, & attributum; ita motus *ex. gr.* & cogitatio, modi sunt, seu modificationes; necessariò enim tam motus, quam cogitationes alicui rei insunt, nec esse ullo modo possunt, quin alicujus rei affectiones, & attributa sint.

Hisce positis, perceptio quævis cuiuscumque rei, quæ subsistere possit per sese, quin alteri rei inhæreat, ut perceptio *ex. gr.* Socratis, Bucephali, Quercûs, Floris, &c. Idea substantiæ vocatur, & è converso perceptio quævis cuiuscumque rei, quæ subsistere per sese non potest, sed necessariò alteri rei inhæ-

ret,

ret, & alterius rei est attributum, Idea modi seu modificationis appellabitur.

Denique inter res quascumque invicem comparatas, relationes plurimæ interfunt; nimirum inter res quascumque, aliquid rationis mutux, aliquid convenientiæ, & connexionis genus, vel discrepantiæ, vel disconvenientiæ interest; ita *ex. gr.* vel mutuò res coexistunt, vel secus, vel similes sunt, vel dissimiles, vel aliæ aliis, vel majores, vel minores, vel æquales, vel aliæ ab aliis oriuntur, & aliquo modo pendent, vel alias gignunt, & efficiunt. Quævis autem perceptio cujusvis hujusmodi, vel cujuscumque alterius generis relationis, Idea relativa appellatur. Divisio hæc Idearum in Ideas Substantiarum, Modorum, & Relationum adæquata est, & numeris omnibus absolutissima; etenim planè ἀδύνατον, sive ut aiunt, impossibile est perceptionem aliquam habere, quæ nec sit perceptio Substantiæ, nec perceptio Modi, seu modificationis, nec perceptio alicujus Relationis, inter objecta mentis intercedentis, quemadmodum plane impossibile est, ut aliquid existat, aut existere possit, quod nec sit aliquid, quod alicui rei non insit necessariò, nempe substantia, nec ali-

#### 4 RATIONALIS PHILOSOPHIÆ

quid, quod rei alicui necessariò inhæreat, nempe modus, vel modificatio, nec tandem sit aliqua relatio inter duas, pluresve res intercedens.

##### §. II.

Secunda Idearum divisio est in Ideas simplices, & compositas.

Compositæ Ideæ sunt, quæ pluribus constituentibus Ideis constant: ita *ex. gr.* Idea trianguli composita est; constat enim ex Ideis trium linearum, trium angulorum, & spatii alicujus intra lineas hasce, & angulos circumclusi: rursus Idea misericordiæ, quæ est ægritudo animi ex alienis malis orta, Idea composita est; constat enim ex Ideis alicujus miseriæ, hominis miseriâ illâ affecti, & ejus, qui pietate commotus illius casum dolet.

Eadem ratione Ideæ Urbis, Domûs, Templi, Arboris, Animalis, Picturæ, &c. compositæ sunt Ideæ, omnes enim quotquot sunt, aliis pluribus componuntur; & generatim Ideæ omnes figurarum, Ideæ qualiumcumque corporum, Ideæ quorumvis artefactorum, Ideæ virtutum, & vitiorum, Ideæ omnes collec-

lectivæ, ut Exercitûs, Gregis, Acervi, &c. Ideæ cujuslibet rerum seriei, ut Symphonix, Pugnæ, Orationis, Anni, Diei, &c. hujusmodi, inquam, Idearum genera universa, composita sunt, cum memoratæ omnes Ideæ, ut patet, ex pluribus constituentibus Ideis unâ collectis, componantur.

Contrà verò Ideæ simplices eæ sunt, quæ nullis aliis constituentibus Ideis constant, ita ut eadem sit Idea simplex, ac Idea incomposita. Ita *ex. gr.* Idea doloris, quem experimur, dum acu pungimur, Idea simplex est; neque enim perceptio illius doloris ex pluribus Ideis constituentibus coalescit, imo profectò nullis constat perceptionibus, quæ simul junctæ eam constituent. Eâdem ratione, Ideæ illæ, quas exprimere hisce vocibus solemus, Velle, Nolle, Eligere, Optare, &c. simplicissimæ Ideæ sunt, neque enim hujusmodi actus mentis, & animi, partibus ullis constant, quibus constituentur.

Eâdem de causâ Ideæ odoris Lili, Rosæ, &c. coloris purpurei, flavi, cœrulei, &c. sonitûs cujusvis singularis, singularis cujusvis saporis, simplices sunt,

## 6 RATIONALIS PHILOSOPHIÆ

cum in his perceptionibus nullæ sint Idææ elementares , & constituentes , quibus componantur.

### §. III.

Tertiò dividuntur Idææ in adæquatas , & inadæquatas.

Adæquatæ illæ sunt , quæ accuratæ , perfectæque sunt , & partes omnes perceptæ rei complectuntur. Inadæquatæ verò , quæ non satis accuratæ sunt , & quæ nonnullas tantum partes rei illius , de quâ cogitamus , attingunt.

Igitur Idææ simplices omnes adæquatæ sunt ; simplices enim Idææ non constant partibus pluribus , ut superiori Paragrapho docuimus , atque adeo Idææ nostræ , quæ simplices perceptiones pro objecto habent , quidquid in hujusmodi perceptionibus est , prorsus complectuntur , non partes tantum aliquas , neque enim ullis constituentibus partibus componuntur , quæ simplices sunt. Ita *ex. gr.* cum cogitamus de Calore, Frigore, Sapore sacchari , &c. adæquatæ Idææ nobis obversantur ; neque enim Calor , frigus , sapor , partibus constituentibus componuntur , ut  
jam

jam pluries innuimus. Rursus si integra, ac plena alicujus vocis significatio ex alicujus linguæ instituto ei adfixa exploretur; & planè, perfectèque comprehendatur, tunc adæquata Idea significationis, ac potestatis vocis illius habetur.

Eâdem ratione, si inquiramus quàm latè pateat cognitio alicujus hominis circa aliquod objectum, & quæ, quantaque sit ejus cognitio penitus assequamur, adæquatam Ideam de illius hominis notione circa illud objectum habemus.

Hisce exemplis satis apparet, quidnam intelligamus Idearum adæquatarum nomine. Secus verò, si *ex. gr.* de peculiari aliqua substantia cogitantes, aliquot tantum ejusdem affectiones, proprietates, & attributa cognoscimus, & aliquas tantum eorum causas, non omnes proprietates, non omnes causas, non omnia eorum attributa, inadæquatam substantiæ illius dumtaxat Ideam habemus. Hinc cum nulla prorsus substantia sit, cujus modificationes omnes, & proprietates, omnesque eorum causas noscamus, ut suo loco manifestissimè ostendemus, sequitur Ideas omnes nostras substantiarum, omnino inadæquatas esse.

## 8 RATIONALIS PHILOSOPHIÆ

Eâdem ratione, si inquirentibus nobis, quid hic, illeve Auctor, quid hâc, illâve locutione intellexerit, & aliquas tantùm assequamur Ideas, quas locutionibus illis designare intelligebat, inadæquatam dumtaxat Ideam habemus significationis, quam vocibus illis, Auctor tribuebat.

### §. IV.

Quartò, Ideæ omnes nostræ, dividuntur in perspicuas, & obscuras.

Cum de aliquo objecto cogitamus pluribus partibus composito, nec nobis satis innotescit, quibusnam partibus constet, seu quotæ, & quænam sint partes, quibus objectum illud constituitur, tunc obscura Idea objecti illius menti nostræ præsens est. Cum verò quidquid est in objecto perspicuè, distinctèque noscimus, ita ut facillime objectum illud à quocumque alio dijudicemus, & distinguamus, perspicuam, claramque Ideam objecti illius habemus.

Ita *ex. gr.* obscura est Idea summæ plurium nummorum, quos promiscuè vidimus, quousque inito calculo summa il-



illa deprehensa sit: eâdem ratione, si pictura aliqua, aliudve hujusmodi nobis ob oculos obversetur, nec satis quascumque ejusdem partes invicem perspicuè distinguamus, obscuram Ideam picturæ illius habemus.

Quod si è contra de his *ex. gr.* mentis nostræ objectis cogitemus, quæ nullis constant partibus, utique objecta illa clarè perspicuèque cognoscimus; fieri enim non potest, ut ignoremus quotis, & quibusnam partibus constent objecta illa, quæ partibus omnino carent. Hinc cum simplex quæcumquæ perceptio nostra, ut alicujus doloris, mentis nostræ objectum est, claram, perspicuamque Ideam hujusmodi objectorum habemus. Cum enim perceptiones cujusvis Saporis, Doloris, Odoris, Coloris, &c. pluribus constituentibus partibus minimè constent, necesse est, ut hujusmodi sensationum nostrarum Ideæ claræ, perspicuæque sint; nam uti superiùs a nobis definitum est, claræ sunt Ideæ omnes, quæ menti exhibent quicquid est in nostrarum cogitationum objectis, ita ut objecta hæc, facillime à quibuscumque universis dignoscantur.

A 5 §. V. Quint-

§. V.

Quintò Ideæ omnes nostræ vel a mente efformatæ sunt, vel tantum receptæ, & nullatenus confictæ, & constitutæ ex arbitrio. Quæcumquæ a mente efformatæ sunt, & constitutæ, Phantasticæ appellantur; quæ autem ab animo, quomodocumque id fiat, acquisitæ tantum sunt, receptæ tantum sunt, non verò ex arbitrio efformatæ, reales vocantur. Exemplis res clarior fiet.

Cum *ex. gr.* sensuum usu, & applicatione, Ideæ nobis excitantur Colorum, Odorum, Sonituum, Motûs, Impulsûs, Figurarum, Corporum, Artefactorum, &c. & mens nostra Ideas hasce relinquit, quales recipit, Ideæ illæ reales sunt, nempe ab aliqua re ortæ, quales recipiuntur, nec mentis arbitrio ullatenus immutatæ ab eo statu, quo receptæ sunt. At si mens, receptis *ex. gr.* Ideis Hominis, & Equi, dimidium hominis cum dimidio equi simul jungat, & monstri Ideam ita effingat, conformetque, hæc Idea Phantastica est, composita enim est arbitrio mentis, ex Ideis dimidii hominis;

&

& dimidii equi, cum interim nuspiam conjuncta viderit hujusmodi objecta, ita ut unum, idemque animal constituent.

Hujus generis sunt Harpiæ, Sphyngeſ, Chimæræ, & univerſa Poëtarum monſtra: ejusdem generis etiam ſunt novæ machinæ, novæ fabricæ, novi mechanici operis cujuſvis nondum viſi conceptiones, & imaginationes.

Rurſus, Phantaſticæ quoque ſunt Ideæ illæ univerſæ, quæ à mente efformantur, non objecta illa ex arbitrio componendo, jungendoque, quæ nuspiam juncta, deprehenſa ab animo ſunt, ſed ea à cæteris ſejungendo, & veluti præciſa, & abſtracta à reliquis conſiderando, quæ, re ipſâ, ſejuncta, præciſaque non ſunt, quæque cum aliis juncta ei apparuerunt, & ab eo deprehenſa juncta.

Phantaſticæ hujus generis Ideæ ſpecifico, ac peculiari nomine, Abſtractæ à Philoſophis nuncupantur. Ita, ſi viſo corpore aliquo, ut *ex. gr.* columnâ marmoreâ, ejus longitudinem tantum mens contempletur, omiſſâ latitudine, vel ſuperficiem tantum, omiſſâ craſſitie, omiſſâ marmoris naturâ, duritie, colore, &c. licet hæc omnia ſimul adnexa, & coexiſtentia in

co-

## YZ RATIONALIS PHILOSOPHIÆ

columna illâ re ipsâ sint, Ideas abstractas efficit.

Hoc abstractionis genere, quo aliquid tantum consideramus in objectis, cætera verò, quæ simul insunt eidem objecto, non attendimus, utuntur passim Geometræ, qui puram, ac nudam longitudinem contemplantur, quin latitudinem attendant, vel longitudinem cum latitudine conjunctam, nempe superficiem, quin de profunditate ullatenus cogitent, licet re ipsâ nulla prorsus superficies sit, aut esse possit sine profunditate, nullaque linea, seu nulla longitudo sine latitudine aliqua, quantumvis exigua.

En quid sint Ideæ Reales, quid Ideæ Phantasticæ, & ex Phantasticis, quænam sint per compositionem efformatæ, quænam verò per divisionem, sive per abstractionem à mente nostra effictæ. Ad postremam Idearum divisionem, partitionemve properandum jam nobis est.

### §. VI.

Postremò igitur dividuntur Ideæ omnes nostræ in Ideas singulares, universales, & particulares.

Cum

Cum quis percipit peculiarem quamcumque rem cujusvis generis, quæ una sit, non multiplex, singularem ideam habere dicitur; siue res illa simplex sit, siue composita, siue una substantia sit, siue unus quarumcumque substantiarum complexus, siue una modificatio sit, vel una quorumcumque modorum collectio, siue denique data quæpiam relatio sit, siue datus quilibet determinatus relationum numerus; in hisce enim casibus universis ideam semper particularem habemus.

Hujus ergo generis sunt idea dati cujusvis determinati corporis naturalis, vel artefacti utcumque compositi, dati cujusvis exercitûs, gregis, acervique, cujusvis determinatæ figuræ, uniuscujusvis determinati motûs, determinati temporis, determinatæ seriei, determinati numeri, uniuscujusvis determinati spatii, &c.

Quoties ergo, uno verbo rem dicamus, mens nostra aliquid percipit veluti unum, & non multiplex, singularem habet ideam.

Quod si mens cogitet de omnibus simul alicujus ordinis, classisve objectis, nullo prorsus excepto, perceptio illa objectorum illorum omnium, nullo excepto,

#### 14 RATIONALIS PHILOSOPHIÆ

to, idea est universalis. Ita dum concipio plantas omnes simul, nullâ exceptâ, animantia omnia, aut omnia volatilia simul, omnia quadrupedia simul, omnia simul natantia, omnes simul homines, aut omnes Italos, aut Gallos, &c, ideam habeo universalem. Hinc manifestum est ideas illas omnes universales, quæ singula objecta complectuntur, quibus idem nomen cum adnexa significatione competit, mentis opus esse, nec per sensus acquiri. Quis enim per sensus novit usquam omnia individua ullius speciei, ut omnes plantas, omnes homines, libros omnes, &c.? Ergo quomodo mens nostra universales efformet Ideas. Si quis datum triangulum, circulum datum percipiat, & animadvertat alios innumeros, aut potius infinitos esse, & concipi posse illis similes, si de illis omnibus indiscriminatum, & in massam, nullo prorsus excepto, cogitet, Ideam jam confecit universalem trianguli, & circuli.

Pari ratione, si quis animum intendant in datam aliquam determinati objecti partem, aut in datam, determinatamque modificationem, attributum, relationem, &c. cogitetque infinitas numero res ejusmodi esse,

se, & concipi posse, totidem efformat universales Ideas rerum illarum.

Hujusmodi autem Ideas peculiaribus nominibus adnectendo, universalia nomina, sive generica, & specifica vocabula homines condiderunt. Ita, *ex. gr.* dum datam quampiam gratam, molestamve sensationem habeo, aut percipio, si cogitem plures utcumque varias sensationes esse posse aliquo modo gratas, aut molestas, & tum omnes gratas simul quotquot fieri possunt, tum omnes simul ingratas, quæcumque esse possint, concipio, universales efformo Ideas invicem distinctas gratæ, ingrataeque sensationis; sique prioribus doloris nomen, posterioribus voluptatis vocabulum tribuo, nomina specifica gratarum, molestarumque sensationum condo.

Eodem pacto si ideam habeam determinati alicujus humani actûs publico Societatis bono conformis, aut infanti alicui perniciosi, si animadvertam innumeros alios actus tum similes, tum utcumque varios esse posse, qui humanam Societatem juvent, aut innocentes lædant, sique priores actus omnes indiscriminatum, nullo excepto, concipiam hâc cogitatione-

## §6 RATIONALIS PHILOSOPHIÆ

tione: *actus quilibet publica felicitati conformis*, posteriores verò omnes indiscriminatum, & in massam complectar animo aliâ hâc cogitatione: *actus quilibet insonantem ladens*, duas efformavi universales ideas actuum humanorum oppositæ naturæ, publicæ, nempe felicitati conformium, & innocuis infensorum. Quod si primæ ex duabus hisce universalibus Ideis nomen tribuam civilis virtutis, alteri verò civilis vitii, duo specifica nomina constituo, primum ad quemcumque actum prioris naturæ designandum, alterum ad actum quemcumque posterioris naturæ significandum.

Patet igitur ex hisce exemplis quomodo ab humanâ mente universales Ideæ efformæ sint, efformarique possint, & quomodo specifica cujusvis Idiomatis vocabula sint constituta, constituique valeant. Efformatis exposita ratione ab humanâ mente Ideis universalibus, Ideis specificis, constitutisque specificis vocabulis, quoties menti occurrant data quæpiam objecta, quibus æquè competat Idea quæpiam universalis, aut specifica, statim videt objectis illis universale illud, aut specificum illud nomen ex æquo conven-



venire, quo mens ideam illam universalem, aut specificam designat, quæ datis illis objectis convenit; atque ita objecta illa ejusdem generis, ejusdemve speciei idealis, & nominalis esse dicuntur, nimirum æquè ipsis competere datam quampiam determinatamque universalem, aut specificam Ideam, nomenque ad illam significandam constitutum. Cæterum Ideæ universales aliæ sunt aliis universaliores.

Ideæ illæ universales, quæ æquè conveniunt rebus omnibus sub pluribus, disparibusque Ideis specificis contentis, universaliores sunt aliis illis Ideis, quæ competunt rebus tantum omnibus sub unica specifica Idea, aut paucioribus Ideis specificis contentis.

Ita, Idea hæc universalis: *figura rectilinea*, nimirum extensio quæcumque rectis quibuscumque lineis terminata universalior est aliis hisce universalibus Ideis: *Figura triangularis, parallelogramma, pentagona*, &c. Etenim Idea trianguli exprimit tantum extensiones quascumque, nullâ exceptâ, quæ tribus rectis lineis terminantur. Idea figuræ, parallelogrammæ, extensiones universas quascumque quatuor lineis rectis quibusvis terminatas,

B

qua-

quarum oppositæ æquales sint, & parallelæ; ac denique Idea pentagoni illas tantum extensiones omnes exprimit, quæ quinque rectis lineis continentur. At memorata illa universalis Idea, *figura rectilinea* & triangulos universos quoscunque, nullo excepto, & universas figuras parallelogrammas, & universas pentagonas quaslibet, & cæteras omnes cujusvis nominis, & ordinis extensiones quibuscunque lineis rectis, & utcumque definitas complectitur.

Pari ratione Idea hæc, *figura*, nimirum extensio quælibet utcumque determinata, & circumscripta universalior etiam est ipsamet illâ universali Ideâ *figura rectilinea*, cum Idea indeterminata, & universalissima figuræ non rectilineas modo, sed & utcumque curvilineas, & quomodocunque mixtilineas universas amplectatur; quælibet enim illarum figura est, extensio nempe undique definita. Antequam ab Ideis universalibus ad particulares Ideas considerandas gradum faciamus, animadvertendum occurrit nullam universalem Ideam, pluribus scilicet, distinctisque objectis æquè convenientem ab humana mente efformari posse, nisi præcisionis ali-

alicujus, aut abstractionis ope: Enimvero, ut data quæpiam Idea pluribus peculiaribus objectis conveniat, necesse est, ut non includat quæ propria omnino, & peculiaris, & nullatenus communia sunt in unoquoque ex objectis illis, quibus eadem universalis Idea congruit. Quodvis determinatum peculiare, aut singulare mentis objectum sua habet attributa singularia, per quæ tale est, per quæ determinatum hoc, illudve individuum est, & non aliud; Si mens ad attributum hujusmodi attendat, singularem dumtaxat, peculiaremque prorsus ideam habebit, non universalem, non pluribus nimirum communem.

Ut ergo ideam aliquam universalem mens efformet, abstrahat præscindatque necesse est ab attributis singularibus propriis individuis singuli cujusvis objecti. Quidquid igitur commodi ab Ideis percipitur magis, minusve universalibus, & à specificis, genericisque vocibus præcisioni, abstractionique debetur. Scholasticum Porphyrio quinque potissimum universales Ideas seligunt, de quibus fusa agunt, disputantque in immensum, quas quinque Ideas Prædicabilia, & Univer-

falia appellant. Quæ quidem hæ sunt : *Genus, Species, Differentia, Proprium, & Accidens.*

Verùm quæcumque de hisce dictitant, aut nullius momenti sunt post ea, quæ de universalibus Ideis diximus, aut falsa; supponunt enim nobis innotescere posse intimam, genuinam, germanamque naturam, essentiamve, ut ajunt, substantiarum omnium corporearum, & incorporearum. Quod cum falsissimum sit, nec verum uspiam esse possit, ut suo loco differemus, quidquid de his constituent, falsa sint, & supervacanea oportet. Quamobrem hisce relictis ad particulares Ideas prope-remus.

Cum mens non cogitat de unico objecto, nec de omnibus dati generis, datæve speciei, sed de aliquibus speciei, generisve alicujus objectis indeterminatè, ideam particularem habere dicitur. Ita hæ Ideæ : *Aliqui trianguli, nonnulli homines, plurima corpora, quadam arbores, omnes ferè lapides, &c.* particulares Ideæ sunt. Non unicum enim datumque determinatum triangulum, nec omnes, non unicum determinatum hominem, nec omnes, non determinatum ullum corpus, nec omnia, sed aliqua indeter-  
mi-

minatè generum illorum objecta complectuntur.

Cæterum longissimè à vero distaret, quicumque, multiplices, quas hucusque protulimus, Idearum nostrarum divisiones, utilitate vacuas arbitraretur. Etenim præterquam quod distributiones Idearum in præcipuas classes, in quas dividi possunt ad cognoscendam nostrarum perceptionum naturam, & varietatem necessariæ sunt, alios etiam, maximæque utilitatis usus habent, quos palam ostendent, quæ à nobis tradenda sunt, ubi de errorum causis, deque ratione inveniendæ, demonstrandæque veritatis præcipuè disseremus.

## C A P U T II.

### *De Judicijs.*

**J**UDICARE, Philosophico quidem sensu, est certum ducere, persuasumque habere inter duo, plurave mentis nostræ objecta, relationem quampiam convenientiæ, & connexionis, vel disconvenientiæ, & discrepantiæ intercedere, seu certum ducere, persuasumque habere aliquid ali-

## 22 RATIONALIS PHILOSOPHIÆ

cui rei convenire, vel non convenire. Ita si, *ex. gr.* certum ducamus, persuasumque habeamus felicitatem à virtute potissimum oriri, iudicium efformare dicimur à Philosophis, quia nimirum pro certo habemus, inter felicitatem, & virtutem, relationem convenientiæ, & connexionis intercedere, ita ut felicitas à virtute potissimum oriatur.

Eâdem ratione si certum ducimus aliena rapere, & in usum proprium convertere, Justitiæ adversari, iudicium efformamus, persuasum nempe habemus alienarum rerum rapinam, earumque usum invito Domino cum Justitiæ legibus non convenire, discrepare nimirum ab Justitiæ Idea. Igitur iudicium, generatim est actus ille animi, quo pro certo habemus aliquid de alio verum esse, aliquid alicui convenire, vel non convenire. Iudicium verò quodcumque, mentis si enuncietur vocibus, si videlicet vocabulorum ope, & ministerio exprimitur, Propositio, sive Enunciatio dicitur, & tum id, cui aliquid convenire, aut ab eo discrepare putamus, tum voces, quibus id significatur, subjectum propositionis appellatur: Id verò, quod subjecto con-

ve-

venire, aut non convenire ducimus, Attributum, five Prædicatum propositionis à Scholis nuncupatur. Sit, *ex. gr.* hæc propositio: *Dotale prædium invita muliere per Legem Juliam Maritus alienare prohibetur*: vox *Maritus* subjectum continet, reliquæ voces assertum attributum. Assertitur enim de Marito in allata propositione Legem Juliam ei interdicare potestatem, fundum dotale invita Muliere alienandi. Cæterum, five tum subjectum, tum attributum distincta vocabula exprimant, five una, eademque vox complectatur, perinde est; potest enim utique vel unica tantum voce tum subjectum, tum attributum, tum convenientia attributi cum subjecto significari. Hinc illud Cæsaris; *Veni, vidi, vici*, tres continet integras enunciationes; æquipollent enim tria illa verba tribus hisce propositionibus, *Ego Cæsar fui veniens, fui videns, fui victor*.

Constat autem actum illum animi, quo verum ducimus, quo assentimur, datum quodpiam attributum, dato cuiusdam subjecto convenire, iis vocibus significari, quæ à Grammaticis peculiari nomine verba nuncupantur. Actus verò ille, quo ani-

mus assentitur, & pro certo habet datum quoddam attributum à dato quopiam sub-  
jecto discrepare, seu cum dato quopiam  
subjecto non convenire, sæpius quidem,  
expressis negativis particulis, *non, mini-  
me, haud, nequaquam*, aliisve id generis  
designari solet, ut cum dicimus, *ex. gr. In testamentis neque haeres scriptus, neque  
is, qui in potestate ejus est, neque pater  
ejus, qui eum habet in potestate, neque  
fratres, qui in ejusdem patris potestate sunt,  
testes adhiberi possunt.*

At sæpe etiam idem ille actus, quo  
animus attributum subjecto non convenire,  
aut à subjecto discrepare asserit, verumque  
ducit, significatur iis verbis, & nomini-  
bus, quæ implicitas dumtaxat continent  
negativas particulas, & discrepantiam ab  
aliqua re, seu non convenientiam cum  
aliqua re, seu negationem alicujus rei ex  
usu linguarum exprimunt, etsi non ad-  
sint expressæ negativæ particulæ, cujus-  
modi sunt, *ex. gr. hæc verba, discrepa-  
re, dissentire, alienum esse, difforme, dis-  
sonum, innocuum, impigrum esse, &c.*  
quæ hisce æquipollent, *non convenire, non  
congruere; non conforme esse, non consonum  
esse, non esse nocens, non esse iners, &c.*

Cum



Cum animus assentitur, verumque ducit aliquod attributum alicui subjecto convenire, Judicium illud Affirmativum vocatur; cum verò putat, certumque ducit aliquod attributum subjecto cuiuspiam non convenire, aut ab eo discrepare, Judicium Negativum efficere dicitur. Hinc Enunciationes, Propositionesve, quæ animi affirmativum judicium expriment, & ipsæ Affirmativæ, quæ judicium negativum complectuntur, Negativæ & ipsæ nuncupantur, quibusvis tandem vocibus conceptæ sint. Aliquando enim enunciationes prima fronte, & inspectis tantum vocibus, quibus efferuntur, affirmativæ apparent, cum tamen negativum sensum complectantur: aliquando è contra negativæ videntur, si nil, nisi voces, inspiciatur, cum tamen reipsâ sensum affirmativum claudant: ita *ex: gr.* hæc enunciatio; *Planeta Veneris minor est Terrâ*, affirmativa primo intuitu appareret; at negativum hunc sensum continet, *Planeta Veneris nedum aequat mole globum terraqueum*; rursus hæc enunciatio, *Veterum Romanorum justitia, & castitas à Christianorum justitia, & castitate plurimum distat*, etsi affirmativa videatur, est ta-

## 26 RATIONALIS PHILOSOPHIÆ

men sensu negativa: id enim sibi vult; *Romanorum justitia veterum, & castitas plurimum discrepant*, nimirum longo intervallo non conveniunt, non pares sunt cum *Christianorum justitia, & castitate*. E contra, hæc propositio: *Numerus 5. quinquies sumptus neque major est, neque minor numero 25*, negativa prorsus videtur, cum adsint expressæ negativæ particulae, *neque major, neque minor*; attamen, re probe inspectâ, affirmativa est; hunc enim efficit sensum, numero quinquies accepto convenire hoc attributum quod sit æqualis numero 25.

Hinc patet judicia, propositionesve affirmativas à negativis dijudicandas esse ex sensu tantum, quem complectuntur, non ex eo, quod adsint, aut absint negativæ particulae.

## C A P U T III.

*De Judiciis Nominalibus, Idealiis, & Realibus.*

**Q**UODVIS Judicium, atque adeo quævis Enunciatio, sive affirmativa sit, sive negativa, aut circa nomina rerum, nominum-

numve significationem, aut circa rerum Ideas, aut circa objecta Idearum, versatur; atque aded omnis propositio vel Nominalis est, vel Idealis, vel Realis: Aptis id exemplis illustremus.

Primo Enunciatio hæc: *nomine Parallelogrammi, intelligimus superficiem planam inter quatuor lineas comprehensam, quarum opposita æquales sunt, & parallela*, Nominalis est; explicat enim notionem, sensumque vocabuli hujus, Parallelogrammum.

Secundò hæc propositio: *Plato arbitratu est, animos hominum, eorundem conceptioni præexistere, & scientiam generis humani reminiscentiam esse earum rerum, quas animi noverant, antequam cum humanis Corporibus copularentur*: Hæc inquam enunciatio Idealis est; nam exprimit, quænam fuerit Platonis opinio de animis, & scientia hominum, ideoque explicationem tantum mentis, expositionemve complectitur Ideæ, quam quis habuit.

Tertiò hoc judicium: *Aurum à Mercurio penetratur*, Reale est; non enim circa explicationem alicujus nominis, non circa expositionem alicujus opinionis, & Ideæ;

## 18 RATIONALIS PHILOSOPHIÆ

Ideæ , sed circa mentis nostræ , nostrarumque perceptionum objectum aliquod versatur , nimirum circa corpus illud , quod aurum vocamus , ejusque proprietates.

### §. I.

Ad Enunciationes Nominales quod attinet, vel versantur circa significationem nominum ex communi usu alicujus populi, gentisve, vel circa peculiarem potestatem, quam hisce, illisve vocibus aliquis tribuit, vel tandem circa determinatum sensum, significationemve peculiarem, quam nosmetipsi vocibus, quibus utimur, adnectimus.

Significationem nominum ex usu communi alicujus populi constituere, Grammaticorum est. Peculiarem significationem à vulgo secretam, distinctamque determinare, quam aliqui tantum, aut quispiam tantum hisce, illisve vocibus adnectebant, aut adnectunt, Criticis interpretibus pertinet. Neque hæ vocabulorum definitiones ex arbitrio nostro pendent; agitur enim de sensu, à populo, vel ab aliquibus, vel à quopiam, vocibus, quibus usi sunt, tributo. Cuique verò jus est vocum, quas ad-

adhibet, quemlibuerit sensum constituere, sive quo libuerit sensu vocabula accipere, quæ usurpat; neque enim voces naturæ quidem suæ hoc potius, quàm illud significant, imo sane aptæ æquè sunt ad quicquid libet, exprimendum.

Hinc nemini moveri lis poterit, quod vocem quamcumque, hoc, potius quàm alio sensu acceperit, accipiatve, dummodo enunciet quænam sit potestas, & significatio, quam vocibus adjungit, etsi cæteroquin significatio illa, aut ab usu accepto remota sit, aut non sit rerum naturæ, quas exprimere vult, consentanea: nimirum quia hisce in casibus, nec quæritur quid alii per voces illas significant, nec an significatio, quam quis tribuit cuiuspiam vocabulo quidpiam veri complectatur, & rerum naturæ, quas vocibus illis designare ei libet, consentanei, sed tantùm quamnam Ideam, quamque significationem huic, illive nomini, aut locutioni quis adnectat.

Cæterum longè maximi usûs est in scientiis, & in instruendis, suadendisque hominibus vocum, & locutionum explicatio frequens, nimirum aperta, & perspicua expositio sensûs, quem qui loquitur,

90 RATIONALIS PHILOSOPHIÆ

tur, aut scribit ad alios docendos, suadendosque vocibus tribuit, quibus utitur, & ratio quidem ea est; quia ut fusè demonstrabimus, ubi de errorum causis potissimis agemus, innumeræ planè sunt voces, & locutiones, quibus ex usu communi linguarum indeterminata, & obscura significatio adnexa est, innumeræ sunt in unoquoque idiomate, ambiguae, & æquivocæ potestatis, sensûsve. Jam verò si id generis voces à nobis inter loquendum, scribendumve adhibeantur, neque eis prædeterminatus, præconstitutusque sensus adnectatur, nosmetipsi, quidnam nobis velimus, & quænam sint animi nostri judicia, rationesque ignorabimus.

Si verò aperte, & liquidè non explicemus aliis, non definiamus quidnam omnino vocibus æquivocis, & non determinatæ ab usu significationis exprimere, & designare velimus, utique mentem nostram alii certò, tutòque assequi non poterunt, non judicia nostra percipere, non ratiocinationum nostrarum vim sentire, atque adeo nunquam alios suadebimus, si voces æquivocæ, & indeterminatæ significationis, quas longè plurimas

mas esse superius innuimus, indefinitæ adhibeantur. In idem autem absurdum incidemus, ut patet, si in definiendis memoratis vocibus, & locutionibus, alias voces usurpemus iisdem vitiis laborantes. Rursus idipsum contingat, necesse est, si prædefinitæ à nobis voces, & locutiones in sermonis, ratiocinationisve progressu, non in eundem prorsus sensum accipiantur, nec alios de hâc sensus mutatione, expressè moneamus; nimirum, quia cum ignorent alii nos à prædefinito, præconstitutoque sensu explicatarum vocum re ipsâ deflectere, male nos intelligent, ab Ideis nostris aberrabunt, nec suaderi per consequens poterunt.

Ex quibus apertissimè patet, primò, definitiones nominum maximi esse usûs ad recta iudicia, rectasque ratiocinationes conficiendas, ad alios docendos, & suadendos, atque ad innumeras discrepationes, vanaque dissidia declinanda, & componenda, quæ ex ambiguitate, & obscuritate significationis vocum oriuntur.

Secundò, in definiendo sensu, in quem voces accipere volumus, non esse adhibendas, constat, alias voces æquivocas,  
&

& indeterminatæ , subobscuræque potestatis.

Tertiò manifestum est ne hilum quidem esse deflectendum à præconstitutis vocum definitionibus , quoties eadem illæ voces à nobis adhibentur in sermonis , ratiocinationisve progressu , aut saltem si à priori illo sensu vel tantisper deflectamus , id palam monendum est , ne ludibrium lectoribus , auditoribusve debeamus.

Quamvis autem necessitas servandi hæc monita , & regulas , palmaris sit , & luculentissima ; attamen mirum est quàm sæpe homines eas inter scribendum , loquendumque negligant. Scholastici potissimum in ipsas peccant , cum voces passim adhibeant obscuras , implexas , & ambiguiusculæ potestatis , nec eas definiant , vel si aliquando definiunt , alias voces usurpant in eis definiendis , quæ æquè æquivocæ sunt , & indeterminati , confusique sensûs , vel tandem huc , illuc immutant significationem earundem vocum , nec de hac immutatione alios perspicuè monent. Possemus id pluribus exemplis ostendere , at tempori dicendisque rebus consulendum est.



## §. II.

Ad propositiones Ideales quod attinet, animadvertendum ducimus, admodum difficile esse pluribus in casibus propositiones, hominum Ideas, & opiniones, satis ad verum exhibentes constituere.

Cum alicujus mentem, qui alloqui, & rogari potest, dignoscere satis accuratè volumus, possumus quidem id assequi eum tot interrogationibus urgendo, quorū satis sint ad luculenter percipiendum; quidnam is de hac, illave re sentiat; at cum ab eo, de ejus opinione quæritur, sciscitari non possumus, quidnam ipse senserit, sentiatve, cum ex ejus scriptis, aut ex testibus eruenda est ejus sententia, ejusque Idea, si potissimum circa res inconspicuas, insensibiles, captuque difficiles versetur, arduum sanè, & difficile opus est, id citra erroris periculum decernere; nam primùm ad testes quod attinet, perdifficile sæpe est certò, tutòque dijudicare, an ipsi fide digni prorsus sint, nec ne, & an rectè, probèque ejus sententiam, mentemque perceperint, de quo testantur. Secundò facile esse

C

er-

errare à vero, cum ex scriptis auctorum de rebus sensus effugientibus, captuque difficilibus verba facientium, genuinæ, germanæque eorum opiniones, & Idææ sunt eliciendæ, evincitur multiplici ratione. Nam primò scriptores in exprimendo id, quod sentiunt, sive per oscitantiam, sive per imperitiam non semper, imò satis rarò voces, locutionesque omnium aptissimas seligunt ad id, quod volunt, significandum.

Secundò, sæpenumero scriptores easdem voces, & locutiones adhibentes, non idem omnes intelligunt, nec eas ex vulgari, communique usu accipiunt, nec tamen perspicuè hac de re lectores commonefaciunt; nunquam enim, aut ferè nunquam voces quas usurpant, luculenter definiunt, exceptis Mathematicis, & recentioribus quibusdam accuratioribus scriptoribus mathematicè scribendi methodo accedentibus, adeoque sæpè vocabula defendantibus.

Tertiò, lexicographi sæpènumero veterum voces male explicant, variasque significationes, quas suscipere possunt, non satis dijudicant, & recensent, ideoque pas-

passim occasione sunt iis , qui lexicis nimis fidunt.

Quartò, vocabula , & locutiones , res insensibiles , inconspicuas , captuque difficiles designantes , omnium maximè æquivocæ , & caliginosæ significationis sunt , præsertim si de linguis veteribus sermo sit , quas minus noscimus , ac vulgò suatum sit , atque adeo passim ignoramus hisce in casibus , quonam sensu scriptor , de cujus mente , & opinione quæritur , voces illas , locutionesque acceperit.

Rationes hasce , quas summatim indigitavimus , & quibus aliæ nonnullæ addi possent , ex quibus fit arduum sæpè opus esse aliorum Ideas , & opiniones probè constituere , præsertim ubi de rebus cognitum arduis , sensusque effugientibus verba faciunt , non ostendimus hîc , & illustramus exemplis , quæ tamen undique passim sese offerunt , adducenda , quia id omne vobis apertissimè constabit ex his , quæ docebimus , de potissimis errorum occasionibus. Canonas verò , cautionesque , quibus inhærendum est , ubi de aliorum mente , scriptorumque opinione aliqua noscenda agitur , trademus Dia-

C

lec-

36 RATIONALIS PHILOSOPHIÆ  
lecticæ nostræ metaphysicæ parte alterâ,  
cum de Analytica methodo.

§. III.

Denique animadvertenda nobis quædam  
sunt ad Enunciationes Reales, quod spec-  
tat. Omnis igitur Enunciatio Realis,  
vel rerum essentiam; ut ajunt, naturam-  
que exprimit, vel circa ea versatur, in  
quibus Essentia, Naturave rerum sita,  
ac posita minimè est. Cum autem Essen-  
tiæ, & Naturæ nomina in æquivocatione,  
& obscuritate laborent, definimus nos  
Essentiam, Naturamque rerum appellare  
id, quodcumque sit, ex quo profluunt,  
ex quo pendent, & oriuntur cætera at-  
tributa universa, cæteræque proprietates,  
quibus res præditæ sunt; ita Essentiam,  
Naturamve auri appellamus id omne quod-  
cumque sit, ex quo, & cujus vi, aurum  
ea omnia attributa habet, easque affectio-  
nes, & proprietates, quibus præditum  
est. Idem dictum volumus de cæteris  
rebus universis.

Enunciationes verò, quæ exprimunt  
naturam rerum hoc sensu acceptam, de-  
finitiones rerum vocantur. Hinc enun-  
cia-

ciatio hæc, *ex. gr. omne id, quod figura corporum nuncupatur nil aliud est, nisi dispositio, & collocatio extimarum partium, quibus corpora extrinsecus circum clauduntur*; hæc, inquam enunciatio, definitio rei est; exprimit enim naturam figurarum, seu quid verè sit illud, quod figura corporum appellatur. E contra hæc alia propositio realis, *Cæsar Pompeianos vicit, & Romanâ Republicâ potitus olim fuit*, definitio non est; neque enim Pompeianos vicisse, & Romanæ Reipublicæ libertatem occupasse essentia Cæsaris, naturave fuit. Eâdem de causâ hæc enunciatio, *Argentum contrahit squallorem situ*, definitio non est; etenim etsi unam ex proprietatibus argenti exponat, tamen non exprimit quidnam sit id, per quod argentum contrahit squallorem situ, cæterisque attributis præditum est, quæ argento competunt. Idem dicendum de quibuscumque aliis id generis enunciationibus.

Cæterum cum propositiones illæ reales, quæ definitiones rerum appellantur, exprimant, & enuncient, quidnam res sit, consequitur primò, definitiones rerum iis omnibus objectis convenire debere,

### 38 RATIONALIS PHILOSOPHIÆ

re, quæ ejusdem prorsus naturæ sunt; cæteris verò rebus, quæ disparis quomodocumque sunt naturæ, congruere non posse. Hinc, *ex. gr.* male ita materia prima à Peripatheticis definitur, id quod non est quid, neque quale, neque quantum, neque aliud quidpiam **eorum**, quibus Ens determinatur; nam **negativa** hæc attributa mero etiam nihilo conveniunt: merum enim nihilum neque est quid, neque quale, neque quantum, &c.

Hoc eodem vitio laborant propositiones omnes merè negativæ, quæ nimirum docent, non quid res sint, circa quas versantur, sed tantum quid non sint.

Patet autem eas propositiones, quæ æquè veræ sunt de rebus disparis naturæ, definitiones esse non posse, si enim enunciarent genuinam alicujus naturam rei, utique rebus essentiâ variis, & disparibus non convenirent.

Secundò, definitiones rerum enuncient, necesse est, naturam rerum definitarum non ex parte tantum, sed ex integro. Hinc malè, *ex. gr.* ita à Scholasticis tempus definitur, *mensura motûs secundum prius, & posterius, sive per partes priores, & posteriores*; etenim ut de cæteris vitiis ejus

eius definitionis raceamus, incompleta est, & temporis naturam ex integro non exprimit, tempus enim non motûs tantum, sed & quietis, & existentiae durationem metitur. Res quippe per certum tempus, & quievisse, & extitisse dicitur, æquè bene ac dicatur ad certum tempus in motum actam fuisse. Tertiò, cum definitio rei in id adhibeatur, ut nimirum rerum natura iis innotescat, qui eam ignorant, consequens est, eas luculentas esse debere, aut haud ægrè intelligi possint, & palam facere rei definitæ naturam. Hinc longè plurimæ Scholarum definitiones prævæ, vel hac de causa sunt, cum sint obscurissimæ, & implexissimæ, cujusmodi est *ex. gr.* definitio illa motûs ab Aristotele confecta, *Motus est, ait, actus entis in potentiâ, quatenus in potentiâ*: quisnam hominum latinè sciens, non meliùs intelligit, quid motus sit, auditâ tantum hâc voce *Motus*, quam eum intelligat post auditam Aristotelis definitionem? Quod si igitur definitionis natura est, ut palam faciat rei definitæ naturam iis, qui eam ignorant, necessariò sequitur, neque objecta simplicia, neque substantias definiri posse. Non substan-

tias, quia vera, ac intima earum natura, & essentia, sive corporeæ sint, sive incorporeæ omninò nos latet, neque assequi unquam poterit, ut suo loco fusè demonstrabimus: non objecta simplicia, cujusmodi sunt, Color, Voluptas, Color, Odor, Sapor, Sonitus, Desiderium, Volitio, &c. quia id generis rerum Ideas excitare non possumus in aliorum animis ministerio vocum, nisi eas experienciâ docente priùs acquisierint. Ita cæco exprimi non potest quidnam sit color, ita ut colorem intelligat, quid sit odor violæ ei, qui violam olfactus non est, quid sit Cephalalgia ei, qui nunquam dolorem illum expertus est, & sic de reliquis simplicibus Ideis. Quamobrem cum objecta simplicia intelligere non possint ope verborum, qui ex propriâ experienciâ, ea non norunt, non possunt utique definiri. Qui verò simplicis objecti Ideam acquisitus est, nequit illud distinctius, & clarius cognoscere, ac ipsum percipiat propriâ experienciâ docente; adeoque definitio hisce in casibus locum habere minime potest, cum ex definitionis naturâ sit clariùs, & distinctiùs repræsentare, quid id sit, quod definire volumus, quod-  
que



que ante definitionem implexè, obscurè, & ex parte tantùm cognoscitur. Quæcum ita sint, ea tantùm mentis objecta definiri poterunt, quæ non simplicia, sed composita sunt, quæque præterea nil complectuntur, nil continent, quod imperceptibile sit, cujusmodi sunt ea animi objecta, quæ à Metaphysicis Modi mixti appellantur; hæc enim objecta & composita sunt, & constant modificationibus tantùm, & relationibus, quarum quidem rerum, modificationum nempe, & relationum perspicuas, adæquatasque ideas habere possumus, ut alibi docuimus; atque adeo possumus ea objecta penitùs, funditùsque, & distinctissimè introspicere, quæ modificationibus tantùm, & relationibus constant, proindeque definiri possunt absolutâ numeris omnibus definitione, ejus nempe generis sunt, ut cognoscere, exprimere, aliisque palam facere possimus, quænam complectantur, quæque sint ea, quibus constant, ita ut nil obscuri in ipsis relinquatur, & ex integro percipiantur. Qui verò objectum ex integro introspicit, & adæquatam ejus Ideam mente complectitur, utique ejus essentiam, naturamque cognoscit. Ab-

## 42. RATIONALIS PHILOSOPHIÆ

surdum enim est essentiam rei alicujus non perspicere, & rei ejusdem adæquatam, absolutamque Ideam habere. Atque hæc de definitionibus rerum dicta sint satis. Tempus enim urget.

### C A P U T IV.

*De Judiciis simplicibus, & compositis.*

Judicium illud simplex dicitur, adeoque enuntiatio illa simplex est, qua unicum attributum de unico non multiplici subjecto asseritur, aut negatur. Igitur simplex est, *ex. gr.* hæc enuntiatio: *Marci Tullii eloquentia Catilinam ex Urbe eliminavit*; simplex, inquam, est; Ciceronis enim eloquentia non multiplex, sed unicum subjectum est, & unicum attributum Catilinam ex Urbe eliminasse, ut per sese patet. Judicia vero illa composita appellantur, proindeque enunciationes illæ nuncupantur compositæ, quæ vel unico subjecto constant, & multiplicibus attributis, vel unico attributo, & multiplicibus subjectis, vel tum pluribus attributis, tum pluribus subjectis, atque adeo composita quæque enuntiatio,  
vel

vel composita est, ratione Subjecti, vel ratione Attributi, vel Subjecti simul & Attributi.

Ita v. gr. enunciatio hæc, *pura extensio, siue purum spatium, & æternitas limite carent*; hæc, inquam, enunciatio composita est ratione subjecti; duplex enim subjectum habet, & unicum attributum, utrique subjecto commune. Rursus altera hæc propositio, *Rationalis Philosophia nostra ad emendam mentem, regendamque rationem apta nata est*; composita est ratione attributi; Duplex enim attributum complectitur, licet unicum subjectum, de quo utrumque attributum asseritur: Denique propositio hæc, *Scientia, Probitas, Auctoritas, Divitie ad benè, beatèque vivendum conducunt, non verò ad Mortem declinandam*; hæc, inquam, enunciatio, composita est tum ratione subjecti, tum ratione Attributi; nam & plura subjecta sunt, circa quæ versatur, & plura attributa de unoquoque ex illis subjectis in allata propositione enunciantur. Ut autem citra erroris periculum judicemus, an propositio quædam simplex tantum sit, vel potius composita, ejusdem sensus pro-

#### 44 RATIONALIS PHILOSOPHIÆ

probè introspiciendus est, & quidnam omnino significet, attendendum. Aliquando enim, imo sæpenumero enunciationes primâ fronte simplices apparent, & tamen plures simplices complectuntur, adeoque compositæ sunt: aliquando verò multiplex subjectum, aut attributum multiplex continere videntur, cum simplices tantum sint.

Ita, *ex. gr.* enuntiatio hæc, *non bene conveniunt, nec in una sede morantur majestas, & amor*; Primo quidem intuitu videtur composita, tum ratione Subjecti, tum ratione Attributi; attamen si ejus sensus cominus inspiciatur, simplex est. De unico enim tantum subjecto unicum attributum vocibus illis omnibus negatur; nam huic æquivaleret; *amor cum majestate non convenit*. Sexcenta hujusmodi afferri possent exempla, at supervacaneum opus esset.

Ex opposito enuntiatio hæc, *ex. gr.* *Nulla ex veterum Græcorum sectis Philosophicis præter Platonicam docuit Deum esse incorporeum*; enuntiatio, inquam, hæc simplex apparet specie tenus; re verò ipsa plures enunciationes sensu complectitur, & composita idcirco est; hisce enim

enim duabus æquipollet. *Platonici Deum incorporeum esse docuerunt, reliqui verò Philosophi Græci, id nuspiam opinati sunt.* Eadem de causa composita est & hæc alia enunciatio, licet primâ fronte ex terminis non appareat; *Romane Jurisprudentiæ studium post relictos Pandectarum Codices instauratum in Occidente fuit; composita, inquam, est hæc enunciatio, si ejusdem sensus introspectiatur.* Hisce enim omnibus æquipollet; *Antequam Pandectarum Codices perirent in Occidente, Jurisprudentiæ Romana studium vigeat, mox Codices illi perire, & una periit Romana Jurisprudentia, denique Pandectæ iterum affectæ sunt, iisque in Occidente promulgatis occasione fuerunt, ut Homines ad Romanæ Jurisprudentiæ studium incubuerint.*

Cæterum haud parum interest, simplices enunciationes à compositis certò, tutòque dijudicare. Neque enim constare potest an propositio quæpiam vera sit, nec ne, nisi prius compertum sit, simplex ne sit reipsa, an composita: Nimirum nisi prius constet quinam ejus sensus sint; & au plures enunciationes simul contineat, nec ne.

## CAPUT V.

*De Singularitate, Particularitate, & Universalitate Judiciorum.*

**O**mne Judicium mentis, omnisque Enunciatio vel Singularis, vel Particularis, vel Universalis nuncupatur, prout ejus subjectum, vel singulare, vel particulare, vel universale est. Subjectum verò tum singulare dicitur, cum unicum est, non multiplex; Igitur enunciatio hæc, *Alexander ille Macedo, cognomento magnus, Persarum imperio primus positus est*, singularis appellatur, quia nimirum ejus subjectum, Alexander nempe Macedo, unicum est, non multiplex. Eadem de causâ singularis est, & alia hæc propositio, *Annibalis Carthagenensis victor exercitus, Capue deliciis prostratus, victusque fuit*; etenim Annibalis exercitus unicus est.

E contra, subjectum universale cum omnia individua unius speciei, omnesque species ejusdem generis nullâ prorsus exceptâ complectitur, nimirum tunc subjectum universale est, cum ea omnia com-

comprehendit, quæ significari possunt illo nomine, iisdemque iis vocibus, quibus id exprimitur, de quo aliquid asserimus, aut negamus, adeoque hæ propositiones *ex. gr. quilibet numerus vel par est, vel impar: Omnes Planeta primarii circa Solem volvantur*, universales sunt: sunt enim earum subjecta planè universalialia.

Denique, si subjectum singulare non sit, nec omnia penitus individua alicujus speciei, nec omnes omnino species alicujus generis comprehendat; sed aliquid asseratur, aut negetur de aliquibus tantum individuis, aut aliquibus dumtaxat speciebus, sive pluribus, sive paucioribus, sive numero determinatis, sive indeterminatis, hujusmodi, inquam subjecta, quæ nec singularia, nec universalialia sunt, particularia appellari solent, proindeque hæc Enunciatio, *ex. gr. aliquot ex triangulis tria latera habent invicem aqualia*, particularis est; neque enim ejus subjectum unicus triangulus est, nec omnes omninò trianguli, sed triangulorum dumtaxat nonnulli: ejusdem etiam classis eadem ratione est, & altera hæc enunciatio, *non omnis fert omnia telus*, nimirum non omnis regio, non  
omnis

omnis terræ species, fert omnia, sed aliqua aliqua rerum genera, aliæ alia.

Subjecta singularia exprimuntur iis vocibus, quæ à Grammaticis nomina propria nuncupantur, aut pronomini-  
bus demonstrativis *hic, ille*, aliisve locutionibus quibus peculiare quoddam objectum designatur. Voces verò ad universalitatem significandam constitutæ hæ sunt, *omnis, nullus, quicquid, universus*, aliæque id generis quæque his æquipollent appositæ subjecto. Tandem vocabula, quæ expressæ tesseræ sunt, & manifestæ notæ particularitatis propositionum hæc sunt, *aliqui, nonnulli, fere omnes, ut plurimum, major, minor pars*, &c. reliquis vocibus adnexa, quibus subjectum continetur.

Quod si propositio aliqua singularis non sit, & omni expressâ universalitatis, aut particularitatis notâ careat, *indefinita* à Dialecticis appellatur: indefinita igitur vocabitur, *ex. gr.* hæc enunciatio, *Animantia nascuntur ex semine*; etenim singularis utique non est, cum de unicâ re non loquatur, prætereaque omni tesserâ particularitatis, & universalitatis caret: neque enim adsunt voces, quæ partem aliquam, aliquem numerum animantium,

aut



aut omnia omnino animantia expresse denotent.

Cæterum quamvis indefinita propositio sit, si ejus sensus inspiciatur, suapte naturâ, vel universalis est, vel particularis, seu quod idem valet, vel universali æquipollet, vel particulari. Etenim qui indefinitis locutionibus utuntur ad subjecta propositionum, quas efformant significanda, vel eas intelligant necesse est omnimoda significatione, & latissimo sensu, quem suscipere possunt, vel eas accipiant oportet cum aliqua restrictione, & proinde sensu non omnino universali. Si primùm, indefinitæ illæ propositiones, quoad sensum penes eos, qui ipsas profecerunt, universales sunt; si secundum, merè tantùm particulares, & quidem profectò ex linguarum genio, & usu, hominès universalia judicia sæpissime, haud rarò tamen judicia merè particularia plus, minusve late patentia exprimere solent enunciationibus indefinitis. Ita Geometræ, ut de cæteris taceamus, ad axiomata sua universalissima exprimenda, proprietatesque figurarum significandas, quæ generatim absque ulla prorsus exceptione veræ sunt, voces, quibus universalitas designa-

natur, tacitè subintelligunt, & indefinitè loquuntur, ut cum ajunt: *Totum majus est sua parte; Circuli bifariam dividuntur à diametris; Trianguli supra æquales bases constituti, & ejusdem altitudinis, æquales sunt; pro omne totum majus est sua parte; omnes circuli bifariam dividuntur ab omnibus diametris; omnes trianguli, &c.*

Rursus, ad ea significanda, quæ non nisi cum aliqua restrictione, & limitatione vera putantur, loquendi formulæ indefinitæ sæpe ab omnibus adhibentur. Ita ex. gr. Epimenides de Cretensibus ait indefinitè: *Cretenses semper mendaces, mala bestia, pigri ventris.* Isocrates in panegyrico vocat indefinitè *Persas homines indolis corruptissimæ.* Herodianus *Lib. I. Cap. VI.* ait, *naturâ Barbari sunt divitiarum amantes; & ibidem, naturâ leve est Syrorum genus, & festorum amans.* Cic: *Lib. I. in Verrem* ait *Lampsacenos homines fuisse consuetudine, & disciplinâ levissimos.* Josephus ait de Pharisæorum secta, *Ant. Jud.: Lib. 63. Cap. 112.* *Pharisæi clementes sunt in pœnis.* Sallustius initio belli Catilinarii ita de priscis Romanis: *Fus, bonumque apud eos non legibus magis, quàm naturâ valebat; nimirum*

rum indefinitis hisce locutionibus memorati Scriptores significare volunt, quod verum esse putabant, non generatim omnino, sed tantum ut plurimum, frequenter, majori ex parte, adeoque cum limitatione quadam, & exceptione. Innumera sunt hujus generis penes Auctores exempla, quæ datâ operâ prætermittimus, ne longi nimium simus.

## §. I.

Non tantum autem indefinitæ propositiones adhiberi solent ad judicia tum particularia, tum universalia significanda, sed præterea ex usu Linguarum judicia mentis non prorsus universalia universalibus expressis vocibus per quandam hyperbolem, & emphasim passim enunciantur. Aliquando verò & contra judicia planè universalia locutionibus tantum particularibus exprimuntur. Hinc propositiones sapissime specie tenus, & ex vi verborum universales videntur, cum re ipsâ sensum arctiorem, ac verba sonent, complectantur, & quandoque enunciationes merè tantum particulares apparent, si attendantur voces, quibus conceptæ sunt,

& ad calcem literæ, ut ajunt, intelligantur, cum tamen judicia mentis planè universalia contineant, nisi grammaticæ vocum significationi, sed potius menti hominum, qui propositiones enunciant, ratio, ut par est; habeatur. Constat Criticis voces, *ex. gr. multi, & omnes*, promiscuè accipi à scriptoribus, ita ut aliquando pro *omnibus, multi*, dicant; id jam adnotaverat in Græcorum sermone Aristoteles de Poëtica; *Cap. 25.* Quid verò frequentius, quam locutionibus omninò universalibus ea emphaticè, & hyperbolicè exprimere, quæ ut plurimum tantùm, & frequenter contingunt, quæque generatim vera non sunt, nec putantur, sed dumtaxat pluribus in casibus, & cum aliqua exceptione, & restrictione? *Refertur saepe ad universos, quod sit per majorem partem*, ait ad rem nostram Festus in lege 160. de regulis Juris. Ita *ex. gr.* Apostolus ad Philippenſes, *Cap. II. v. 21.* *Omnes*, inquit, *querunt, quæ suæ sunt, non quæ sunt Christi Jesu*; hoc est, *plerique*. Idem Apostolus ad Romanos, *Cap. II. v. 36.* de Deo O. M. ait: *Ex ipso, per ipsum, & in ipso sunt omnia*; nimirum quæcumque ex divinâ naturâ esse possunt.

possunt, non generatim quæcumque eveniunt; nam scelera, & vitia ex Deo, per Deum, & in Deo non sunt. Eundem sensum complectuntur, quæ habet ad Ephesios, *Cap. I. v. 11. 23*; quæque Christus profert apud Johannem, *Cap. III. v. 32*, ait enim, *testimonium ejus nemo admisit*, hoc est, *perpauci admisere*. Ut autem & aliquod exemplum ex profanis scriptoribus petatum in medium afferamus, id tantum hîc animadvertimus Ethnicos scriptores passim *Omnes homines, totumque Orbem* gentes finitimas, & Romanorum Imperium nuncupare, ut videre est in Isocrate sub initium Panegyrici, & in Petroniano Fragmento de Bello Civili.

## §. II.

Et si autem certum sit homines sapissimè judicia merè particularia universalibus locutionibus exprimere, vel è contra, & tum universalia, tum particularia judicia indefinitis loquendi formulis efferre: tamen non æque facile est, imò, haud rarò difficillimum est dijudicare scriptorum mentem indefinitas propositiones adhibentium; & an enunciationes ex vi

D 3

ver-

verborum universales hyperbolico sensu acceperint, nec ne, seu cum aliqua restrictione, & limitatione intellexerint, nec ne. Ut errorem hisce in casibus declinemus, nimirum cum scire cupimus, cumque judicandum est, an ipse qui protulit, vel litteris consignavit enunciationem quampiam indefinitam, aut ex vi verborum universalem eam universalissimâ, latissimâque significatione acceperit, vel potius cum aliqua exceptione, inspiciendum est, an propositio illa, de quâ agitur, absurdum palmare complecteretur, si amplissimo, latissimoque sensu intelligeretur. Si constet absurdum planè, & manifestò esse, si universalissima significatione sumatur, tunc æquum est putare eum, qui enunciationem illam protulit, si sit mentis compos, sensum omnino universalem, atque adeò manifestò absurdum eidem non tribuisse, sed aliquam exceptionem admisisse, & hyperbolicè locutum fuisse. Quod si propositio indefinita, aut vocibus universalibus enunciata manifestum absurdum non complectatur, etsi universalissima significatio attribuatur eidem, tunc vel ipse qui eam protulit, & de quo quaeritur quàm amplam

plam

plam significationem enunciationi illi tribuerit, vel, inquam, is mentem suam aperire potest, vel secus. Si possit, expeditior, ac tutior via est ab eo sciscitari an enunciationem illam sensu plane universalis intellexerit, & quàm amplam significationem vocibus illis, quibus usus est, tribuerit animo. Si verò ab Auctore id quæri non possit, adeoque ejus mens aliunde investiganda sit, & assequenda, tum vel à testibus fide dignis, si qui sunt, addiscendum id est, vel à scriptis, & contextu ejusdem Auctoris eruendum. Quod quidem, ut quoad fieri potest assequatur, servandi diligentissimè sunt ii canones, quos trademus, ubi de Analiticæ methodi legibus ad solvendas cujusvis generis quæstiones accomodatis pro dignitate differemus. Quod si quod quæritur, certò, tutòque assequi non possimus neque ex testibus, neque ex scriptis, hisce in casibus nil pronunciandum est, & ad Scepticorum epocham, suspensionemve confugiendum, ne nimirum aliorum judicia, aliorum mentem perperam interpretemur, & scriptoribus, quas non habuerunt, ideas temerè adpingamus; quod crebrò nimis usu venit, dum auctores legimus,

& interpretes consulimus. Etenom passim peccatum hoc cujusvis generis interpretes, paucissimis exceptis admiserunt ; quod facili negotio, & multiplicibus exemplis manifestò ostenderemus, si id esset hujus loci. Cæterum non levis momenti est pluribus in casibus à mente scriptorum indefinitè loquentium, & voces universales, planèque genericas in judiciis suis enunciandis adhibentium non aberrare, atque adeò non levis momenti putanda sunt, quæ hoc capite tradidimus, præcepta, & monita.

## CAPUT VI.

*De judiciis veris, & falsis, deque veritatis criterio.*

JUDICIUM omne nostrum vel rebus ; circa quas versatur, conforme est, & consonum, vel à rebus, de quibus judicamus, dissonum, & disforme. Nil medium inter conformitatem, & discrepantiam à rebus, quæ judicia conformia sunt rebus, de quibus judicamus, vera appellantur, quæ autem à rebus, circa quas judicia nostra versantur, discrepant, falsa.



falsa dicuntur. Esto igitur, *ex. gr.* hoc mentis iudicium : *Jupiter circa Solem duodecim annorum spatio volvitur; Saturnus gyrum suum circa Solem triginta annis conficit* : si re ipsâ Jupiter eo tempore gyrum suum conficiat, si re ipsâ Saturnus triginta annis motum suum circa Solem absolvat, enunciata illa iudicia consona sunt, & conformia objectis, circa quæ versantur, adeoque ex allata iudicii veri definitione, vera sunt. Igitur tunc iudicium mentis verum est, cum attributum, convenire, aut non convenire dato cuiusdam subjecto iudicamus, ei reipsâ convenit, aut non convenit. Falsum verò est cum attributum, quod convenire ducimus dato cuiusdam subjecto, ei, reipsâ non convenit, quodque non convenire, aut discrepare ab aliquo subjecto iudicamus, non discrepat reipsâ, sed convenit, congruitque.

## §. I.

Jam verò pluribus in casibus tam vidè, tam perspicuè, tam manifestè cognoscimus attributum quoddam subjecto cuiusdam convenire, aut non convenire,

D 5

ut

### 38 RATIONALIS PHILOSOPHIÆ

ut ne minimum quidem ulterius ex animo suspicari possimus, aliter fortasse se rem habere; atque adeo pluribus in casibus certissimi sumus, planissimèque suasi de convenientiâ, & discrepantiâ attributi, & subjecti quarumdam propositionum, ita ut amplius liberi non simus ad dubitandum, an secus res sit. Id quisque experiri in se poterit, si *ex. gr.* ad hasce enunciationes advertat, earumque sensum probè perspiciat: *Totum majus est sua parte; Si ab aequalibus extensionibus æquas partes auferas, quæ remanent, sunt æquales; Quidquid agit, existit; Dolor à voluptate discrepat. Non potest quidpiam existere, & non existere simul, dum existit, &c.* Et sane quis uspiam est suæ mentis compos, qui hæc planè perspiciat, & in dubium ferri, & ex animo revocare id possit? immo quis non sentit cogi se ineluctabili vi ad assensum præbendum hujusmodi propositionibus? quis non sentit animo res aliter se habere nullo modo posse, ac in allatis propositionibus constituuntur. Præterea ubinam gentium, & locorum quis dubitat, aut potius dubitare potest de sui ipsius, affectionumque, & modificationum, quas sentimus animo, & experi-

ri-

rimur existentia? cujusmodi sunt, *ex. gr.* perceptiones doloris, voluptatis, odoris, saporis, sonitus, desiderii, timoris, iræ, &c. Igitur pluribus in casibus tam luculenter, perspicuè, manifestòque cognoscimus res quaspiam existere, & attributa quæpiam subjectis quibusdam convenire, vel secus, ut certissimi necessario jure evadamus, dubitandique libertatem, velimus, nolimus, amittamus omnino irresistibili vi, summæ, perfectissimæque perspicuitatis cogente. Ergo vividissima, omnibusque numeris absolutissima evidentia, ea nempe perspicuitas, quæ res ita monstrat, ut assensum nostrum ineluctabili vi evincat, quæ idcirco ne leviter quidem suspicari sinit, dubium quodvis perimit, tenebras omnes mentis luce sua fulgidissimâ discutit, hujusmodi, inquam, vividissima perspicuitas, quæ summa evidentia nuncupatur, veritatis criterion utique est: fac enim ea adsit, fac mentem illustret, fac ejus vim quis sentiat, jam certissimus quisque hominum evadit, vel invitus res ita se habere, non secus. Id autem, quod certos, tutosque nos facit, res ita esse, non aliter, attributum quodpiam cuiuspiam subjecto re ipsâ convenire,

aut

aut non convenire id ipsum est, quod veritatis criterion appellatur: adeoque jure, meritòque pronunciamus summam evidentiam hujusmodi criterion esse, quam quidem re ipsâ existere, & plurimis in casibus hominum menti reipsâ affulgere, ejusque ineluctabilem vim sæpe percipi jam superiùs ostendimus, & quisque per semet ipsum id sentiet, si attendat animo ad superiùs allatas propositiones.

## §. II.

Publicis prælectionibus nostris Scepticorum mentem jam exposuimus, eorum nempe, qui nil certi esse, & de omnibus dubitari posse, & dubitandum esse à sapientibus de omnibus defendebant. Eos generatim loqui per emphasim, & hyperbolem docuimus, at reipsâ neque de omnibus eos dubitasse, neque defendisse de omnibus omnino rebus absque ulla exceptione, & limitatione dubitari posse, & dubitandum esse; sed cum pronunciabant nil certi, & dubitandum de omnibus esse, id tantùm verum putabant, & docebant de iis omnibus, quæ à sophistis, & dogmatistis in disciplinis suis tradendis effutiebantur, quæ utique  
om-

omnia malè tuta erant, incerta, arbitrio conficta, temerè imaginata, proindeque pro veris non habenda, utpote quæ vel incertæ sensuum fidei, vel opinionibus planè dubiis, vel systematibus commentitiis, & hypothesibus ex arbitrio conceptis, malèque compactis innitebantur; Eos verò ex scepticis perpauçissimos, qui ipsammet evidentiam quasi malæ fidei in-  
simulare conati sunt, & veluti non tutam veri, falsique detectricem traducere impudentissimè nisi sunt, jam publice dicentes confutavimus, eosque id docere, & fortasse ex animo arbitrari docuimus, tunc temporis dumtaxat cum præsentissimam summæ evidentiae vim ineluctabilem non experiuntur, non sentiunt.

At fac adsit indomitis hisce, & effrenatis Pirronicis vividissima perfectæ evidentiae lux; jam ipsi, siquidem homines sunt, ut & cæteri ne minimum quidem suspicantur, assensum velint, nolint, præbent, certissimi evadunt, planèque omnino suasi. Cogimur enim evidentiam summâ; libertas cohibendi judicii, ubi adest vividissima perspicuitas, amittitur; nec ideo perfectissimæ evidentiae victas  
ma-

manus damus, quia ita lubet, sed quia non dare victas non possumus.

### §. III.

Cæterum ex propositionibus, quas vividissima evidentia monstrat veras esse, aut falsas, aliæ probationum opè veræ, falsæque evidentissime reteguntur, aliæ nulla indigent probatione, earumque veritas, falsitasque ex terminis ipsis patet luculentissimè. Hujus naturæ, *ex. gr.* sunt hæ propositiones; *totum quodcumque majus est sua parte; nihilum nihil producit*: in quibus attributum subjecto convenire per sese patet apertissimè, quin in dubium revocari seriò id possit. Hujusmodi enunciationes axiomata, prima principia, dignitates, propositiones indemonstrabiles, enunciationes simplicis intuitionis appellantur. Propositiones autem, quas evidentia evincit veras esse opè, & subsidio probationum, evidentes illationes, conclusionesque, sive enunciationes demonstratæ dicuntur.

Ut autem probandæ propositiones evadant certissimæ, planeque evidentes, duo requiruntur. Primò ut necessariò vincu-

lo adnexæ sint cum iis propositionibus, ex quibus inferuntur, ita ut ineluctabilis evidentia monstret veras necessario esse debere, si veræ sint eæ, ex quibus per consequens conficiuntur. Secundò ut enunciationes illæ, quibus aliqua propositio probanda est evidenter, nimirum illæ, ex quibus demonstranda enuntiatio per necessarium consequens inferenda est, sint certò, tutòque veræ; atque adeò necesse est ut vel sint axiomata, vel cum axiomatibus, primisve principiis evidentissimè adnexæ, ita ut irresistibili evidentia monstrante constet eas falsas esse non posse, quin per consequens falsa etiam sint axiomata certissima, clarissimaque principia, quibuscum adnexæ sunt, vel ex quibus inferuntur. Etenim si probanda propositio non sit evidentissimè adnexa necessario vinculo cum iis, per quas probatur, & ex quibus inferitur; aut si eæ propositiones, ex quibus deducitur, non sint certò, tutòque veræ, evidentia id monstrante, utique propositio probanda demonstrata non est, nimirum evidentia vividissima, & irresistibilis abest, adeoque non constat certò, tutòque eam veram esse, sed dubia remanet, & probanda.

Ve-

Verum de hisce fufius ubi de fynteticâ methodo , feu methodo demonftrandi verba faciemus.

#### §. IV.

Antequam autem ad alia gradum faciamus , quædam adnotanda hîc opportunè fefe nobis offerunt , atque ea quidem non levis momenti circa evidentes propofitiones.

Triplex ergo diftingui poteft evidentia ad fufpensionem iudicii determinandam , certitudinemque producendam accomodata ; alia Metaphyfica vocari poteft , Phyfica altera , tertia demum Moralis. Evidentia Metaphyfica eft fuma illa , vividiffimaque perfpicuitas , quâ cognoscimus datum quodpiam attributum dato cuipiam fubjecto ita convenire , vel fecus , ut plane ἀδύνατον , & impoffibile omninò fit , aliter fe rem habere , oppofitumque verum effe. Omnis autem propofitio hoc fenfu evidens , enunciatio evidentia Metaphyficæ nuncupatur.

Metaphyficæ ergo evidentia funt , *ex. gr.* hæ propofitiones : *quidquid agit , exiftit ; omnis numerus vel eft par , vel impar ;*  
ita



ita enim cognoscimus quidquid agit existere, omnemque numerum vel parem esse, vel imparem, ut perspicuissimè, manifestissimèque nobis pateat oppositum impossibile esse, fieri nempe nulla ratione posse, ut id agat, quod non existit, utque sit aliquis numerus, qui neque sit par, neque impar. Hujus generis sunt propositiones omnes à Mathematicis absolutissimâ demonstratione ostensæ, quarum oppositas veras esse nullo modo posse evidentissimè agnoscunt, quicumque mathematicas demonstrationes, ut par est, intelligunt.

Ejusdem etiam naturæ sunt pleræque propositiones, quæ à politioribus Metaphysicis traduntur.

Evidentia hæc metaphysica eadem illa est, de qua speciatim, & potissimum in hoc Capite huc usque locuti sumus, quæque omnium maxima est, & præstantissima, quippe quæ ita res monstrat, assensumque nostrum ita evincit, ut velimus, nolimus, irresistibilis omnino sit, & ne minimum quidem suspicari ex animo finit res secus fortasse se habere posse.

E §. V. E.

## §. V.

Evidentia autem Physica ea est, quæ luculentissimè mens percipit non esse quidem, aut non videri omninò impossibile datam quampiam propositionem aliquo modo, & aliquo in casu falsam esse, sed tamen ad hoc nil minus requiri quàm ut cognita quædam, perspectaque naturæ lex infringatur, & pervertatur. Propositiones, quæ hoc sensu evidentes sunt, Physicæ evidentix nuncupantur; cuius naturæ est, *ex. gr.* hæc enunciatio; *si duâ corpora, putate aurum, & æs, aequalis mole, & inæqualia pondere per aquam demissa simul dilabantur, quod gravius est, velocius descendet*; Evidentiæ, inquam, physicæ est hæc propositio; fieri enim aliqua ratione potest, putate Deo sic iubente, à quo motuum leges pendent omnes, ut æs auro velocius in allato sensu descenderet; cum id contradictorium, & absurdum æque non sit, ac contradictorium est, & omninò impossibile aliquid non existere, & agere, sive existere, & non existere simul. Attamen ut falsa esset allata propositio, ut nimirum æs auro  
ve-

velocius, vel æquè velox per aquam descenderet, oporteret ut leges motuum perverterentur. En quæ sint enunciationes physicæ evidentix innixæ. Hujusmodi sunt potissimæ, & præstantissimæ propositiones scientiarum physicarum; scientiæ enim physicæ nonnisi physicam evidentiam suscipere possunt.

Hujus naturæ enunciationes eamdem omnino vim assensui nostro non inferunt, ac eæ, quæ sunt metaphysicæ evidentix; tamen hasce in dubium revocare insanire esset, errare velle esset, & sese sponte omnium ludibrio præbere. Quis enim risu eum jure non exciperet, qui dubitare serio vellet, an nox sit adventura, rediturusque dies; an impositis stateræ æquicruri inæqualibus ponderibus, quod gravius est descensurum sit, quod verò minus grave sit ascensurum? Et ratio est, quia leges naturæ uni Deo obtemperantes nemo immutare potest, nisi ipsemet Deus; ejus autem sapientia est, quæ semel condidit decreta, quas semel constituit regulas non pervertere, nisi peculiaribus quibusdam in casibus, gravissimisque de causis, & ad brevissimum tempus. At hujusmodi autem portentosis,

sis, & inusitatis legum naturæ immutationibus Philosophi præscindunt. Leges igitur naturæ pro immotis, certissimis, & necessariis habendæ sunt, atque adeo quæ ex ipsis pendent, & oriuntur phænomena, effectusque. Quamobrem enunciationes, quæ à vero aberrare non possunt, nisi naturæ leges luculentissimæ manifestissimæque immutentur, & pervertantur, pro certissimis, tutissimisque habendæ sunt. Ex natura verò physicæ evidentix luculenter constat, non posse nos certa iudicia de physicâ propositionum evidentiam ferre, nisi compertissimæ nobis sint certòque cognitæ leges illæ, quibus naturæ opera conficiuntur. Quonam enim pacto pronunciare tutò quis poterit, aliquam enunciationem falsam esse non posse, nisi eversâ quâpiam naturæ lege, proindeque eam physicæ evidentix esse, si malè legem illam naturæ noverit, & in ea constituenda erraverit. Quænam autem sint veræ, tutæque naturæ leges, nostri non est hîc docere. Provinciam hanc, in præsentiarum, physicorum doctissimis relinquimus.

## §. VI.

Dicendum jam denique est de Morali evidentia. Hæc, propositiones tantum respicit, quæ circa actus, operave ab hominum voluntate provenientia respiciunt; tunc ergo Propositiones moralis sunt evidentia, cum evidentissimum, perspectissimumque est, ad hoc, ut falsæ sint, nil minus requiri, quam quis sanæ cæteroquin mentis id velit, & faciat, *primò* quod ei nullum animi, corporisve commodum, nulla voluptas aut certa, aut sperata, aut vera, aut imaginaria, aut præsens, aut futura suadet; *secundo* quod molestum aut sentit, aut putat, & timet.

Hinc *ex. gr.* si quis ex mendacio quodam, pœnas, aut probra subeunda sibi esse credat, vel timeat, nullâque voluptatis, & commodi sive veri, sive imaginarii ratione ad mentiendum excite-  
tur, moralis evidentia est, eum utique hoc in casu verum dicturum. Esto enim quis possit aliquid temerè velle, nullâ hujusmodi ratione suadente, ita ut stet pro ratione voluntas, etsi id quod vult, &

efficit sibi noxium, molestumque aut sentiat, aut futurum ducat, esto inquam id possibile sit, tamen quis non fatuus, quis non suimet hostis aliquid eligit, & efficit, quod nullâ commodi, aut voluptatis ratione sive vero consonâ, sive saltem pro verâ habitâ suadetur, quodque ex opposito malum sibi, & noxium esse, vel futurum fore putat, aut timet; unusquisque hominum suæ mentis compos hæc secum reputans, & semetipsum consulens probè agnoscit se nunquam ea velle, aut efficere, quæ nec esse, nec futura esse sperat, aut putat ullius commodi, aut voluptatis, quæque ex opposito prava, noxiaque sentit, aut scit, vel futura esse credit, timetque; Cum autem quisque in se id experiatur, id de se sentiat, cumque alii aliis id ipsum de se testentur, inde fit, ut enunciationes moralis evidentiae in omnium non delirantium, non stultorum animis certitudinem pariant. Et quidem profectò qui id generis propositiones veluti dubias seriò respiceret, sensu communi careret, & ab humanarum rerum sapientiâ quam longissime distaret, eosque, & sui, & aliorum hominum pudenda ignorantia teneret. Cæterum

nisi diligentissima adhibeatur mentis attentio, facile est, ea moralis evidentiae esse putare, quæ ab hujusmodi evidentiâ factis distant, cum obvium, facileque negotium non sit, evidentissimè, atque adèd certissimè deprehendere, an ea omnia datæ alicui enunciationi reipsâ conveniant, quæ moralem evidentiam constituent, quæque superius adduximus, ubi moralis evidentiae propositiones definivimus.

Constat autem cuilibet rem attendenti civiles historias posse aliquando ad moralem usque evidentiam ad summum assurgere, nunquam verò ad evidentiam physicam, aut metaphysicam. Etenim circa hominum gesta, dictaque, civiles historiae versantur: propositiones autem, quæ actus, operave respiciunt hominum, nonnisi moralem evidentiam suscipere possunt, nempe id generis propositiones probari ad summum possunt moralis evidentiae esse. Verum etsi aliquando demonstrari possit ad moralem evidentiam usque quæ ab historicis narrantur, vera esse, nimirum nec deceptos eos fuisse; nec decipere voluisse; tamen id ut plurimum satis probare minime possumus.

Atque hisce in casibus , quæ narrantur , non moralis quidem evidentia sunt , sed vel prorsus dubia , vel probabilia tantum , vel à verisimilitudine aliena.

Quæ vero toto hoc capite complexi sumus , animo revolvenda , recolendaque sunt ; quo quis enim ea profundius introspiciet , seriùsque meditabitur , eò solidiora , & præstantiora agnoscet , utilitatisque opinione majoris esse animadvertet.

## C A P U T VII.

*De Judiciis dubiis , verisimilibus , & à verisimilitudine alienis.*

CUM certitudo ab evidentia oriatur , ubi evidentia abest , ibi tuta certitudo absit , necesse est ; nimirum neque veritas , neque falsitas propositionum certò , tutòque percipi , & discerni potest , cum evidentia menti nostræ non affulget. Enunciationes igitur , quæ neque axiomata sunt , veritatesque simplicis intuitionis , neque è certis , turisque judiciis per necessarias consecutiones illatæ , aut omnio dubiæ sunt , aut virisimiles ,  
aut



aut falsitatis suspectæ , & à verisimilitudine aberrantes.

Dubiæ sunt proprie loquendo , quæ neque manifestò veræ , neque manifestò falsæ , neque verosimiles , neque inverosimiles sunt. Postquam ergo explicaverimus quid sit verisimilitudo , quid inverisimilitudo , statim per sese constabit quænam sint enunciationes planæ omnino dubiæ.

Magni autem usûs , & utilitatis est verisimilitudinis , seu probabilitatis , & inverisimilitudinis naturam noscere , atque adeò earum certa indicia , & characteres constituere ; plurimi enim interest , quæ probabilia sunt , ab iis , quæ falsitatis suspecta sunt , certâ ratione dijudicare , & quæ magis , minusve verosimilia sunt , quæque magis , minusve à verisimilitudine absonæ sunt , invicem discernere , cum in hoc potissimum sita , ac posita sit ars vitæ , & tum privatarum , tum publicarum rerum prudens regimen , sapiensque administratio. Et sanè in negociis gerendis , & usu vitæ , rarò ducem sequi possumus perspicuissimam evidentiam , cum rariùs , ac vulgus hominum putat , hæc nobis præsto sit ; sed contenti esse

debemus majori probabilitate, & ea eligere, ea prosequi, quæ verosimiliora sunt, quæque probabilius reliquis meliora, tutiora, utiliora videntur. Age verò probabilitatis caractères, & notas tradamus.

Duplex ergo in primis distinguenda est probabilitas, alia, quæ propositionibus hypotheticis convenit, altera, quæ competit enunciationibus *Facti*. Propositiones hypotheticas eas vocamus, quæ hypothesim quampiam continent, nempe in quibus id, quod ponitur, quod constituitur, non est quidpiam compertum, & certum, sed aliquid à mente imaginatum, à mente efformatum, confictumque in eum finem, ut explicari possit, quonam pacto, qua ratione, data quædam phænomena, & eventus, seu data quædam naturæ facta fieri possent, & fortasse fiunt. Ita, ex. gr. hypothetica hæc propositio; *in maris fundo existit philerum quoddam, per quod particule aquæ insinuari possunt, non verò salina, & bituminosa*: hæc, inquam, propositio hypothetica est, neque enim quod in ea continetur, quidpiam est certi, & comperti, sed imaginarium est, & à mente confictum quo-

quorundam philosophorum, qui putantes fontes oriri ab aqua maris, quæ amara est, & falsa, non ab aquis pluviis quæ dulces sunt, imaginarium illud philtrum excogitati sunt, ut explicarent quomodo aqua marina dulcescat, & terræ viscera è mari subeat effceta salibus, & bitumine, quibus infecta est.

An hypothesis hæc verisimilis sit, an potius falsa, & absurda, hic non quærimus; sed eam in exemplum tantum attulimus hypotheticarum propositionum, ut clariùs appareat, quid enunciationis hypotheticæ nomine, intelligamus. Verum eæ quoque enunciationes, quæ ex hypotheticis dimanant, & inferuntur, hypotheticæ nuncupari possunt, cum hypothesis alicui innitantur, & propositiones illatæ, & deductæ earum naturam sequantur, à quibus inferuntur, & per consequens conficiuntur.

Propositiones autem *Facti* eas omnes vocamus, quæ hypotheticæ nullatenus sunt, sed circa ipsamet Phænomena, ipsosmet eventus, causarumque quarumvis facta, naturæque opera versantur. Hinc omnis propositio non hypothetica, quæ asserat, negetve aliquid vel extitisse, vel

vel existere, vel futurum fore, propositio facti appellanda est, sive id asserat, negetve de substantiis, seu modificationibus, seu relationibus; ad quæ quidem tria genera res universæ referri possunt, ut docuimus capite primo, & in quæ rerum genera quodcumque compositum mentis objectum resolvitur.

## §. I.

Definitis jam propositionibus hypotheticis, & propositionibus Facti, constituenda primum nobis est ejus verisimilitudinis natura, quæ competit hypotheticis enunciationibus.

Essentia igitur, ut ajunt, verisimilis hypothesis, atque adeo hypotheticæ propositionis, in tribus hisce conditionibus sita est; primò ut hypothesis nil manifestò absurdi, & apertè falsi complectatur; secundò ut non constet, ex ea quidpiam necessariò sequi, quod cum cognitâ quâpiam veritate pugnet; tertio ut pateat luculentissimè, eâ positâ, illa omnia per necessarium consequens fieri debere, ad quorum originem explicandam hypothesis concepta est. Si aliqua ex his-

hisce conditionibus alicui hypothesi defit, omnis ejus verisimilitudo corruat, necesse est.

Ex propositionibus autem hypotheticis verisimilibus, aliæ aliis sunt, aut esse possunt verisimiliores, & eæ quidem verisimiliores sunt, pro quibus stant plura veritatis indicia, nimirum quæ magis analogæ sunt, magisque conformes, & consonæ cum aliis veris propositionibus, quæque conjuncta sunt cum pluribus ex iis circumstantiis, ex iis attributis, quæ veritatem comitari, & cum veritate juncta esse solent. *Ex. gr.* Si duabus ex hypothesibus, quæ in cæteris pares, alia simplicior sit, & luculentior, eaque positâ facilius, & planius explicetur, quomodo fiant Phænomena illa, & facta, ad quorum originem rationemque explicandam excogitata, & imaginata est; altera verò hypothesis implexa magis sit, & eâ positâ difficilius explicetur, quonam pacto fieri possent eadem illa phænomena, eadem illa facta, ad quorum originem explicandam conficta à mente est; verisimilior ea est, quæ simplicior, quàm quæ implexior est. Et ratio quidem est, quia sapientiæ rerum omnium con-

## 78 RATIONALIS PHILOSOPHIÆ

conditoris magis consonum, & conformius est simplicissimâ, & quam fieri possit expeditiori viâ ea producere, quæ contingere, & fieri cognoscimus, prætereaque hypothesis simplicior magis analogâ, & conformior est cum cognito naturæ ordine; quæ enim circa phænomenon, & eventuum originem certa, compertaque Philosophis sunt, satis monstrant naturam operâ suâ efficere, & vel mirabiliora phænomena conficere ex vi simplicissimarum regularum, & viâ omnium, quæ concipi possunt, expeditissimâ. Rursus, si ex duabus hypothesis altera obnoxia sit difficultatibus solutu facilioribus; altera verò difficultatibus aut inextricabilibus, aut solutu difficilioribus, verisimilior ea est, quam leviores difficultates oppugnant. Et ratio quidem est, quia hæc circumstantia, hoc attributum cum veritate conjunctum esse solet, aut nulla inextricabili, aut solutu difficili objectione oppugnari possit.

Ex hac autem de majori, minorique verisimilitudine propositionum hypotheticarum doctrinâ, sequitur, eum, qui plenius, perfectiusque, genuinum naturæ ordinem, & praxim nescit, quique pro-

probè scit, quænam circumstantiæ, quænam attributa cum veritate conjuncta esse soleant, tutiorem esse, & æquiores judicem majoris, minorisve verisimilitudinis enunciationum hypotheticarum.

Duplici autem ratione hypothetica enuntiatio naturam verisimilis amittere potest; nimirum, si vel certò, tutòque vera, vel certò, tutòque falsa evadat. Falsa evincitur primò, quoties directe assequimur phenomenon, effectuumque illarum veram causam, ad quarum originem explicandam imaginata hypothesis falsò fuerat. Secundò falsa evincitur, quoties aliqua ratione agnoscimus, & retegimus, ex ea quidpiam inferri per necessarium consequens, quod veritate cuiuspiam contradictorium sit; atque adeò omninò falsum, ex quo, jure, meritoque conficitur hypothesis ergo illam falsam esse, eum ex vero falsum sequi minime possit: atque fors hæc quàm plurimis Philosophorum potissimum veterum hypothesebus contigit, quæ manifestò falsæ à recentioribus demonstratæ sunt. Veræ autem evincuntur hypotheses, & incertæ, tutæque thesis naturam transformantur, cum certissima quædam experi-

men-

### 30 RATIONALIS PHILOSOPHIÆ

menta, aut evidentissima demonstratio manifestò evincunt facta illa, & phænomena, ad quorum originem verisimili ratione explicandam imaginata fuerat data. quæpiam hypothesis, re ipsâ ita fieri, ut in hypothesis imaginatum fuerat. Ita, *ex. gr.* olim mera hypothesis, Planetas primarios volvi circa Solem, non circa Terram, hodie thesis est inter Astronomos certissima.

Cæterum cavendum, ne integrum animi assensum propositionibus hypotheticis ut ut verisimilibus præbeamus: esto explicent luculentissimè ea phænomena, ad quorum originem explicandam excogitatæ sunt, esto nullum aliud phænomenon eam falsi insimulet, esto instantiis omnibus satisfaciant, nullaque eis negotium faceffat difficultas, semper tamen donec hypothesis naturam non mutat, decipere potest, adeoque cum nulla urgeat necessitas hypothesis plenum assensum præbendi, non est eis ex integro assentiendum, sed de earum quacumque suspicandum est, ne à vero aberraret, quousque demum experimenta luculentissima evincant, aut ratio evidens demonstret, hypothesis illam nullatenus à vero deflectere,



tere, & pro thesi certissimâ, citra omne erroris periculum habendam esse.

## §. II.

Deveniendum jam nobis est ad verisimilitudinis naturam constituendam, quæ convenire non potest, nisi propositionibus *facti*, quas superius definivimus. Propositiones igitur *facti* tunc verisimiles sunt, cum vel rationes, quibus probantur, plerumque in errorem, iisdem in casibus non inducunt, vel cum constat propositiones eis similes similibus in casibus plerumque veras esse.

Ex his autem propositionibus *facti*, quæ verisimiles sunt, aliæ aliis sunt verisimiliores, & eo quidem alia aliis verisimilior est, tum quo rariùs rationes, quibus innititur, & probatur, iisdem in casibus in errorem inducunt, tum quo frequentius, frequentiusque, propositiones eis similes similibus in casibus veræ sunt. Exemplis rem illustremus.

Ex allatâ ergo verisimilitudinis definitione, quæ propositionibus *facti* convenit, verisimilis erit hæc enunciatio: *Futura æstas nostris hisce regionibus minus*

F

plu-

## 82 RATIONALIS PHILOSOPHIÆ

*pluvia erit, quàm ver*; frequenter enim pluit copiosius verno tempore, quàm æstivo. Secundò verisimilitudinem mediocri majorem habet hæc enunciatio: *Belli Italici victores evadent exercitus numerosiores*; cum enim bellica acierum hinc inde pugnantium virtus, sat proximè par est, & fermè æqualis, sapientia ducum, longè frequentius vincunt, quàm vincantur, qui numero hostiles excedunt opes. Tertiò majorem etiam verisimilitudinem habet, *ex. gr.* sententia illa Poëtæ; *Naturam expellas furcâ, tamen usque recurret*: nempe indolem, firmissimasque animi habitudines expellas, quâ poteris industriâ, attamen eas non extinguēs, & sane vix unquam oppositum contingit. Ejusdem ferè verisimilitudinis est & hæc enunciatio: *Nullum fulmen intra biduum, triduumve hic pertinet*; nam rarissimè propositiones huic similes falsæ sunt.

Denique ad supremum verisimilitudinis gradum ascendere videtur quælibet propositio, quæ circa res versetur sensibus obvias, cujus falsitas, si falsa sit, facillimè, certissimèque deprehendi à quocumque possit, & cujus publicè fidem faciat vir quispiam honesto loco natus,

tus, & liberaliter educatus, ad supremum, inquam, verisimilitudinis apicem assurgere videntur id generis propositiones, quia nimirum hâc ratione probantur, vir honestus, & liberaliter educatus, cæterorum probra, contemptus, cachinnos ægerrimè fert, atque adeo ea non asserit, ea non testatur, quæ falsa esse scit, & ab omnibus facili negotio falsa esse deprehendi posse probè noscit, ne videlicet turpis mendacii reus arguatur, & fannis, probrisque à fociis, & civibus excipiat, quæ quidem ratio vix unquam profecto fallit, proindeque enunciatio ejusmodi rationi innixa verisimillima est, ac, si ejus fidem faciant plures honesti testes & liberales homines, ad moralem usque evidentiam pervenit.

Cæterum quædam sæpe sæpius contigisse, aut futura fore, quàm secus, vel certâ, tutâque ratione assequimur, quæ demonstret, oppositum frequenter fieri minimè posse, vel tantùm experienciâ, quæ evincat quædam frequentius, vel sæpe sæpius fuisse, aut esse, atque adeo conjicere id ipsum faciat de futuro. Exemplo res clarior fiet.

Scimus igitur, *ex. gr.* frequentius ho-

mines omnes, habitudinibus suis indulgere, & juxta mores suos agere, quàm secus, atque id scimus suadente ratione, quia nimirum quod plurimum molestum, incommodum, difficile est, humana natura abhorret, refugit, atque adeò sæpiissime non amplectitur; ita enim facti, & comparati sumus omnes; molestum autem est, incommodum difficillimum contra firmas habitudines, contra inveteratos mores agere; igitur longè frequentius facta, dictaque hominum conformia sunt moribus, & habitudinibus animi, quibus afficiuntur, quàm ab eis disparia, & difformia.

Rursus probè scimus, aut scire possumus, quinam eventus frequentius occurrant, qui rariùs in ludis sortium, alearum, tesserarum, & generatim in ludis omnibus, qui à fortunâ pendere dicuntur; idque scimus, aut scire possumus non experienciâ tantùm, & observatione, sed & rationibus certissimis tutissimisque, quibus ostendi potest quænam frequentius, quæ rariùs contingere debeant, ita ut aliter se res habere non possit, atque adeò collusorum fors metiri potest, & quæ major sit, quæ minor, & quantum altera al-

alteram excedat certò assequi; quod jam pluribus in ludis, plurimisque in casibus confecere viri longè doctissimi Leibnitius, & Bernullius, in suâ conjectandi arte.

E contra sciunt homines gemmas, *ex. gr.* ut plurimum intra certos quosdam exiguæ magnitudinis, & ponderis limites contineri; id ipsum contigisse superioribus ætatibus eos non latet; at cur ita res sit, cur ita fuerit, ignorant, id experientiâ tantùm compertum eis est, idemque futurum fore conjiciunt ex vi tantùm præreritæ experientiæ, cum nulla eis adsit certa ratio, quâ assequantur, cur ut plurimum gemmæ majores mole non sint, & cur non possit oppositum evenire frequentius.

Id probè intellecto, & constituto, sequitur verisimilitudinem earum rerum, de quibus certâ, tutâque ratione ostendi potest, non posse non frequentius, non sæpe sæpius evenire, immutabilem esse per omne ævum, eandem futuram esse & de eâ manifestò constare posse, an ubique etiam gentium, & locorum eadem sit, & ubinam sit eadem; cum enim patet ratio, quâ sit, ut hæc potius, aut illa frequentius contingere debeant, quam

opposita , facilè dijudicamus , an ubicumque eadem ratio valeat , & ubinam valeat.

Verisimilitudo autem earum rerum , quas frequentius contingere ab experienciâ scimus , at ignoramus , cur sæpe sæpius eveniat , & cur non eveniat potius oppositum , hujusmodi , inquam , verisimilitudo an immutabilis sit , nec ne , an ubique locorum eadem sit , & ubique temporum sit futura ignoramus , ita ut suspicari liceat fortasse alibi rariùs , quæ penes nos frequentius contingere , nuda , ac sola experientia nos docet , & forsitan in posterum non fore frequentius evenitura , quæ nunc frequentiora esse scimus ex solâ experienciâ.

Fac , *ex. gr.* sciamus , experienciâ docente , medicamentum quodpiam , nostris hisce regionibus ad morbum aliquem sanandum , ut plurimum conferre , at fac etiam hujus phænomeni , effectusve rationem ignoremus , hoc positò , quis tutò discernere poterit idem hoc medicamentum in similibus morbis penes alias gentes æquè ac penes nos , ut plurimum conferre ? quasi ex vero rerum ordine , & combinatione consequi non posset , ut quæ

quæ hic sæpe profunt, alibi non profunt, aut nunquam.

Rursus fac sciamus, experientiâ solâ id monstrante, regionem quampiam sæpe sæpius terræ motibus concuti, quis certò scire poterit semper in posterum id ipsum fore ibi futurum? quasi prima, & radicalis ratio, quâ frequentia illa motuum contingit, non posset ex vi ordinis rerum, è medio, tractu temporis tolli, atque adeò frequentes illos telluris motus extinguere.

Hujusmodi autem immutationes rerum haud rarò contigisse pluribus exemplis à philosophicâ historiâ petitis possemus ostendere, si id necesse esset, sique nobis non esset ad alia properandum. Id tantùm ita hîc opportunè adnotasse sufficiat; nimirum ex his, quæ quis frequentius in aliquâ regione, & à dato quopiam tempore contingere scit, at rationem ignorat, quâ fit, ut frequentius contingat, non esse temerè arguendum ad alias regiones, & ad alia sæcula.

Qui hanc cautionem sedulò non servant, sæpenuerò decipiuntur; sæpe enim reipsâ quæ alibi frequentissima,

alibi aut rarissima, aut physicæ impossibilitatis, nimirum contra naturæ leges sunt. Quid communiùs, *ex. gr.* intra Zonas temperatas, quàm ut aqua per hibernum tempus aliquando gelu concreseat? attamen vastissimæ sunt provinciæ, in quibus aqua nec in glaciem unquam abit; nec abire unquam poterit, nisi omnis naturæ ordo pervertatur.

Sexcenta hujusmodi exempla afferenda sese offerunt, quæ datâ operâ prætermittimus; satis enim id persuasum putamus ex his, quæ diximus, videlicet, cum certa ratio nos latet, quâ fit, ut alicubi quædam frequentius, quædam rariùs contingant, non esse hinc temerè arguendum eadem ubique gentium, & locorum frequentiora, aut rariora ex æquo esse, semperque futura fore. Quod quidem diligenter animadvertendum est; res enim non est levis momenti, si velimus in judicando de rerum verisimilitudine non errare.



## CAPUT VIII.

*De Ratiocinatione in genere.*

**U**T Ratiocinationis natura penitus intelligatur, præmittenda nobis sunt hæc axiomata.

Primò, datis tribus; pluribusve rebus; si secunda conveniat cum primâ, tertiâ cum secundâ, quarta cum tertiâ, &c. prima etiam, & postrema conveniunt inter se: ita, *ex. gr.* si spatium *A* æquale sit figuræ *B*, figura verò *B* æqualis sit corpori *C*, & corpus *C* congruat cum vase *D*; spatium *A*, & vas *D* congruunt inter se.

Secundò, datâ serie trium, pluriumque quarumcumque rerum, si inter primam, & secundam aliquod connexionis, & convenientiæ genus intercedat, inter secundam verò, & tertiam, vel inter tertiam, & quartam, &c. sit aliquod genus oppositum discrepantiæ, prima, & & postrema discrepant inter se. Et idem contingit, si prima discrepet à secundâ, secunda verò non discrepet, sed conveniat cum tertiâ, aut tertia cum quartâ.

90 RATIONALIS PHILOSOPHIÆ

In hoc enim etiam casu prima, & postrema invicem discrepant, ita ut de primâ negari postrema possit. *Ex. gr.* si motus *A* æqualis est motui *B*, motus verò *B* non æqualis, sed duplus est motus *C*, motus *A* discrepat à motu *C*, & negari potest ejus æqualitas cum motu *C*; vel è contra, si motus *A* non æqualis, sed duplus, *ex. gr.* si motus *B* motui *B* sit æqualis, atque aded conveniat cum motu *C*, motus *A* non æqualis, sed duplus est motus *C*, & negari potest ejusdem cum motu *C* convenientia.

Hæc axiomata, omnesque sensus, quos continent, paucis hisce complecti possunt verbis, & ita generatim exprimi, datis tribus, pluribusve rebus quibuscumque, tribus nimirum, pluribusve objectis quibuscumque mentis nostræ.

Si constet quænam relatio intercedat inter primum & secundum, secundum & tertium, tertium & quartum, &c. statim si animus ad rem attendat, ei constabit an aliqua, & quænam relatio inter primum, & postremum ex hisce objectis intersit.

Rursus data serie trium, pluriumve objectorum nostræ mentis, si pro vero ha-

habeatur, datas quasdam relationes intercedere inter primum & secundum, secundum & tertium, &c. Hinc necesse erit colligere, si animus ad rem attendat, quod ergo dari debeat inter primum & postremum ex illis objectis certa quædam, & determinata relatio, non alia quæpiam dispar, & opposita. *Ex. gr.* si ponatur inter  $A$   $C$   $B$  &  $X$  hasce relationes intercedere, ut nimirum  $A$  duplum sit  $C$ ,  $C$  verò duplum  $B$ , &  $B$  æquale  $X$ , hoc posito, si attendatur quænam igitur relatio intercedat inter  $A$ , &  $X$ , statim constat  $X$  esse quartam partem  $A$ , & inter  $A$  &  $X$  eam idè relationem intercedere, quæ inter quatuor & unum interest, seu relationem quadrupli, aut unius ad quartam sui partem; & siquidem datæ illæ relationes inter  $A$  &  $C$ ,  $C$  &  $B$ ,  $B$  &  $X$  veræ sint, vera etiam erit detecta illa relatio inter  $A$  &  $X$ , quæ necessariò consequitur ex positis illis prioribus relationibus inter  $A$   $C$   $B$  &  $X$ . Si verò priores illæ relationes, aut aliqua falsa sit, falsa etiam erit relatio hac ratione inventa inter  $A$  &  $X$ .

Quod si pro veris habeantur, & non sint veræ relationes illæ, pro verâ etiam  
per

per necessarium consequens habebitur; vera tamen non erit relatio inter  $A$  &  $X$  inde collecta, & deducta; & è contra, si pro falsis habeantur omnes, aut aliqua ex prioribus illis relationibus, cum tamen sint veræ, pro falsâ etiam necessario habebitur, quamvis, reipsâ, vera sit eadem illa relatio inter  $A$  &  $X$  ex prioribus illis deducta, & ratio est, quia datâ serie quarumcumque trium, pluriumve rerum, datisque certis quibusdam relationibus inter primam & secundam, secundam & tertiam, tertiam & quartam, &c. si hisce relationibus positâ, mens animadvertat an aliqua, & quænam ergo inde relatio consequi debeat inter primam & postremam ex tribus illis, pluribusve rebus, statim evidentia vividissima & ineluctabilis manifestissimè id monstrat, ut allato exemplo quisque experiri potest.

Hisce constitutis, datâ serie quâvis trium, pluriumve objectorum nostræ mentis, positisque relationibus inter primum & secundum, secundum & tertium, tertium & quartum, &c. actus ille mentis, quo animadvertit, & advertendo percipit, quænam ergo relatio per  
ne-

necessarium consequens intercedat inter primum & postremum ex illis objectis animi, actus, inquam, hujusmodi propriissimâ significatione ratiocinatio nuncupatur, & actum illum efficere, ratiocinari, seu conclusionem deducere, aut illationem, consecutionemque inferre dicitur.

Quandoquidem igitur datis, *ex. gr.* tribus mentis nostræ objectis quibuscumque ex relationibus, quæ intersunt, aut interesse ponuntur inter primum & secundum, secundumque & tertium, colligimus cum ratiocinamur, quænam ergo relatio inter primum & postremum per necessarium consequens interesse debeat; idem erit ratiocinari, ac judicium aliquod ex aliis judiciis inferre; idem enim est certum ducere, datam quampiam relationem inter data quæpiam objecta mentis intercedere; idem, inquam, est, ac judicare, nimirum idem est ac persuasum habere; datum quodpiam attributum dato cuiuspiam subiecto convenire, vel secus: *ex. gr.* idem est ex datis positivæ relationibus æqualitatis inter *A* & *B*, & inter *B* & *C* inferre, quod ergo etiam inter *A* & *C* eadem relatio æqualitatis detur, ac judicare, quod

quod ergo subjecto *A* attributum æqualitatis cum *C* conveniat, ex eo quod iudicemus *A* esse æqualem *B*, & *B* æqualem *C*, atque adeò patet, homines aliquod iudicium ex aliis iudiciis deducere, cum ratiocinantur.

Cæterum potest utique ratiocinatio recta esse, & simul falsa; satis enim differt rectitudo à veritate ratiocinationis. Omnis quippe vera ratiocinatio est etiam recta, at non omnis recta ratiocinatio est vera. Ad hoc ut recta sit satis est, si ex positis præmissis, illatio inde deducta per necessarium consequens sequatur, ita ut non possit ex præmissis illis iudiciis non sequi, nec possit falsa esse, si veræ sint præmissæ propositiones, ex quibus consequitur. Igitur, fac aliqua ex præmissis falsa sit, jam ipsamet quoque consecutio, cum ex falso consequatur, nisi falsum, ut jam superius innuimus, ipsamet, inquam, conclusio falsa erit, quamvis per necessarium consequens ex ipsis illata sit, quamvis sit cum præmissis propositionibus evidentissimo, & necessario vinculo adnexa, ita ut illis positis, non possit illatio illa non sequi.

Ut ergo conclusio vera sit, non fat  
est,

## INSTITUTIONES. 23

est, ut recta sit, & à præmissis evidentissimè consequatur, sed ulteriùs requiritur, ut præmissæ enunciationes adeòque judicia, ex quibus deducitur, vera sint. Ex his autem, quæ huc usque de ratiocinationis naturâ docuimus, patet præmissas conclusionis rationes, probationesve continere: infertur enim ex præmissis, & quidquid asseritur in consecutione, ex vi præmissarum asseritur, & quia præmissæ id monstrant, id evincunt, quod deducitur ex ipsis, nimirum quod in conclusione continetur. Hinc autem manifestò liquet hæc maximi momenti consecutio, nobis esse quàm diligentissimè à falsis principiis falsisve præmissis cavendum, si veras conficere ratiocinationes volumus, atque adeò incompertam veritatem ope ratiocinationis retegere; quandoquidem, si aliqua ex his enunciationibus, ex quibus aliquid deducimus, falsa sit, & pro verâ habeatur, quidquid inde infertur, falsum est, verumque ducitur.

Eâdem ratione, si qua ex præmissis propositionibus dubia sit, aut verisimilis, aut falsi suspecta, ipsamet conclusio inde illata, & cum præmissis hujusmodi

96. RATIONALIS PHILOSOPHIÆ  
necessariò connexa, nonnisi dubia erit;  
aut verisimilis, aut falsi suspecta.

## C A P U T IX.

*De potissimis errorum causis, aut  
occasionibus.*

**V**Idimus jam quid sit judicare, quid  
ratiocinari, quid veritas, falsi-  
tas, dubietas, verisimilitudo, & inveri-  
similitudo judiciorum, & ratiocinatio-  
num mentis. Differendum superest, cur  
tam sæpe homines in errorem incidunt in-  
tèr judicandum, ratiocinandumque de  
rebus, quâve ratione veritas investiganda  
sit, ut assequatur, & ostendenda, de-  
monstrandaque sit, ut cæterorum erro-  
res, aut præveniamus, aut emendemus.

Primò igitur retegendæ nobis sunt, &  
ob oculos exhibendæ potissimæ, & gene-  
rales errorum causæ; aut potius occasio-  
nes falsa judicia ferendi, falsasque ratio-  
cinationes conficiendi.

Prima, latissimèque patens errorum  
ocasio sunt ipsæmet Ideæ nostræ, &  
quidem tum illæ, in quibus efformandis  
intercidit nulla mentis operatio, tum eæ,  
quæ



quæ à mente pro arbitrio efformantur, & conficiuntur. Solemne est homines passim ex Ideis suis de objectis ipsis judicare, atqui è contra passim non ita se res habent, ut nobis apparent, & ut eas percipimus.

Ostendemus primò id verissimum, ad illud Idearum genus quod attinet, quæ per sensus acquiruntur, quæque à mente non efformantur. Rarò igitur, aut ferè nunquam homines putant hujusmodi Ideas rebus ipsis non respondere, non satis conformes esse; de objectis sensibilibus ita judicant, ut ea percipiunt, ita se res habere ducunt, ut eas sensus repræsentant, & ibi nil esse arbitrantur; ubi nil per sensus percipiunt, quasi id non existat, quod sensus non afficit; Attamen sæpissime res non sunt cujusmodi sensibus nostris videntur; sæpissimè enim sensibus nostris ea in objectis esse apparent, quæ in ipsis non sunt, ea non apparent, quæ reipsâ continent, quæque reverâ existunt. Demonstrabimus id primò de sensu tactûs, qui non uni, alterive tantum ex membris nostris pertinet, ut cæteri sensus, sed per omne corpus æquabiliter fusus est. Ostendemus nempe plures Ideas per tactum acquisitas non satis conformes esse

rebus ipsis, quæ per tactum dignoscuntur, nobisque idcirco pluribus in casibus errandi occasionem præbere in judicando de rebus tactui obnoxiiis, & per tactum perceptis.

Seligamus, & ad examen revocemus, inter cæteras Ideas per tactum acquisitas, Ideas gravitatis corporum, resistentiæ, quâ cæterorum motui corpora obstant, asperitatis, ac levitatis superficierum corporum, ac denique caloris, & frigoris, ut inde cuique constet quàm hujusmodi Ideæ à vero discrepent, & quænam falsa judicia de rebus ferantur, si ita se res habere putemus, ut eas tactus repræsentat. Jam verò ad Ideas gravitatis, quod attinet, seu nisûs, conatûsve corporum deorsum descendendi, animadvertendum primò occurrit, nisum illum aut vim illam deorsum urgendi, quam experimur in corporibus, dum corpora aliquod ex membris nostris comprimunt, aut trahunt, non integram vim esse, non integrum momentum, quo reipsâ gravia corpora pollent; atque adeò eos decipi, qui putant experiri se, quidquid ponderis in corporibus est, dum iis premuntur, aut trahuntur.

Evincitur id facili negotio: etenim  
cor-

corpora gravia intra aliquod fluidum constituta sunt, & intra ipsum descendere nituntur, siquidem fluidum & ipsum grave fit qualis profectò aër est, non integra, ac plena vis gravitatis, quâ pollent, percipitur, sed eorum corporum pondus, minus apparet.

Jam verò aërem gravem esse patet experimentis apertissimis, *ex. gr.* si vas aëre evacuetur, minus ponderat, quam si plenum esset; prætereà aër gravitate suâ intra tubos cujusvis diametri Mercurium vitruddit ad triginta usque digitorum altitudinem circiter, & in eis ad memoratam illam altitudinem suspensum detinet; aquam in anthliis, ut ut amplissimis impellit ad triginta duorum pedum altitudinem circiter, ibique sustinet contra nitentem, & deorsum urgentem; tandem aëris moles quælibet cum æquali mole aquæ comparata, minus gravis est pari illâ mole aquæ octingentis quadraginta vicibus, & Edmundus Hallejus ostendit in Ephemeridis philosophicis Anglicanis ad Annum 1686. Mense Majo, non quadringentis tantum vicibus, ut Galilæus existimavit.

Hinc autem manifestò constat aërem reipsâ

gravitare : cætera omittimus , quæ in hanc rem facile afferri possent ; sunt enim satis nota & à physicis quibusvis politioribus discere quisque potest. Fluida autem gravitate prædita actionem corporum gravium intra ipsa constitutorum , quæque per ipsa descendere valent , aliquatenus minuer mathematicis demonstrationibus , & experimentis tutissimis hydrostatici demonstrant ; si enim lanx , impositis hinc inde æqualibus ponderibus , in æquilibrio constitutatur , & una ex crateris cum imposito pondere intra aquam immergatur , crateræ illius , & ponderis actio statim minuitur , oppositaque lancis pars , quæ in aquam immersa non est , præponderat. Rursum , si quis aliquod pondus , putate auri libram filo alligatam manu sustineat , & mox intra aquam , aliudve fluidum idem pondus immergat , statim percipitur actionem ponderis illius satis diminutam esse , & magis , magisque minui , quo gravius , graviusque est fluidum , in quod memoratum pondus immergitur. Minuitur igitur plus minus ponderum actio , cum intra fluidum aliquod grave constituta sunt ; atqui aër gravis est , ut docuimus , & intra ipsum constituta sunt gravia

via quælibet, quæ nos comprimant, aut à quibus trahimur; igitur eorum vim integram nunquam experimur, sed diminutam, & quidem tantundem diminuta percipitur, quantum ponderat moles aëris æqualis corpori illi, quo comprimimur aut trahimur. Demonstrant enim hydrostatici & experimenta evincunt, fluida corpora gravia tantundem detrahère actioni gravitatis eorum corporum quæ intra ipsa constituta sunt, & per eadem descendere valent quantum ponderat moles fluidi æqualis moli corporis in ipsum immersi, & quod per ipsum descendere valet. Putandum igitur non est ex tactûs nostri auctoritate, & fide, gravia corpora eâ tantum vi prædita esse, quæ membris nostris apparet.

Ideæ igitur omnes ponderis, aut momenti deorsum urgentis, peculiarium corporum ope tactûs acquisitæ, vero satis non respondent; quandoquidem vis gravitatis cujusvis corporis minor semper apparet, ac re ipsa sit, ut ex his, quæ diximus, patet.

### § I.

Secundò, manifestum experientiâ est nul-

latenus percipi ab hominibus nisum, conatumque deorsum fluidorum corporum gravium, cum in ipsa fluida immersi sunt: ita nec pondus, aut nisum deorsum superincumbentis aëris quis percipit, nec aquæ, aut alterius fluidi gravis, intra quod quis immergatur, nec utique perciperetur hujusmodi pondus, etsi fluida illa ad immensam altitudinem supra nos ascenderent, & deorsum immensâ mole niterentur, siquidem intra fluida illa immersi essemus, ut hydrostatici geometricis demonstrationibus ostendunt.

Rationem hujus phœnomeni non hîc reddimus, at res certissima est, ut experientiâ patet, quemadmodum & certum est, fluida sensibilia omnia sub tactum cadentia, gravitate suâ continuò pollere, semper niti, semper conari deorsum, licet cum intra ipsa constituti sumus, nisum hunc, & conatum non percipiamus, & nullatenus contra nos niti, & conari videantur, atque adeò & hâc in re tactu nostro decipimur.

Si igitur de fluidis corporibus sermo sit, intra quæ constituti sumus, tactus eorum conatum nullatenus percipit, quasi fluida illa omni gravitate spoliata essent; si verò  
fer-

sermo sit de iis corporibus, intra quæ immersi non sumus, sed quæ aliquam ex nostris partibus comprimunt, aut trahunt; tactus noster eorum pondus integrum, integram gravitatis vim, quam habent, non sentit, mentique non repræsentat, & utroque in casu nos decipit, nec ei proinde fidendum est in iudicando de corporum gravitate, quemadmodum nec ipsi standum est, cum corpora quædam satis exilia, veluti omni prorsus pondere spoliata ei videntur; nullum enim corpus est, quantumvis minimum, quod plus, minusve suâ non polleat gravitate, ut Phisici ostendunt.

## §. II.

Decipimur etiam tactu, ad vim quod attinet, quâ fluida solidorum motui obfistunt intra ipsa constitutorum: neque enim ullâ huiusmodi vi resistentiæ prædicta esse fluida videntur, cum in eadem immersi per ipsa moventur.

Ita Judicamus, *ex gr.* de aëre tranquillo, ita de aquâ, ita de alio quocumque fluido, ut experienciâ patet, attramen nullum prorsus est ex fluidis sub tactum

cadentibus, quod motui non obstat corporum immerforum. Et quidem corpora superficie invicem æqualia, at disparis gravitatis, vel inæqualia superficie, licet æqualis ponderis, cum per fluida sensilia, ut per aërem, aquam, &c. feruntur, non pari passu, & æquâ velocitate feruntur, sed alia aliis citius cadunt, etsi unâ simul dilabi omnia incipiant, quod utique non contingit, ratione tantum disparis gravitatis corporum, ut vulgò putatur; corpora enim ut ut gravitate imparia, pari tamen velocitate feruntur, cum per spatia vacua simul descendere incipiunt, & susceptum iter prosequuntur, ut constat ex machinâ Pneumaticâ aëre exhaustâ, per quam aurum, *ex. gr.* & tenuis palea, aut pluma, aut si quod aliud est exilius corpus, pari passu descendunt; quod quidem æque contingeret, si memorata corpora per spatia ferrentur quocumque fluido plena, at quod nullatenus omninò motui resisteret.

Quandoquidem igitur dispar est corporum per fluida dilabentium velocitas, orietur necesse est hæc disparitas à fluidorum vi, quâ motui obstant corporum im-



immerforum, quo quidem in negotio ita se res habet. Si, *ex. gr.* duo corpora æqualis superficiei, & imparis ponderis sint, hæc ut per aërem, aut aquam descendant necesse est, ut aëreas, vel aqueas particulas invicem separent, & in earum locum migrent, cum utriusque corporis in allato casu sit par superficies, utique par quantitas particularum fluidarum disjungenda, & separanda ab eis est, ad hoc, ut per fluida illa moveantur, atque adeo par resistantia vincenda ab eis est, quâ fluidorum corporum particulae mutua separationi obsistunt; at corpus gravius facilius resistantiam illam vincet, minùs verò grave difficiliùs, eo quod primùm validiori nisu, & vi, secundum verò debiliori præditum sit.

Quod autem corpus faciliùs datam aliquam resistantiam vincit, celerius utique movetur, quod verò difficiliùs eandem resistantiam superat, tardiùs movetur, atque adeò datâ fluidarum particularum resistantiâ quâpiam, quâ mutua separationi obsistant, consequens est, ut è duobus corporibus æqualis superficiei, & disparis gravitatis celerius dilabatur per fluida illa corpus, quod gravius est, tardiùs

diùs verò quod minus grave est , quod quidem non contingeret tanto discrimine , si fluidorum partes mutuæ separationi non obfisterent :

Ex hac autem cohæsione , quâ fluidorum particulæ separationi obfistunt , fit etiam , ut corpora æqualis ponderis absoluti , ejusdemque molis , at disparis superficiei , dispari motu , aut velocitate per fluida sensilia ferantur ; par est enim vis horum corporum , at dispar est eis vincenda resistantia ; minori superficie , circumscripto minor obstat resistantia , major autem obfistit majori superficie concluso ? à primo quippe minor quantitas particularum fluidarum separationi obfistentium loco movenda , ac separanda est , à secundo verò major quantitas , etsi non majori vi præditum sit ; atque adeò corpus hoc major superficie circumclusum majori difficultate , & idcirco tardiùs illo moveatur necesse est. Si igitur dispar velocitas corporum ejusdem specificæ gravitatis , disparisque superficiei ab eâdem altitudine demissorum , & per fluida dilabentium oritur necessariò à vi , quâ mutuæ separationi particulæ fluidorum obstant ; quotiescumque per aliquod fluidum

dum plura ex memoratis corporibus dispari velocitate dilabuntur, etsi sub idem tempus omnia descendere incipiant, toties illius partes mutuæ separationi obstant: atqui nullum est fluidum sensile; per quod corpora quæcumque ejusdem gravitatis, & disparis superficiei per idem fluentia pari passu moveantur, licet sub idem tempus dilabi incipiant; igitur nullum fluidum est sub tactu cadens, cujus partes, aliquâ cohæsionis vi majori, minorive non polleant: atqui nullum tamen fluidum sensile reperiri potest, intra quod immersi & per ipsum lente progredientes, motui nostro resistere ullatenus percipiamus; igitur hisce in casibus, tactu nostro, membrisque nostris utique credendum non est; nobis enim non repræsentant vim cohæsionis mutuæ, quâ particulæ fluidorum sensilium reipsâ motui corporum obstant, atque adeo motui etiam nostro, etsi id non percipiatur.

### §. III.

Ad corporum lævitatem, & asperitatem, quod attinet, manifestum est corpora nunquam tam lævigata esse, aut parum

rum adeò scabra, & aspera, qualia tactui apparent. Quæ lævissima huic sensui videntur suis scatent furculis, & aggeribus, microscopiorum exquisitiorum iudicio; atque adeò quæ aliquatenus scabra tactui apparent, scabriora utique sunt ac appareant.

Non igitur hâc etiam in re fidendum est sensui tactûs, nec de gradibus lævitatîs, aut asperitatis corporum ex ejus fide perperam judicandum. Cum autem suâ scabrositate, & inæqualitate constituentium particularum non careat quodcumque corpus, licet lævigatissimum tactui appareat, ut docuimus, manifestò sequitur, tactum non percipere materiæ particulas omnes, quas tangit, si enim omnes perciperet, quidquid est inæqualitatis, & asperitatis in lævigatis corporibus assequeretur, & corporearum omnium superficierum exiles furculos, tenuesque prominentias omnes sentiret, proindeque nulla corporea superficies ipsi affabrè lævigata appareret, ut plures ei apparent.

Quandoquidem igitur non omnes materiæ particule à tactu percipiuntur, negandum non est ibi nullas esse materiæ par-

particulas, ubi nullæ à tactu sentiuntur, possunt enim esse, tangi, & non percipi, si satis exiles sint, ejusmodi, *ex. gr.* sunt particulae per aëra circumvolitantes, & tactui nostro ignotæ, etsi huc illuc in nos impingant, & cutem nostram tangant.

Hinc verò consequitur tactum nostrum non modò non percipere existentiam innumerabilium corpusculorum, particularumve corporum, licet cutem nostram contingant; sed nec earum motus, & impulsus, licet nos passim impetant, tum particulae quæ per aërem volitant, & quaqua versum cursistant, tum illæ quæ in cæteris fluidis sensilibus huc illuc irrequietò moventur, & in cutem nostram impingunt, dum intra fluida illa sensilia aut immergimur, aut aliquod ex membris nostris ibi detinemus.

#### §. IV.

Tandem etsi tactui videatur id, quod calorem, & frigus appellamus in corporibus existere, quæ calida, frigidaque nuncupantur; attamen nil hujusmodi est in illis corporibus; non est nimirum, *ex. gr.*

## 210 RATIONALIS PHILOSOPHIÆ

*gr.* in igne id quod calorem dicimus; non est, *ex. gr.* in glacie id quod frigus vocamus. Constat id apertissimis experimentis, quorum quædam hîc à nobis sunt in medium afferenda. Igitur, *ex. gr.* eadem aqua, quæ vix ignem senserit, calida simul, & frigida apparet, si utrâque manu experiatur, quarum quidem altera igni satis exposita prius fuerit, altera verò hyemali aëri. Rursus, *ex. gr.* quod manui calidum apparet, aliis partibus, quæ sub veste latent, sat frigidum videtur.

Præterea idem aër sub idem tempus aliquibus calidus, aliis frigidus, quibusdam verò ad mediam temperiem reductus sæpe videtur, etsi similibus vestibus induti sint omnes, quod contingit pro variâ plurium ætate, corporis constitutione, & valetudine, quâ fit ut passim homines mutuò discrepent in iudicando de calore, frigore, & temperie ejusdem aëris sub idem tempus.

Ulteriùs, si quis hyemali tempore cubiculum subeat bene clausum, aërem ibi inclusum calidum, tepidumve dicit; qui verò è lecto recens surrexit, in eodem illo cubiculo constituto, aërem illum potius  
fri-

frigidum esse, quam tepidum, calidumve asserit.

Cætera hujusmodi experimenta plurima omittimus. Atqui unum, idemque corpus, ut eadem aqua, idem aër, &c. calidum simul, & frigidum esse reipsâ nequit, siquidem calor, & frigus qualitates esse supponantur corporibus inhærentes, ut tactui videntur; igitur quandoquidem idem corpus sub idem tempus caloris, & frigoris sensationem in hominibus excitare potest, manifestò sequitur argui à nobis non posse in dato corpore reipsâ inhærere id quod calorem, & frigus appellamus, eo quod datum illud corpus calorem, aut frigus in nobis excitet, quod quidem si argui posset, inde sequeretur idem corpus, ut eundem aërem calidum, frigidum, & ad mediam temperiem reductum simul esse, quod profectò absurdum est, ac planè ἀδυνάτον.

Ita igitur constitutus est naturæ ordo, ut in nobis excitari possit, & reipsâ excitetur caloris, & frigoris perceptio, licet nil hujusmodi sit in iis corporibus, quæ sensationes illas pariunt; atque adeò calor, & frigus nil aliud sunt, nisi mæ sensationes nostræ, quarum corpora

## 112 RATIONALIS PHILOSOPHIÆ

extrinsecus existentia, & tactum nostrum  
afficientia physicæ causæ dumtaxat sunt,  
vel occasiones; eâ planè ratione, quâ  
dolor non est in acu, quo pungimur,  
aut in flammâ, quâ comburimur; sopor  
non est in opio; languor non est in man-  
nâ; sed dolor, sapor, languor, meræ  
sensationes nostræ sunt, quarum acus,  
ignis, opium, manna non sunt, nisi  
physicæ causæ, ut patet.

Quid autem in membris nostris contin-  
gat, dum calorem, aut frigus sentimus;  
atque adeò quid corpora extrinsecus exi-  
stentia in ipsis membris efficiant, dum  
calorem, aut frigus in nobis excitant,  
physicorum est ostendere, qui consu-  
lendi hac in re sunt, nec omittendæ Ita-  
licæ Epistolæ ad clarissimum Redium scrip-  
tæ de calore, & frigore; nobis osten-  
disse sufficiat putandum non esse calo-  
rem, & frigus in corporibus existere,  
quidquid tactui videatur, cum tum frigus,  
tum calor meræ tantùm sensationes nostræ  
sint ab illis corporibus in nobis excitatæ,  
quæ calida, frigidaque nuncupantur,  
quæque in seipsis calorem, aut frigus  
continere tactui nostro videntur.

Ex his autem, quæ huc usque expo-  
sui-



fuimus, patet Ideas plurimas per tactum acquisitas, ut gravitatis, resistentiæ, asperitatis, & lævitatæ superficierum, calorisque, & frigoris res nobis non exhibere cujusmodi reipsa sunt; proindeque passim occasione esse hominibus falsa judicia de rebus ferendi, quæ tactu percipiuntur: in quæ falsa judicia utique dilabuntur, quicumque non satis sibi cavent ab Ideis, quæ in nobis excitantur, quique incauti ducunt ad Ideas, quas nosmetipsi non efformamus, nonnisi ea, quæ reipsa sunt, & cujusmodi planè sunt exprimi, & menti nostræ repræsentari; quod tamen vix unquam contingit, si potissimum de Ideis quæ per sensus acquiruntur, sermo sit, ut magis, magisque ex his, quæ sequuntur, constabit.

## §. V.

Vulgaris igitur error est id, quod odorem, saporemque vocamus, in corporibus existere, quæ olfactum, & gustum afficiunt. Facili negotio id ostenditur; etenim primò per sese patet sensationem omnem jucundam, aut injucundam suapte naturâ talem esse, non ho-  
H mi-

minum voluntate, & arbitrio. Neque enim valent homines sensationum suarum jucunditatem, aut injucunditatem pro arbitrio efficere.

Secundò constat unam, eandemque sensationem gratam simul, ingrathamque, suavem, & molestatam esse non posse, pluresque sensationes non esse similes, quoties earum aliquæ gratæ sint, & suaves, aliæ verò ingratae, & incommodæ.

Hinc si ex pluribus hominibus aliqui jucundam, gratamque sensationem experiantur, alii verò insuavem, & molestatam, utique sensationes illæ invicem similes minimè sunt. Atqui ex pluribus hominibus ab uno, eodemque corpore, dum ipsum olfaciunt, aut gustant, alii sensationem jucundissimam, alii è contra molestissimam sibi excitari experiuntur; Igitur non in omnibus æquè hominibus similes sensationes odorum, saporumque excitantur ab iisdem corporibus, sed planè dispares, & oppositæ.

Id ergo quod odor, & sapor pravus, aut bonus appellatur in iis corporibus non existit, quæ olfactum, & gustum hominum afficiunt; si enim in hisce corporibus id existeret, quod percipimus,  
dum

dum ea olfacimus , aut gustamus , idem bonus , aut pravus odor , & sapor à cunctis perciperetur , at secus contingit ; experiuntur enim plures plane disparem sensationem , dum idem corpus olfaciunt , aut gustant , ut animadvertimus , utque experientia quotidie docet.

Et quidem nil familiarius hominibus contingit , quam ut idem cibus , aut idem corpus nares afficiens aliis arrideat , aliis displiceat quàm maximè ; quibusdam gratum , quibusdam ingratum , aliis suave , aliis tetram exhalans Ellephitim videatur , immò sæpè , & sæpius , quod alicui gratam odoris , saporisque sensationem excitat , in aliquo vitæ statu , idem in alio tempore , aliove Statu ejusdem hominis tetri odoris , molestique saporis sensum gignit. Ita mulieres oppilatæ , *ex. gr.* ea sæpè avidissimè vorant , quæ iisdem morbo illo non laborantibus nauseam , & stomachum movent ; ita ægrotans cibos illos molestos , insuavesque experitur , quos dum bonâ gaudet valetudine appetit , iisdemque oblectatur ; ita quos cibos quis fastidiebat juniori ætate , eos provectiori adamat , gratissimosque experitur , aut è converso ; Ita denique foe-

minæ affectionibus histericis laborantes iis corporibus , dum ea olfaciunt , recreantur , quæ molestissima , foetidaque postquam convaluerint , dicunt. Reliqua hujus generis experimenta omittimus.

Certò certius igitur est , eadem corpora diversimodè , immò prorsus oppositâ ratione afficere odoratum , & gustum hominum , atque adeò constat id , quod odor , & sapor appellatur , in corporibus non existere , quandoquidem si odores , & sapores in corporibus essent , sique homines , ideò odores , saporesque perciperent , quia in corporibus existerent , omnes homines quocumque in tempore sensationes omninò similes odorum , saporumque experirentur , non discrepantes , non oppositas ; non alii gratas , suavesque , alii verò molestissimas , & injucundissimas , nec ejusdem hominis naribus , & linguæ eadem corpora nunc pergrata essent , nunc prava , incommoda , & nauseam provocantia. Id igitur quod odor , & sapor dicitur , mera tantùm sensatio nostra est , à corporibus extrinsecis excitata , nec aliter odores , saporesque in corporibus extrinsecus existentibus sunt , ac , *ex. gr.* in succo ventriculi  
fit

fit fames, & in motu lassitudo. Ideo autem idem corpus dispares, oppositæve sensationes odorum, aut saporum in pluribus parit, quia omnium hominum nares, & linguæ non eâdem, sed potius satis dispari ratione constitutæ, conformatæque sunt à naturâ, proindeque eadem corpora longè dispares impressiones, titillationes, commotionesque producant in plurium hominum naribus, & linguis, atque adeò satis dispares sensationes odorum, saporumque, in ipsis sæpè excitant; quæ quidem sensationes planè similes esse nequeunt ex constituto naturæ ordine, si dispares sint impressiones, titillationesque quæ ab iisdem corporibus efficiuntur in plurium hominum naribus, quæ olfactûs instrumenta sunt, aut in eorundem linguâ, quæ odorum sensationibus à naturâ destinata est.

Ideò verò unum, idemque corpus non semper eandem sensationem odoris, aut saporis in uno, eodemque homine excitat, quia non semper ratione ætatis, aut valetudinis, ejusdem hominis lingua, & nares eâdem prorsus ratione constitutæ, dispositæque intrinsecus sunt, tum quod attinet ad nervearum fibrarum constitutio-

nem, quibus nares, & lingua intexuntur, tum quod spectat ad spirituum animalium naturam, quibus nervæ illæ fibræ imbutæ sunt.

Verùm hæc fusiùs exponenda Physicis relinquimus, contentique sumus ostendisse id, quod odorem, saporemque dicimus, in corporibus reipsâ non existere, quæ odorum, saporumque sensationes pariunt.

## §. VI.

Idem dicendum de sonitu: id enim, quod sonitum appellamus, mera nostra sensatio est, nec sonitus reipsâ in corporibus est, quæ sonora dicuntur; ab ipsis quippe tantùm excitatur sensatio illa, quæ sonitûs nomen obtinuit.

Et quidem ex physicis doctrinis liquet toties sensationem sonitûs alicujus in nobis excitari, quoties dati corporis cujusvis constituentes particulæ impulsu aliquo concitatæ, tremorem concipiunt, & tremor ille aëris particulis communicatus ad nos usque pertingit, quo tremore, & subsultu, seu undulari vibratione positâ, statim oritur sonitûs sensatio.

Et

Et sanè nullus sonitus oritur, nisi particulæ corporum, quæ sonora dicuntur, motum tremulum concipiant; tremunt fidix, & chordæ omnes, dum pulsantur, & resonant, ut ad oculum patet; rursus tremunt particulæ, metalla, ligna, lapides, aliaque solida corpora constituentes, dum pulsantur, & sonitum excitant, tactu id percipitur, si non ad oculum patet; præterea si intra vas vitreum, ut intra calicem aqua infundatur, & admoto ad supremum calicis digito, idem circumducatur aliquatenus, os vasis assiduè premendo, excitatur hæc ratio in particulis vitreis tremor, & subsultus, qui aqueis particulis inclusis statim communicatur, & ad oculum tremor ille manifestò apparet: statim ac autem particulæ vitreæ, atque adeò etiam aqueæ intra vitrum contentæ tremere incipiunt, illicò sonitus, aut sibili sensatio exoritur. Donec autem satis non tremunt particulæ, quibus ea corpora componuntur, quæ pulsata sonitum pariunt, nulla sonitûs sensatio in nobis excitatur; eoque tremore extincto, sive per sese, sive opere nostrâ id contingat, extinguatur illicò sensatio omnis sonitûs.

Demum, si tremor, & subsultus particularum corpora constituentium velocior sit, acutioris sonitus sensatio inde oritur; si verò tremor ille tardior sit, sonitus gravioris sensus excitatur, quod chordæ, aut fidie potissimum ostendunt; etenim si fidia quævis maximè tensa sit, atque adèò excitata celerius tremat, sonitum longè acutiorē parit, ac si satis laxetur, atque adèò tardius subsultet, & vibrationes laxiores concipiat, cum pulsatur: & quò celerius, aut tardius tremit, eò magis, minùsve acutus efficitur sonitus, ut luculentissimè de more ostendit vir planè summus Galilæus, *Tomo II. Dialogo I. Editionis Florentinae, pag. 545, & sequentibus*, ubi patet varietatem sonituum gravium, & acutorum à varietate celeritatis oriri, quâ particulæ corporum, quæ sonora nuncupantur, & subsultant, & tremunt.

Ex his verò omnibus liquet tremulum, undularemve motum particularum, quibus corpora constituuntur, physicam causam esse sensationum illarum, quæ sonitus appellantur, quæque in nobis ab extrinseco, ut ajunt, excitantur: quandoquidem hoc tremore posito oritur sensa-



fatío sonitûs, hoc sublato extinguitur; hoc plus, minusve celeri effecto immutatur, hoc aucto, & minuto augetur, & minuitur sensus sonitûs.

Non existit ergo in corporibus extrinsecis id, quod percipimus, & sonitum nuncupamus, sed tantum tremor aliquis, & subsultus, sive undularis motus particularum, quibus componuntur; quo posito sensationes sonitûs juxta Naturæ leges in animis hominum excitantur: dummodo tamen memoratus tremulus motus aëri communicetur, & ad aures usque nostras pertingat, & nervi acustici fibras afficiat: si enim tremor ille partium per aërem ad nos usque non perveniat, & fibris nervi acustici non communicetur, non imprimatur, nullus sonitus percipitur. Ita si machinâ Pneumaticâ aëre exhaustâ tintinnabulum pulsetur, (quod utique fieri potest), licet metalli illius particulæ malleolo percussæ tremulum motum concipiant, attamen cum tremor ille aëri communicari non possit, neque enim adest amplius aër, atque adeò ad aures usque nostras pertingere nequeat, nulla inde sonitûs sensatio oritur; restituto autem machinæ aëre, illicdè sensus sonitûs

## 122 RATIONALIS PHILOSOPHIÆ

excitatur, nisi quid obstaculi, aut vitii in auribus nostris sit.

Quânam verò ratione tremulus motus fibris acusticis impressus sonituum sensationes in nobis pariat, is tandem intelliget, qui probè percipiet, quânam de causâ, quâque ratione, si varii motus nervearum fibrarum in variis ex nostri corporis partibus excitentur, illicò variæ animi sensationes motus illos consequantur; quod quidem nemo uspiam fuit, qui intellexerit, semperque ingens portentum, mysteriumque imperscrutabile hominibus erit.

Ut ut autem quonam pacto id contingat, ignoremus, hæc tamen semper fuit, eritque semper Naturæ lex, cui subjici-mur omnes, ut nimirum quoties determinati quidam motus, & affectiones contingant in fibrillis horum, illorumve nervorum, quibus corpus hoc nostrum quaquaversum intexitur; toties certæ quædam, ac determinatæ perceptiones, sensationesque animi excitentur, & motus illos comitentur.

### §. VII. Non

## §. VII.

Non modò autem putandum non est id , quod percipimus , & sonitum appellamus , in corporibus existere , quæ sonora dicuntur , sed neque arbitrandum est quocumque in casu , & citra examen inde reipsâ oriri sensationem sonitûs , unde auribus nostris videtur ; siquidem tutò judicare velimus de situ corporis , quod sonitum parit , an nimirum reipsâ sit dextrorsum , aut sinistrorsum , an antrorsum , vel retrorsum. Si enim motus tremulus aëris à corpore aliquo ortus , *ex. gr.* à campanâ , aut tormento bellico ad nos rectâ viâ non perveniat , sed ad oppositum aliquod corpus pertingat , ut ad parietem , aut montem , indeque ad nos reflectatur , ex eâ parte oriri sonitus nobis falsò videtur , unde reflectio fit , cujus ope tremulus motus aëris recto tramite ad nos pervenit , atque adeò ibi locatum falsò apparet sonorum corpus , ubi reflectio motus tremuli aëris facta fuit. Hoc quisque passim animadvertere per sese potest , si ad rem attendat : dum , *ex. gr.* campanæ pulsantur , & motus tremulus , qui ab  
ip-

ipsis in aëre excitatur, & per aërem propagatur, rectâ viâ ad nos pervenire à corpore pulsato non potest.

## §. VIII.

Ostendendum nobis superest Ideas per oculos acquisitas, partim prorsus falsas esse, nimirum objectis non respondere; partim verò falsi suspectas quam maximè esse, proindeque eos, qui de objectis judicant, ex Ideis ministerio oculorum acquisitis partim certò certius decipi, partim temerè, & perperam judicare. Ideæ præcipuæ, quæ per oculos habentur, sunt Ideæ extensionum, figurarum, æqualitatis, aut inæqualitatis harum rerum, sitûs corporum, ac denique lucis, & colorum.

Paucis hasce Ideas expendamus, & primò quidem Ideas quantitatis, seu magnitudinis extensionum.

Certum ergo est quantitatem extensionis, seu magnitudinem objectorum diversimodè apparere, & plus, minusve majorem, minoremve videri, si perspicillis, & tubulis opticis aspiciatur, prout varii sunt tubuli, & perspicilla, prout nimirum

rum plus, minusve concava, aut convexa sunt vitra, & pro variâ dispositione, & mutuâ constitutione vitrorum, ac Lentium, quibus tubi optici componuntur.

Quisque id experientiâ discere potest. Jam verò oculi nostri nil aliud sunt, nisi tubuli quidam optici à natura affabrè elaborati, & in animantium fronte constituti.

Apparet id apertissimè ab eorum intima structura anatomæ ope inspectâ, & experientia luculentissimè id comprobat: si enim oculus, *ex. gr.* bovis recens extractus & exutus tribus posterioribus tunicis, quibus involvitur, aptetur anteriori parte foramini alicui ad rem factò, per quod radii lucis conclave undique clausum, & tenebrosum subire possint, & ad justam ab oculo distantiam carta, aut aliud quodvis corpus opacum constituatur in eâ cartâ, picta apparebunt objecta quæcumque extrinsecus existentia, quemadmodum plane contingit, si memorato foramini tubus aliquis opticus aptetur. Sunt igitur oculi veluti totidem nativi tubuli optici, quod & optices manifestissimè ostendit, ut probè norunt, qui in elegantis-

simâ

simâ hâc scientiâ hospites omninò non sunt.

Hujusce autem scientiæ principiis constat, oculos necessariâ lege diversimodè repræsentare magnitudines objectorum, si aliquantulum dispar sit intima eorum structura. Si igitur duorum hominum oculi mutuò comparati invicem discreparent, aut in densitate humorum, aut in eorundem figura, aut in ipsorum positione, & situ, nec in hisce omnibus invicem ad amissim convenirent, non sub eâdem magnitudine utrique homini eadem objecta exhiberent, sed sub dispari; eâ planè ratione, ac duo tubi optici disparis constitutionis, dispari magnitudine prædita eadem objecta repræsentant.

Hisce constitutis certum est hominum oculos non eâdem prorsus ratione conformatos in omnibus esse.

Etenim primò aliquando accidit, ut unius ejusdemque hominis oculi dispari ratione constructi, conformatique sint; ita ut dexter sinistro discrepet, idemque objectum sub dispari magnitudine appareat, si primùm dextro, mox sinistro oculo conspiciatur. Id de se testatur clarissimus Rohaltius, ejusdemque phœno-  
me-

meni fidem faciunt Ephemerides Literariæ, quæ vulgò Minervæ Musæum dicuntur ad annum.

Secundò eadem perspicilla, iidemque tubi optici uno, eodemque modo dispositi non æque omnium hominum oculis conveniunt: nil hoc phænomeno frequentius contingit: hinc autem necessario consequitur non omnium oculos invicem convenire ad eorum structuras, & constitutiones, quod attinet; si enim nullatenus homines discreparent, ad oculorum mechanicam structuram intimam, quod attinet, utique iidem tubi, eademque perspicilla eosdem effectus parerent in omnium hominum oculis ad eandem distantiam ab objectis: atqui dispares planè effectus producunt; non sunt igitur omnium hominum oculi eadem ratione constituti, & conformati.

Parum autem discriminis in humorum figuris, & constitutione sufficit ad diversimodè aliquatenus magnitudinem objectorum repræsentandam, ut patet exemplo tuborum, exigua enim disparitas in figuris vitrorum, & in eorumdè dispositione, & situ, efficit, ut objecta eadem  
ab

ab eâdem distantia non sub eâdem prorsus quantitate, seu magnitudine appareant.

Si igitur magnitudo apparens objectorum ab oculorum constitutione pendet, & si hæc dispar est in pluribus, nemo unus profectò est ex hominibus, qui scire possit, quænam sit constitutio illa oculorum, quæ ad verum repræsentat physicam objectorum constitutionem, & magnitudinem, nemo, qui certò sciat, an aliquis eâ conformatione fruatur, eo-que minùs, qui tutò asserere possit sibi huiusmodi constitutionem oculorum fortè fortunâ contigisse. Cavendum ergo est, ne temerè judicemus, veluti de re certâ, eam reipsâ esse magnitudinem objectorum, quæ nobis ab oculis exhibetur, licet de iis objectis, aut extensionibus sermo sit, quæ nobis proximæ sunt, quæque ob oculos obversantur.

### §. IX.

Cæterum, oculi nos etiam decipiunt, cum nobis objecta exhibent, veluti exilissima, ac fere prorsus insectilia, & minima; etenim quæ veluti individua, & minima conpuscula apparent, nec indi-  
vi-



vidua reipsâ sunt , nec minima ; immò continent partes gradatim minores , minoresque numero infinitas , quarum unaquæque alias complectitur gradatim exiliores , numero infinitas , & sic in infinitum , ut demonstrant Mathematici. Hinc autem sequitur cavendum etiam esse , ne perperam arbitremur ea corpora non existere , quæ oculos fugiunt quantumvis proximos , aut ea tantum existere in quopiam loco quæ conspiciuntur ; quandoquidem non quælibet extensio existens , non quodlibet corpus exhibetur ab oculis ; immò nec à microscopiis quidem quantumvis acutissimis.

Hinc , *ex. gr.* si quis liquorem aliquem , aut aquam , aut spiritum vini ab omni heterogeneâ hâc terrestri materie secretum , purissimumque arbitraretur , eo quòd oculis ita appareat , Ideis per oculos acquisitis abuteretur , eorum repræsentationi fidem omnem inconsultò adhibens. Aliud est enim nullam terrestrem , heterogeneam materiam ab oculis apprehendi in liquore quopiam , aliud nullam hujusmodi materiem in eo esse , nec earum particularum existentia neganda est , quæ oculos fugiunt , vel etiam microscopia.

130 RATIONALIS PHILOSOPHIÆ  
pia. Attamen quotidie fecus fit ab hominibus, plurimis in casibus.

### §. X.

Quod autem attinet ad Ideas æqualitatis, aut inæqualitatis extensionum per oculos acquisitas; hæ quoque Idæ erroribus quàm maximè obnoxie sunt, & quidem haud rarè. Si de æqualitate extensionum, quæ nobis proximæ obversantur, sermo sit, cum hæ juxta positæ sunt, earum sensilis æqualitas satis apparet: at si extensio aliqua supra aliquam erecta exurgat, passim decipimur falsâ inæqualitatis imagine. *Ex. gr.* si datâ lineâ quâpiam rectâ horizontali, ad ejus extremum alia recta perpendicularis, & illi æqualis erigatur, ambæ invicem non inæquales oculis videntur; At si perpendicularis hæc non ad alterius extremum ducatur, sed medium versus, quò ad illius medietatem accedit, eò major alterâ horizontali apparet. Experientia id luculentissimè ostendit.

Quod autem de lineis memoravimus, idem dicendum de extensionibus corporum, *ex. gr.* molis alicujus supra horizon-

ta-

talem aream, ut intra plateæ ambitum, instructæ; si enim area hæc, aut platea longa sit, ac moles intra ambitum instructa minor apparebit longitudine molis, si minor reipsâ sit longè minor videbitur.

Quod si de longinquis extensionibus, aut satis in longum protractis sermo sit, invicem pares apparent oculis, quæ ingenti disparitate inæquales sæpe sunt. Ita, *ex. gr.* Sol, Luna, & nubes æquidistare videntur à nobis, & invicem intermixtæ quodam modo apparent; attamen nubes vix ad aliquod milliare supra nos assurgunt, Luna à Terræ superficie remota est mediâ distantia spatio circiter 333330 milliarium Italicorum, Sol autem mediâ item distantia à Terra abest milliariis ejusdem mensuræ 54000000 circiter; immo potius Sol abest à Terrâ mediâ distantia 90000000 milliarium Italicorum circiter, juxta Gregori, Keil, & alios, quantumvis tum Luna, tum Sol nubibus ipsis involutis, iisdemque intermixtus appareat. Sed opus non est tam longè abire; etenim in hoc nostro terraqueo globo extensiones memoratis quàm maxime minores, & satis invicem inæ-

I 2

qua-

quales ob oculos veluti mutuò pares exhibentur. Id contingit quoties linea recta ab oculo nostro ducta per duo, plurave objecta transit, invicem quovis intervallo diffita, seu alia aliis remotiora; hisce enim in casibus objecta illa veluti ad contactum apparent posita, proindeque ad eandem ferè distantiam locata, siquidem satis à nobis distent, aut in eo situ constitutus sit oculus, ut spatia inter illa objecta intermedia non deprehendat. Sexcenta hujusmodi omittimus, quæ apud Opticos quærenda sunt.

Quæ autem attulimus satis ostendunt oculos eas extensiones haud rarò inæquales repræsentare, quæ reipsâ æquales sunt, eas verò sæpe mutuò æquales exhibere, quæ sunt longè impares, atque adeò Ideas æqualitatis, aut inæqualitatis extensionis per oculos excitatas in allatis, & similibus, analogisque exemplis falsas esse, nec per eas judicandum de verâ æqualitate, aut inæqualitate extensionum.

## §. XI.

Ideæ etiam figurarum quorumcumque corporum, quales per oculos acquiruntur,

tur, satis ad verum expressæ non sunt, nec temerè judicandum est rerum figuras, seu dispositionem extimarum partium, quæ unâ omnium superficierum, & corporum ambitum, & peripheriam constituunt, ejusmodi prorsus esse, quales oculis apparent. *Ex. gr.* si Ellypsis ad circulum quàm maximè accedat, ejus differentia à circulo non dijudicabitur ab oculis; si duæ lineæ prorsus parallelæ non sunt, seu non undique prorsus æquidistantes, sed tantisper convergant, à parallelis oculorum vi non distinguuntur; si verò parallelæ sint, & ad insignem longitudinem protractæ convergere videbuntur versus remotiora extrema, & ferè angulum efformare: si linea quædam aliquatenus tantùm sinuetur, & à rectâ defleat, recta tamen oculis videbitur; ita *ex. gr.* si funis appensis hinc inde gravissimis ponderibus horizontaliter distendatur, recta prorsus utique videbitur oculis, nullatenus nimirum sinuosa, at reipsâ aliquatenus sinuetur, & curva sit necesse est, ut geometricè demonstrat Galilæus, *Toms. II. Dial. 4. Editionis Florentinæ, pag. 262.*

Rursus eorum corporum superficies *ex. gr.* intra rectas lineas circumscriptæ,

parallelogrammæ, & planæ ita falsò apparent; nec enim earum extrema lineæ rectæ reipsâ sunt, nec ostendi potest latera opposita esse omninò æqualia, & parallela, nec partes, quibus corporeæ superficies constant, ullo in casu in uno, eodemque plano sunt constitutæ, atque adeò planam superficiem nunquam efformant. Si enim microscopiis inspiciantur extremæ, & intermediæ partes corporearum illarum superficierum, quæ lævigatissimæ, & omninò planæ oculis apparent, earum extrema latera, & reliquæ intermediæ partes omnes huc illuc mirum in modum scabræ, spissisque sinibus, furculis, processibusque exiguis quaquaversus scatentes deprehenduntur.

Quicumque microscopiis non vulgaribus corporum figuras curiosius inspicit, passim miratur tam rudes esse, tam incompletas, & informes Ideas, quas nudi oculi nobis exhibent, ad extimarum partium constitutionem, quod attinet, quibus corporum superficies, adeoque figuræ constant; at ipsamet microscopia utut acutissima, minuunt quidem hâc in re oculorum errorem, prorsus autem nunquam tollere poterunt; eorum enim  
vis,

vis, & acies nimis imbecillis, & finita est. Verum quæ particula microscopio exquisitiori minima videtur, minima utique non est, sed aliis, aliisque exilioribus componitur, quæ & ipsæ texturam extimæ superficiei corporum ingrediantur; quapropter ne microscopiorum quidem ope adæquatæ, completæque notiones acquiri possunt veræ, ac physicæ dispositionis, & ordinis particularum extimarum omnium, quæ reipsâ extremum ambitum extimamque superficiem, atque adeo veras corporum figuras constituunt.

Ex his verò patet oculos non esse tutos iudices similitudinis figurarum, nec gradus omnes disparitatis, & discrepantiæ inter phycas figuras dignoscere.

## §. XII.

Ad Ideas motuum quod attinet per oculos acquisitas haud rarò, & ipsæ mendaces sunt, etenim si oculis credimus ibi sæpe motum esse arbitraremur, ubi non est; ibi verò ubi est haud rarò non esse putabimus. Ita, *ex. gr.* si solidum aliquod corpus percutiatur, ut inde rumor aliquis aut sonitus excitetur, corpo-

ris illius partes consistere apparent, licet undulari, & tremulo motu tunc temporis afficiantur, ut superius adnotavimus. Immotæ etiam particulæ apparent fluidorum in vase aliquo stagnantium, at nullum fluidum est, cujus partes constituentes omnino quiescant, ut apertissimè constat experimentis à Roberto Boyle recensitis *Historiâ Fluiditatis & Firmitatis, Sect. 21, 22, &c.*

Rursus, si quis leni & æquabili motu vehatur nave, stare hic putabit, & consistere prorsus immotus, licet id falsissimum sit, quod haud rarò navigantibus contingit. Ulteriùs, si globus aliquis rapidissimè rotetur circa suum axem, eum prorsus quiescere judicabimus, si oculis fidem habemus.

Præterea, si ad aliquod tempus navis, *ex. gr.* satis diffita, Luna, Planetæ, Astra inspiciantur, hæc omnia prorsus stare videbuntur, licet successivo, jugique motu ferantur. Tandem lux in uno, eodemque instanti spatium utut amplissimum implere videtur oculis, licet tamen successive reipsa lux propagetur, absomit enim horæ minutum secundum circiter, sive scrupulum horarium in percurrento spa-



spatio æquali circiter viginti diametris telluris; Terræ autem diameter ad milliaria ascendit 8202, quorum unumquodque quinque millia pedum Parisiensium complectitur, seu in transigendo spatio, quod intra Solem, & nos est, octo, aut novem circiter minuta absument, ut calculo Astronomico satis accuratoprehendit eximius Newtonus, alique.

Alia multa in hanc rem afferri possent exempla, sed quæ recensuimus satis ostendunt, oculos sæpe motum ibi non percipere ubi est. Verùm haud rarò è contra ea moveri repræsentant oculi, quæ prorsus quiescunt. Ita in allato superius exemplo hominis, qui navè vehitur, nec motum navis percipit, si ipsi huc illuc aliæ naves circumstant, eas omnes per æquora ferri putabit oculorum testimonio, licèt immotæ prorsus, atque anchoris firmatæ, ac detentæ sint.

Eâdem ratione, si quis in aliquo Planetâ, ut Jove, *ex. gr.* constitutus esset, & reliqua coelestia Corpora starent, putaret utique eadem omnia ab Oriente in Occidentem circumferri, se verò cum Jove immotum consistere; neque enim Jovis motum circum axem perciperet; & si

### §38 RATIONALIS PHILOSOPHIÆ

Globus hic noster circa suum axem rotaretur viginti quatuor horarum spatio, ut Copernicus, aliique putarunt, Solem, & Astra universa rotari ab ortu in occasum memorato viginti quatuor horarum spatio oculis appareret, licet tum Sol, tum Astra eodem loco consisterent. Decipimur etiam sæpenumero cum ex oculorum fide de æqualitate, aut inæqualitate velocitatum plurium corporum iudicamus. Ut duo, plurave corpora æquè velocia sint, necesse est, ut sub idem tempus paria spatia percurrant, secus verò si dispari velocitate ferantur; atqui spatia, & extensiones inæquales, haud rarò æquales apparent, ut superiùs ostendimus. Igitur si plura corpora eodem tempore spatia illa percurrant, quæ æqualia videntur, at reipsâ inæqualia sunt, æquè velocia videbuntur, cum non sint.

Rursus si plura corpora sub idem tempus conficiant, quæ inæqualia videantur & tamen æqualia sint, dispari velocitate ea moveri videbuntur, licet reipsâ pari passu moveantur. Ita si duo objecta in uno, eodemque circulo moveri, & veluti in uno, eodemque fornice constituta

videantur, proindeque à nobis æquidistantia appareant, cum tamen reipsa ex illis corporibus aliud alio longe sublimius, & remotius sit (quod sane contingit, ut superius de Sole, Luna, & Nubibus, *ex. gr.* diximus) si corpora illa ad easdem partes moveantur, licet corpus sublimius, rapidius feratur, ac corpus inferius, tamen hoc velocius illo ad oculum apparebit; eò magis inferius corpus videbitur velocius, si tum sublimius, tum inferius pari velocitate moveantur. Si verò appareant pari passu procedere, eademque celeritate affici, utique reipsa velocitate discrepant, & celerius in gyrum rapitur, quod sublimius, & remotius est; quandoquidem sub idem tempus majus spatium, nempe similem circuli majoris arcum percurrit corpore proximiori, quodque per arctiorem, minoremque gyrum rotatur.

Omnia hæc, aliaque plurima hujusmodi ab opticis demonstrantur, & quisque supra indigitato, satisque obvio experimento de Luna, & Nubibus, id sibi facile suadere potest. Quis enim ignorat quàm remotior sit Luna nubibus, quàmque velocius, rapidiusque in gyrum agatur, ac nubes vento impulsæ moveantur? attamen

fi

si tum Luna, tum Nubes ad easdem partes progrediantur, cum & ipsa, & nubes ad eandem à nobis distantiam appareant, Nubes longe velociores Lunâ videntur, licet earum velocitas à velocitate Lunæ longissimo distet intervallo: eo magis id verum est, si de Sole, & Nubibus sermo sit.

Quisque similia exempla imaginari nullo negotio potest; quamobrem plura hâc in re non attingimus. Igitur si oculorum fidei stemus incauti, pluries æquivelocia putamus, quæ celeritate discrepant, & dispari velocitate affecta, quæ pari passu moventur.

### § XIII.

Denique certi esse nunquam poterimus, an ullo in casu oculi nostri veram, ac physicam quantitatem velocitatis corporum nobis repræsentent. Id levi negotio ostenditur.

Enimverò certò scire non possumus, quanta sit velocitas dati alicujus corporis, nisi sciamus certissime, ac tutò, quanta sit extensio intra datum tempus, à corpore illo percursa. Atqui oculorum testimo-

nio

nio certò scire nullo modo unquam possumus, quanta sit data extensio à dato quodam corpore transacta intra datum aliquod tempus: Igitur nec certò scire possumus unquam quanta reverâ sit physica velocitas, quâ corpus illud præditum est. Veram autem quantitatem, seu magnitudinem extensionum, ut areæ, viæ, &c. certò constitui non posse ex oculorum nostrorum fide, initio hujus capituli fuisse docuimus, ubi demonstravimus, quàm maximè saltem dubium esse, an extensiones conspicuæ ejus prorsus magnitudinis sint, cujus nobis ob oculos exhibentur, an verò potius majores, minoresve reipsâ sint, quàm appareant.

Hinc igitur patet saltem certò sciri à nobis non posse, an aliquo in casu velocitas apparens dati alicujus corporis reverâ sit, qualis ab oculis exhibetur, an potius major, minorve sit quàm appareat.

#### §. XIV.

Exponendi jam nobis sunt errores circa situs corporum ex oculorum mendaciâ auctoritate fluentes. Igitur non quæcumque corpora, & quocumque ex lo-

co spectentur, ibi omninò existunt, constitutave sunt, ubi apparent; verum ut id liquidò constet, animadvertendum est, Globum hunc nostrum terraqueum aëre circumvolvi, eoque non puro, sed vaporibus aqueis, terrestribusque exhalationibus disseminato, qui vapores, & exhalationes ad certam quandam altitudinem supra nos assurgunt. Regio hæc aërea, vaporibus, & exhalationibus intermixta, *Athmosphœra* vocatur.

Jam verò lucis radii, qui ab objectis immissi, aut reflexi obliquo, & transverso tramite per *Athmosphœram* feruntur; objecta nobis repræsentant altiora, ac reverâ sint, nimirum ibi existentia, & collocata monstrant, ubi non sunt, si potissimum aër valde vaporosus sit, si quæ objecta ad insignem aliquam distantiam sint constituta.

Ratio hujus phœnomeni à *Dioptricâ* pendet, quamobrem scientiæ hujus peritis jam patebit, à reliquis verò percipi non potest, nisi hæc de re copiosius disseramus, quàm institutum nostrum patiatur. Hîc igitur memorati Phœnomeni originem, rationemque non retegimus, at rem ita se habere experienciâ patet.

Et

Et quidem, *ex. gr.* Sol, Luna, & Astra adhuc versari videntur supra Orientem nostrum ad aliquod tempus postquam ea occidisse certum est ex Astronomicis demonstrationibus, eâdemque de causâ memorata objecta antequam verè oriantur, orta apparent, nimirum supra Orientem nostrum constituta.

Rursus, Insulæ, & cacumina montium, quæ à quopiam loco non conspiciuntur, cum aër vaporibus effœtus est, statim ac iis abundat, ex eodem illo loco conspicua fiunt, quia nimirum radii lucis à memoratis illis objectis ad nos reflexi, cum per Athmosphœram vaporibus refertam, transversò, & obliquo tramite feruntur, objecta illa attollunt, sive in eminentiori loco eorum imaginem repræsentant, ex quo fit, ut perspicua evadant ex eodem illo loco, ex quo conspicua minimè erant, cum aër vaporibus non factis abundabat.

Id ipsum comprobatur facile experimentum. Si igitur Thelescopium in certo quopiam constantique situ constituatur immotum, ita, ut per ejus axem oculus respiciat objectum quoddam, putate turrim, arborem, sat remotum, *ex. gr.* ad mil-

millenos pedes, objectum hoc, primo mane, & sub vespere, cum nimirum aër magis vaporibus refertus est, multò altius apparet, ac videatur, cum Sol vergit ad meridiem, cum nimirum vapores aëris rariores sunt.

Patet igitur vapores atmosphææ efficere, ut objecta satis remota appareant in altiore situ constituta, ac reverâ sint, quod erat suadendum. Hisce in casibus fidendum oculis non est, nec ex eorum præstigiis de vero, ac physico objectorum situ iudicandum.

Rursus objecta remotissima in eodem prorsus situ permanentia ad aliquod tempus videntur, licet reipsâ situm mutaverint, ut supra docuimus. Verum de his satis.

## §. XV.

Supereſt, ut ostendamus oculos occasionem esse hominibus falsa iudicia de coloribus ferendi. Vulgò igitur homines arbitrantur unumquemque colorem quippiam esse in corporibus verè existens, cujusmodi apparet; at nil huiusmodi utique est in corporibus, quæ nonnisi merè  
phy-



physicæ causæ sunt earum perceptio-  
num, quæ colorum appellantur.

Quemadmodum ergo odores, & sapo-  
res nil aliud sunt, nisi meræ sensationes  
nostræ, ut demonstravimus, non quid-  
piam in corporibus illis existens, quæ  
odora, & sapida nuncupantur; ita colo-  
res meræ sunt sensationes ab objectis ex-  
trinsecis ministerio lucis per oculos exci-  
tatæ, quin ullatenus sit in objectis id,  
quod color appellatur, quodque perci-  
pimus, dum objecta intuemur, quodque  
in ipsismet objectis inhærere, & inexis-  
tere falsò videtur.

Ut id constet, animadvertendum est,  
ita constitutum esse naturæ ordinem, ut  
excitari possint, & reipsâ in nobis exci-  
tentur perceptiones colorum, quin ulla-  
tenus existat in objectis id quod colorem  
appellamus. Ita, *ex. gr.* dum speculum  
consulimus nostri effigiem, & circum-  
stantium rerum imagines, variis coloribus  
pictas conspiciamus, quin tamen colores  
in speculo illo reipsâ sint.

Secundò, qui in Solis astrum defixit o-  
culos, vel opthalmiâ, vel lippitudine  
laborat, objecta pluribus coloribus, ac  
veluti Iride quâdam circumtectâ, & cir-

K

cum-

cum data videt, at coloribus illis, utique objecta reipsâ cincta nullatenus sunt: si enim verè coloribus illis redimita essent, & oculi ideo nobis exhiberent colores, quia in objectis reipsâ essent, ut vulgò homines putant, profectò ab omnibus conspicerentur memorati colores, quod tamen falsum est; qui enim in Solem oculos non figunt, quique lippitudinis morbo non afficiuntur, Iridem illam colorum circa objecta non vident.

Præterea si microscopiis acutioribus corpora inspiciantur, alterius coloris sæpissime apparent, ac nudis oculis videantur: plures autem, dispareshue colores unâ simul existere in eâdem materiæ parte utique non possunt; attamen alius color oculis nudis, alius oculis microscopiis instructis, passim apparet.

Rursus, pluries contigisse memoriâ proditum est, ut unus, idemque homo alterutro singillatim oculo unum, idemque objectum respiciens, sat dispareshue colorum sensationes expertus sit, ita ut quod, *ex. gr.* flavum dextro ejus oculo apparebat, blavastrum sinistro videretur. Hujus phænomeni elegantissimi fidem faciunt clarissimus Malebrancius, *de inquirenda Verita-*

re, Lib. I. Cap. 13. §. 4, & *Ephemerides Litterarie Italica*, vulgò *Musæum Minervæ* nuncupatæ, ad annum 1696; quæ loca adeunda sunt.

Denique si per foramen ad rem factum radii Solis clausum, & tenebrosum conclave subeant, & dum ipsum subire incipiunt primate cristallino excipiantur, per ipsum radii transeunt, & ab eo emergunt in oppositum parietem feruntur, à quo ad oculos reflectuntur. Jam verò hi radii dum conclave ingrediuntur, dum per prisma transeunt, dum ab eo emergunt, ac tandem dum parietem versus feruntur, & ad ipsum pertingunt, nullo colore picti conspiciuntur; at reflexi, & oculos afficientes, sensationes excitant quinque horum colorum, nempe violacei, cærulei, viridis, flavi, ac rubri, quibus hoc ordine dispositis, quo eos numeravimus, paries delibutus, pictusque apparet.

Qui autem colores parieti profectò non pertinent, eique non inhærent, ut liquet, neque in radiis sunt, ut animadvertimus; si enim radii dispari illâ ratione colorati essent, sique oculi ideo colorum Ideas excitarent, quia colores ex-

trinfecus existerent, radii veluti picti conspicerentur, dum conclave subeunt & dum per illud feruntur à prismatico emersi, quod tamen nullatenus contingit; nec colorati intrinfecus utique evadunt, dum à pariete reflectuntur, cum antea colorati non essent: etenim reflexio radiorum eorum naturam nullatenus immutat, nil ipsis addit, aut detrahit novi.

Ex hoc igitur experimento, cæterisque supra recensitis, constat colorum sensationes excitari ex constituto naturæ ordine, quin id, quod color appellatur, reipsâ existat in objectis, quæ colorata dicuntur, quæque meræ tantum causæ sunt earum perceptionum nostræ mentis quæ colorum appellantur.

Si Institutionum limites prætergredi fas esset, facili negotio ostenderemus ex præstantissimis Viri maximi Isaaci Newtoni doctrinis, quid extrinfecus contingat, cum colorum sensationes per oculos in mente ab objectis lucis ministerio excitantur. Demonstraremus nempe lucem constare radiis disparis naturæ, secundò unamquamque speciem radiorum de-

determinati tantum coloris sensationi excitandæ aptam natam esse.

Tertiò species radiorum potissimas quinque numero esse, atque adeò totidem esse colores simplices, & originarios, quinque speciebus radiorum respondentes.

Quartò à primâ radiorum specie ori-ri violacei puri coloris sensationem, à secundâ cærulei, à tertiâ viridis, à quartâ flavi, à quintâ denique rubri. Ac tandem non omnia corpora ad quoscumque, & cujuslibet speciei radios reflectendos apta esse, sed varias radiorum species à variis corporibus reflecti, cæteras introsuscipi, & absorberi; atque adeò rubra, *ex. gr.* videri, quæ radios quintæ speciei omnium maximè reflectunt; violacea, quæ radios primæ classis; viridis coloris, quæ radios tertiæ; cærulæa, quæ secundæ; flava, quæ quartæ; purpurea, quæ quintæ, & primæ simul; blavatra, quæ primæ, & secundæ simul; medii coloris inter flavum, & viridem, quæ tertiæ, & quartæ simul speciei radios majori copiâ reflectunt, cæteris, aut ex integro, aut ferè ex integro non reflexis. Sed introsusceptis, & sic de reliquis non originariis coloribus, quibus

varia corpora variè tincta videntur, quæque omnes à peculiari quâpiam mixturâ quarundam specierum radiorum ex quinque memoratis oriuntur.

Possemus inopinatas hasce doctrinas præteritis ætatibus omnibus prorsus ignotas longè accuratiùs, distinctiùsque disferere, in luce apertissimâ collocare, & experimentis, rationibusque firmissimis evincere; at temporis angustiiis nimis urgemur; præterquàm quod omnia hæc fusè exposuimus publicis prælectionibus nostris, ubi de oculorum erroribus agebamus, & vivâ voce, quâ ut alia plurima, quæ in scriptis tradi non possunt, ita & hæc ulterius retexemus.

## §. XVI.

Ex his, quæ hucusque docuimus, factis, superque cuique persuasum ducimus, sæpissime Ideas à mente per sensus acquisite, & externa objecta repræsentantes, partim malè tutas esse, partim omninò falsas, & à vero diffformes, adeoque objecta, cujusmodi reipsâ sunt, non repræsentare.

Quoties autem falsas, aut malè tutas

rerum Ideas habemus, toties veras, certasque relationes, quæ inter res illas intercidunt certò assequi minimè possumus; immò si malè objecta percipiuntur, falsæ sint, necesse est, relationes, quæ inter illa intercedere videntur; ex falso enim non sequitur nisi falsum, quod diligentissimè animadvertendum est.

Et sanè, si Sol, *ex. gr.* hujusmodi esse putamus, qualis apparet, quomodo veras relationes magnitudinis, quæ inter ipsum, & cætera astra, planetasque intersunt certò deprehendere poterimus? Immò judicabimus solem majorem esse maximo quocumque sidere, minorem verò terrâ, ut Epicurus defendebat, quod falsissimum est; excedit enim Terraqueam molem decies centies millies faldtem.

Idem dicendum in quocumque alio casu. Hinc, si velimus veras rerum relationes agnoscere, maximè cavendum est, ne falsas Ideas rerum illarum pro veris habeamus. Si enim aliter res sint, ac putemus, relationes, quæ interessere videbuntur inter objecta illa ita accepta, qualia falsò concipiuntur, à veris relationibus discrepabunt, quæ reipsâ intersunt

inter eadem illa objecta ita sumpta, qualia verè sunt, non qualia falso à nobis esse purantur. Atque hæc dicta sint satis ad suadendum, Ideas à mente acquisite, non efformatas, passim occasione esse falsa judicia de rebus ferendi iis hominibus, qui ut vulgò frequens nimium contingit, ex Ideis suis citra examen, & inconsultò de rebus judicant.

Reliquum est, ut ostendamus ex Ideis etiam à mente efformatis plurimos errores oriri, nisi quis ipsis ad judicandum de rebus caveat, quod raro fit.

## §. XVII.

Ideæ igitur à mente efformantur vel per compositionem, vel per divisionem, aut abstractionem, ut *Cap. I.* docuimus, ubi de Ideis à mente efformatis verba fecimus. Ostendamus ergo primùm, Ideas à mente compositas seu phantasticas incautos sæpe decipere, occasione nempe crebrò esse malè, & perperam de rebus judicandi.

Meminisse autem huc oportet ex numero Idearum phantasticarum esse Ideas omnes hypotheticas, hypotheses nimirum



rum omnes , quotquot efformatæ sunt , aut efformari possunt ab hominibus ad naturæ phænomena , & opera explicanda.

De Ideis illis phantasticis , quæ non conficiuntur à mente ad aliquod phænomenon , ad aliquod naturæ opus explicandum , nil hîc alicujus momenti animadvertendum nobis occurrit , cum vix unquam quis abuti hujusmodi Ideis possit in judicando de rebus. At secus contingit de Ideis illis phantasticis , quæ hypotheticæ sunt : enimverò cum homines excogitatam aliquam hypothesim aptam esse agnoscunt , aut putant ad explicandum quomodo naturæ illa phænomena oriantur , ad quorum productionem exponendam hypothesi illa excogitata est , facilitè in animum inducunt ità omninò se rem habere , ut excogitata est , & seriò credunt imaginatam illam hypothesim , ad veri normam efformatam planè fuisse , eique naturam ipsam respondere.

Id sæpe advertere est in philosophorum , & eruditorum scriptis ; passim enim in his occurrunt Idæ hypotheticæ pro certissimis , & ad verum prorsus efformatis , à scriptoribus illis habitæ , eo

#### §54 RATIONALIS PHILOSOPHIÆ

quod positis illis hypothesibus facile explicetur, aut facilè explicari putant, quomodo res illæ se habeant, ad quarum originem explicandam, hypotheses illæ imaginatæ, & constructæ sunt.

At non ideo. Hypothesis certa, ac tuta imago veri ducenda est, quia eâ positâ, id à nobis explicetur, quod explicandum suscepimus. Etenim multiplici ratione, multiplicique hypothesi aliquid explicari satis potest, licet reipsâ hypotheses illæ omnes, veræ simul esse non possint. *Ex. gr.* planetarum, & fixorum siderum apparentia phænomena plura explicantur, tum ex hypothesi Ptolemaicâ, tum ex hypothesi Copernicanâ, tum ex hypothesi Ticoniana, tum ex aliis; at tamen hypotheses illæ omnes veræ simul esse nequeunt, cum toto Cælo invicem discrepent; Atque adeò hypothesis non ideo certa veri imago est, quia eâ positâ id quod explicandum suscipimus, satis commodè explicetur: quandoquidem fieri potest, ut innuimus, ut data quædam hypothesis satis explicet data quæpiam Naturæ phænomena, & opera, licet reipsâ phænomena illa aliâ ratione à Naturâ præstentur, aliâ viâ conficiantur, ac eadem

dem præstari efficique ex hypothesi concipiuntur. Cavendum ergo est, ne perperam judicemus Ideas hypotheticas ab hominibus imaginatas ad explicanda data quædam Naturæ opera, verum certò, tutòque assequi: cum incauta sit, & suapte naturâ fallax hæc ratiocinatio; positâ hâc, illâve hypothesi commodè explicatur, quomodo hæc, illave phænomena fiant, ergo phænomena illa ita reipsâ fiunt, ergo hæc, illave hypothesis vera est, & veram phænomenon illorum originem, & causam complectitur.

Hujusmodi autem ratiocinationem decipere, & malè tutam esse ex his, quæ huc usque in hoc paragrapho exposuimus, manifestò constat. Tunc solum data hypothesis ad explicandum aliquod Naturæ opus excogitata, certa, tutaque est, cum vel experimenta certissima mox ostendunt, opus illud Naturæ non aliâ excussâ, nec aliâ ratione reipsâ oriri; vel apertissimâ demonstratio evincit, nullo alio modo fieri, nisi eo, qui excogitatus jam fuerit per hypothesim.

## §. XVIII.

Ad Ideas, quod attinet, à mente per Abstractionem efformatas, quas jam *Cap. I.* definivimus, & explicavimus, plandè innumeri sunt errores iique aliquando magni momenti, in quos dilabuntur, qui juxta Ideas abstractas incauti, & citra examen de rebus judicant: quod quidem potissimum dictum volumus de iis Ideis abstractis, quæ genericæ nuncupantur; cujusmodi hæ sunt, *Animal; Planta, Vitium, Virtus, Scientia, Causa, &c.* Inter Ideas autem abstractas genericas speciatim in exemplum seligimus Ideam Causæ, Potentiæ, Facultatis, Aptitudinisve ad hoc, illudve efficiendum, aut patiendum: de quibus Ideis abstractis, & indeterminatis Causæ, Potentiæ, Facultatis, five Aptitudinis, ad hoc, illudve producendum, aut patiendum ostendere paucis volumus, eas passim occasione esse hominibus plurimorum, latissimeque patientium errorum.

Ut id cuique constet, animadvertimus primò, plures, disparesque effectus ab unâ, eâdemque causâ, potentiâve pro-

produci, patique posse, & reipsa ita passim contingere, adeoque non semper reipsa totidem esse distinctas facultates, & potentias in substantiis, quoti sunt effectus invicem varii, qui ab una eademque substantia producuntur, & patiuntur, *ex. gr.* una eademque animi nostri natura, apta, potens est ad amorem, odium, timorem, spem concipiendam, motumque in corpore producendum; & licet amor, odium, spes, timor, motus, dispares sint effectus, non tamen in animo sunt totidem facultates, non totidem sunt res, causæque distinctæ effectus illos dispares producentes, ejus nempe mera sola natura est id, quod & amat, & odit, & sperat, & timeret, & membra movet. Secundò adnotamus Ideas hasce abstractas, & genericas, id quod efficit, aut efficere potest, vel id quod patitur, aut pati potest, hunc, illumve effectum menti nostræ non ostendere, non repræsentare, quidnam sit id, seu quænam sit natura rei illius, quæ hunc, illumve effectum producere, vel pati potest: ita *ex. gr.* hæ Ideæ abstractæ, & genericæ; facultas percipiendi, facultas eligendi, &c. sive id quod eligere, id quod per-  
ci-

cipere potest, &c. hæc, inquam, Ideæ menti nostræ non exhibent, quid reipsâ sit id quod percipere, id quod eligere potest. Hisce positis ex his, quæ adnotavimus, primo loco constat eos temere, & perperam judicare, qui putant totidem res in substantiis verè existere; quotæ sunt Ideæ abstractæ Potentiarum, & Facultatum disparium effectuum producendorum, aut patiendorum: attamen ita plerumque homines sentiunt. *Ex. gr.* vix ullus est, qui non credat potentiam; facultatemve eligendi reipsâ distinctam esse à facultate percipiendi, & hanc à potentia reminiscendi, quamvis & id, quod cogitat, & id quod eligit, & id, quod reminiscitur, una, eademque res sit, nimirum una, eademque mentis nostræ natura.

Errores hosce homines declinarent, si Ideis abstractis, & indeterminatis Potentiæ, & Causæ non abuterentur, si videlicet de rebus juxta hujusmodi Ideas temerè, & inconsultò non judicarent; quod humani generis solemne vitium est; ut & in aliis Idearum classibus huc usque demonstravimus. Igitur cum, *ex. gr.* Idea hæc abstracta, & indeterminata, facultas  
lo-

loco movendi corporis membra; non eadem planè omninò sit; ac altera hæc Idea, sentiendi facultas. Hinc tanta est confidentia, quâ de rebus ex Ideis suis homines judicant, ut ne suspicentur quidem facultatem loco movendi corporis membra reipsâ eandem omninò esse, ac facultatem sentiendi, licet utique ita se res habeat.

Tunc ergo tantùm putandum est potèntias, facultatesque dispares effectus producendi, aut patiendi, quæ in uno, eodemque subjecto recipiuntur, res esse invicem diversas, cum rationibus inconcussis ostenditur id, per quod datum quodpiam phænomenon ab aliquâ re producitur; aut patitur, id ipsum esse non posse per quod aliud quodpiam phænomenon eadem illa res parit, aut patitur: *ex. gr.* putandum non est facultatem soporiferam Opii quidpiam esse reipsâ distinctum à facultate dolorum sedatrice ejusdem plantæ, nisi certissimis rationibus ostendatur non posse utrumque illud phænomenon ab unâ, eâdemque causâ, adeoque ab unâ, eâdemque facultate in Opio existente profluere.

Idem dictum volumus de aliis omnibus

bus tum Opii, tum cæterarum quarumcumque substantiarum proprietatibus.

Secundò cum, ut superiùs adnotavimus, Ideæ abstractæ, indeterminatæ Aptitudinis, Potentiæ, Causæ, Facultatisve, hoc illudve producendi, aut patiendi veram, genuinamque causarum, facultatum, aptitudinumve illarum naturam non repræsentent animo, manifestò inde sequitur, eos rectâ abuti ratione, qui putant facultates non communes peculiarium corporum quidpiam esse distinctum à materie, à legibus, quibus motus omnes Naturæ conficiuntur, & à figuris, texturis constitutionibus, conformationibusque mechanicis tenuissimarum particularum, quibus peculiaria quæque corpora, peculiari ratione intrinsecus fabrefacta, conformataque sunt.

At, inquiunt, hæ Ideæ, *ex. gr.* malleabilitas, ductilitas, fusilitas metallorum, utique differunt ab Ideâ materiæ, ab Ideis legum naturalium, juxta quas motus omnes peraguntur, & ab Ideis figurarum contexturæ, conformationis, dispositionisque particularum insensilium, quibus metallina corpora componuntur.

Verum cum Ideæ abstractæ, & inde-  
ter-



terminatæ, malleabilitas, ductilitas, fusilitas non attingant, non repræsentent menti, in quonam reipsâ sita, ac posita sit fusilitas, ductilitas, & malleabilitas metallorum, quis non videt eos temerè judicare ex Ideis illis abstractis, indeterminatisque abuti, qui putant memoratas illas proprietates ab intrinseco metallorum mechanico sistemate, ab intimis mechanicis affectionibus particularum, quibus metalla constituuntur, differre? Aliud Ideas abstractas facultatum, & proprietatum peculiarium corporum non easdem esse, ac Ideas mechanicarum affectionum materiæ, & legum naturalium, juxta quas motus omnes in materie conficiuntur; aliud verò est proprietates, facultatesque corporum non communes reipsâ quippiam esse ab omnibus mechanicis materiæ modificationibus, legibusque moruum distinctum.

Differunt quidem Idæ abstractæ Causarum, Potentiarum, Facultatum, ab Ideis mechanicarum affectionum, & legum materiæ, quia Idæ illæ abstractæ, mechanicas materiæ modificationes, & motuum leges menti non exhibent; at reipsâ, ut physicorum sapientissimi palam ostendunt

à mechanicis materiæ affectionibus , & legibus motuum phænomena omnia corporum non communia oriuntur , adeòque reipsâ , facultates , proprietatesque non communes corporum sitæ , ac positæ omninò sunt in variis mechanicis intimis constitutionibus , & conformationibus particularum , peculiaria corpora constituentium , quæque mechanicæ intrinsecæ constitutiones , sive intima mechanica constituentium particularum sistemata in variis corporibus varia sunt. Cum id non animadverterint veteres Philosophi pluri-  
mi , & potissimum Peripatetici , atque adeò Scholastici , innumeras fictitias res , innumera imaginaria , ut ajunt , entia , in rerum naturam invexerunt , quæ vulgaris Physicæ , vulgarisque Medicinæ utramque paginam implent.

Ex harum commentitiarum rerum numero , sunt Animæ vegetativæ , *ex. gr.* plantarum , & animalium ab eorum mechanismo , ab omnibus mechanicis materiæ affectionibus , & legibus motuum distinctæ , medicamentorum virtutes omnes , ut virtutes expultrices , altrices , concoctrices , soporiferæ , irritantes , corro-  
dentes , maciantes , aliæque innumerae ,  
quas

quas omnes, totidem qualitates seu totidem entia esse putarunt peculiare effectus producentia, & prorsus diversa, distinctaque à mechanicis omnibus materiæ modificationibus, ab omni particularum, quibus corpora constituuntur, mechanismo.

Ex eodem numero sunt, nimirum inter fictitias res accensendæ vitalis vis per omnem mundum diffusa, à Mechanicâ mundi constitutione, & motuum legibus distincta, materialisque mundi servatrix; virtutes plasticæ, sive efformatrices animalium, & plantarum ab omnibus mechanicis naturæ legibus prorsus diversæ; formæ, ut ajunt, substantiales in variis corporibus à materia distinctæ, quæ corporum omnium essentiam, naturamque constituent, quæque in causâ sint omnium phænomenon, & effectuum eorumdem corporum: quæ quidem omnia, nil aliud reipsâ sunt, nisi peculiare modificationes particularum peculiariora corpora constituentium, & leges motuum, quibus omnis materies obtemperat, & juxta quas phænomena universa fiunt, quæ in hac corporearum rerum universitate efficiuntur, ut à præstantio-

ribus ætatis nostræ & superioris Physicis, quisque discere penitus potest.

Atque hæc dicta sint satis de erroribus, quibus Idæ abstractæ, & indeterminatæ Causarum, Aptitudinum, Proprietatum, Potentiarum, Facultatumve, hoc, illudve efficiendi, aut patiendi occasione sunt iis, qui de rebus inconsultò, & perperam ex Ideis suis judicant, quod frequens nimium contingit.

## §. XIX.

Ad cæteras Ideas abstractas, quod atinet, generatim de iis monemus tantum, ne temerè, & imprudentes arbitremur, res illas, quæ per abstractionem, quasi ab omni alia re sejunctè, & seorsim considerantur, verè, ac physicè seorsim, sejunctasque existere, in quem errorem non rarè homines dilapsi sunt.

Ita, *ex. gr.* Platonici, & Scholastici omnes, exceptis Nominalibus, arbitrati sunt, unumquodque rerum genus existere seorsim ab omnibus iis speciebus, quæ sub ipsis generibus continentur, speciesque existere sejunctas ab omni differentiâ, ac generatim verè, ac reipsâ existere entia,

tia, ut ajunt, universalia, ut existere triangulum in genere ab omni peculiari triangulo distinctum, existere hominem in genere ab omni peculiari homine diversum, existere plantam in genere, animal in genere, substantiam in genere, sejunctim ab omni peculiari plantâ, peculiari animali, peculiarique substantiâ, pro quibus sententiis, utut manifestò absonis, & absurdis, tanquam pro aris, & focis, digladiabantur, & etiam nunc hodie in vulgaribus scholis pugnant.

Rursus non defuerunt, qui ineptè judicaverint superficies seorsim ab omni altitudine, longitudes seorsim ab omni latitudine, & mathematica puncta, nempe omni longitudine, latitudine, & altitudine spoliata, reipsâ existere, cujusmodi per abstractionem sejunctim à Mathematicis concipiuntur.

Denique virtutes etiam morum, ut justitiam, pietatem, fortitudinem, &c. totidem res esse haud pauci crediderunt per sese existentes, sejunctasque ab omni peculiari, & spiritali substantiâ, quales per abstractionem considerantur: hujus erroris insigne exemplum sunt Græci, & Romani, qui memoratas virtutes morum,

aliasque ejusmodi per sese existere, veluti totidem præstantes naturas existimaverunt ab omni peculiari spiritali substantiâ secretas, sejunctasque, quibus ideo virtutibus, Tempia, & Fana, veluti Deis sacrarunt, ut ex historia utriusque gentis patet, licet quælibet virtus, nil aliud reipsâ sit, nisi affectio, attributumve substantiæ alicujus cogitantis, & liberæ, quamvis mens eas, per abstractionem, quasi per sese, & seorsim existerent, contempletur, præscindendo ab omni substantiâ cogitante, & liberâ, cui pertineant, & cujus sint affectiones, & attributa.

## §. XX.

Ex his omnibus, quæ toto hoc Capite disseruimus, luculentissimum est eos falsum passim pro vero, dubium, incertumque pro certo, compertoque amplecti, qui citra examen, & inconsultò arbitrantur, res esse Ideis suis conformes, & ex Ideis, quas habent, rerum, nimis frequens de rebus ipsis judicant; quandoquidem, ut satis fuisse demonstravimus, cum Idææ à mente acquisitæ, & receptæ,  
non

non efformatæ, tum quæ mentis opus sunt, & ab animo efformatæ sunt, mirum quàm sæpe prorsus mendaces, spe verò suspectæ saltem habendæ sint.

Attamen tantùm abest, ut homines Ideis suis sæpe non fidant, quin potius generatim vix, aut ne vix quidem in animum inducere valent, posse res ab Ideis discrepare. Et sanè, non modo ita se res habere passim, citraque examen ducunt, ut eis apparent, ut eas concipiunt; verum etiam præterea eas non esse, eas non existere putant, quarum nullam habent Ideam.

Nil aliud, *ex gr.* in objecto quopiam percipiunt, & ideo nil aliud in illo esse opinantur; non cogitant Ideam quampiam inadæquatam, & rudem esse, & idcirco ducunt non esse adæquatam, & rudem: nesciunt quid opponi possit alicui opinioni, aut alicui actioni, & ideo credunt nil esse, quod opponi possit. Atque adeo ipsemet defectus, seu inopia, & si ita loqui fas est, ipsamet Idearum carentia communis errorum occasio est, & quidem cæterarum omnium perniciosissima, latissimèque patens, eâ enim sublatâ cæteræ quoque tollerentur,

nam nunquam erraremus , ut patet , si erroris illius Idea à nobis non abesset , cum erramus , sique non careremus unquam veris rerum perceptionibus.

Igitur perniciosissimus , fœcundissimusque error est (ut ubique temporum , & locorum fieri solet ab hominibus) , judicare ea non existere , ea non esse , quæ non percipiuntur , seu quorum nulla nobis obversatur Idea , idque verissimum est , & certissimum , sive de substantiis , sive de modificationibus , sive de relationibus sermo sit.

Ex hac potissimum erroneâ judicandi ratione factum est , ut homines putent cæterorum Ideas per omologos sensus acquisite , easque , quæ iisdem nominibus ab aliis designantur , simillimas in omnibus esse ; quia nimirum eis deest certæ hujus , gravissimæque veritatis Idea , videlicet quod sæpissimè hominum Ideæ , & notiones , non sibi satis invicem respondent , mutuòque simillimæ minimè sunt. Quod quidem certum , tutumque profectò est , quamvis de iis Ideis sermo sit , quæ per analogos sensus ab hominibus acquiruntur , deque iis , quas homines iisdem vocibus exprimunt , aut iis



vocabulis designant , quæ vulgò pro o-  
mologis , & æquipollentibus habentur ,  
quod paulò fusiùs demonstrandum est se-  
quenti Capite. Etenim plurimi interest  
in judicando de cæterorum hominum I-  
deis , à vero non aberrare , eorumque  
genuinam mentem introspicere ; quando-  
quidem si hoc in negotio erremus , malè  
de aliorum Ideis , atque adeò de aliorum  
judiciis , & ratiocinationibus judicabi-  
mus , de quibus æquam sententiam ferre  
non possumus , nisi quid ipsi sibi velint  
per voces illas , & locutiones , quas ad-  
hibent , prorsus intelligamus , proinde-  
que notiones illas , & disciplinas assequi  
non poterimus , quæ à scriptorum intel-  
lectione pendent , cujusmodi sunt univer-  
sa Philologia , Theologia dogmatica , sa-  
crarum Litterarum scientia , & accuratio-  
rum Civilis , tum Ecclesiastica Jurispru-  
dencia.

Deflectant autem passim necesse est ab  
aliorum mente , & notionibus , ut supe-  
rius innuimus , qui generatim sine cri-  
tico examine , & inconsultò putant, Ideas  
hominum per eosdem sensus acquisitas si-  
millimas esse , easque mutuò sibi planè  
respondere , quæ ab hominibus iisdem

vocabulis designantur, aut iis vocibus, & locutionibus exprimuntur, quæ vulgò à Grammaticis, & Lexicographis philosophicæ criticæ imperitis pro æquipollentibus traduntur, & incautis venditantur, ut ex his, quæ secuntur, manifestò quisque intelliget.

## CAPUT X.

*De Vocibus.*

**D**Ocuimus superiori Capite, paragrapho finali, Ideas nostras, seu potius deficientiam, defectumque in hominibus Idearum non mendacium, occasionem esse vulgari opinioni de omnimodâ in omnium hominum animis conformitate notionum, perceptionumve per omologos sensus acquisitarum, deque communi similitudine Idearum illarum omnium; quas homines exprimunt iisdem vocibus, aut vocabulis, quæ vulgò in Lexicis, & à Grammaticis pro æquipollentibus traduntur.

Ostendendum nunc paucis est, jure, meritòque nos opinionem hanc pronunciasse inter graviores, foecundioresque er-

ro-

tores esse accensendam ; demonstrandum nimirum est , quàm sæpissimè homines easdem Ideas non adnectere iisdem vocibus , seu eadem Idearum signa adhibere , nec tamen idem intelligere ; eaque vocabula , siue ejusdem , siue disparium linguarum , quæ pro æquipollentibus , & omologis vulgò creduntur in Lexicorum , & Grammaticorum fidem , reipsâ nec synonyma , nec prorsus æquipollentia esse , quæ quidem , ut luculentius appareant , varias vocum classes variis Idearum classibus respondentes , quàm fieri possit expeditissimè ad examen revocabimus ; Et primò ad voces , quod attinet , quibus sensationes significantur , manifestum est eas in plurium hominum ore non idem sonare aut saltem rarò ; homines enim voces adhibent ad id significandum , quod percipiunt ; ergo si per omologos sensus ab iisdem objectis dispares sensationes , perceptionesque in pluribus excitentur , non idem omnes utique iisdem vocibus significabunt. Atqui reipsâ ab iisdem objectis dispares sensationes , perceptionesque producuntur in plurium hominum animis per sensus ejusdem nominis , ut superiori Capite de unoquoque sensu satis fuscè ostent-

tendimus ; ergo voces , quibus sensationes exprimimus per omologos sensus acquisitas , & ab iisdem objectis excitatas non idem significabunt in omnium ore. Ita, *ex. gr.* omnes latinè loquentes mellis saporem dulcem appellant , aloës amarum , fructûs immaturi asperum , cinnamomi aromaticum , &c. at cum corpora non omnium hominum gustum æquè afficiant , vocibus illis dulcis , amarus , asper , &c. non idem intelligunt ; qui enim eas adhibent , exprimere ipsis volunt sapores illos , quos experiuntur , qui in variis varii sunt , & nemo unquam certò scire poterit , an in duobus iisdem omnino sint.

Idem dicendum de vocibus , quibus odores , & colores significantur , quæ sensationes & ipsæ non omninò planè similes sunt , licet ab iisdem causis excitentur ; ac generatim de nullâ ex vocibus , quibus sensationes significantur , constat eam idem in pluribus significare , quia de nullâ sensatione constare potest , an eadem prorsus in pluribus sit , eoque minus , an eadem prorsus sit in omnibus , aut in hoc , illove determinato homine , ut innuimus superiùs laudato Capite , ubi  
de

de Ideis per sensus acquisitis differebamus.

Quoties ergo constat eadem objecta non easdem Ideas in omnibus excitare ministerio sensuum, toties certum est per easdem voces non omnes idem intelligere; quisque enim per voces illas designare vult id, quod percipit, quale ei apparet.

### §. I.

Ostendamus jam homines vocibus, quibus substantias tum sensiles, tum insensiles exprimunt, non easdem prorsus ideas adligare, sed varii varias: quod utique per sese patebit, si demonstrabimus non omnes homines earumdem substantiarum easdem planè Ideas habere.

Primò igitur ad insensiles substantias, quod attinet, profectò non omnes, qui, *ex. gr.* vocem hanc *Deus* adhibent, aut alia vocabula sive Latini, seu alterius cujusvis idiomatis, quæ voci illi synonima, & æquipollentia vulgò creduntur, non, inquam, utique omnes eandem Ideam nomini illi adnectunt, non omnes idem intelligunt; alii quippe voce illâ u-

tun-

tuntur ad significandam Naturam necessariò existentem, incorpoream, numeris omnibus absolutissimam, cæterarum rerum opificem, hominum parentem optimam, quæ nunquam illis benefacere desinat, quæ reis resipiscentibus faciliè parcat, nec libenter pœnas infligat : ita de Deo cogitant sapientes viri, & purioris Theologiæ periti.

Alii per eandem vocem illam *Dens*, Naturam intelligunt omnium quidem præstantissimam, & maximam, at in iram pronam, de minimis etiam ceremoniis plurimum sollicitam; vindictæ cupidam, inexorabilem, ex arbitrio damnantem; vocem illam *Dens*, in hunc sensum adhibent superstitiosi homines, & pejori Theologiæ fueti : Alii id, quod Deum appellant, Naturam esse putant omnium summam, at corpore indutam, majestate gravi, at perspicacissimis sensibus præditam. Ita *Deum* concipiunt indocti homines passim. Philosophi autem veteres non idem & ipsi intelligebant per eandem illam vocem *Dens*; Aliud quippe significat apud Platonicos, & Pithagoricos, aliud penes Stoïcos, aliud penes Epicureos.

Quod

Quod si scrutetur quid significarent veteres Ethnici Populi per eandem vocem illam *Dess*, aut Numen, mirum quàm varias Ideas vocabulo illi adnectebant, quamque dissonas ab Ideâ illâ, quam nos de naturâ divinâ, ejusque attributis habemus. Enimvero Dei vocabulo appellare consueverant quidquid esset humanâ naturâ præstantius; hinc Deum appellabant naturas etiam illas, quas ab aliâ prognatas esse putabant, ut constat ex initio Theogoniæ Hesiodi, & ex Metamorphosis Ovidii, & ex Apollodoro *Lib. I*, qui vetustissimas Græcorum, & Romanorum religiones, & Theologiam complectuntur. Cum autem in eâ opinione essent, ut plures existerent naturæ, humanâ nostrâ excellentiores, & earum aliæ præstantiores aliis, & perfectiores essent, hinc & plures Deos esse dicebant, & eos disparis ordinis, & dignitatis, neque enim Diis superis Medioximos, aut Inferos æquabant. Præterea alias etiam naturas existere dicebant hominibus longe quidem potentiores, at malas, iniquas hominum hostes, quas etiam Deos appellabant, & colebant, ne infestæ essent, juxta Labeonis monitum, & propitiabantur cædibus,

trif-

tristibusque supplicationibus, ut fidem facit Plutarchus de superstitione. Qui verò Deus optimus maximus dicebatur, ex communi quidem mente Græcorum, & Romanorum, non illa erat ipsa Natura summa, optima, æterna, & numeris omnibus absolutissima, quam nos *Dei* vocabulo intelligimus.

Hinc satis constat non omnes uti, nec usos fuisse hâc voce *Deus*, aut similibus ad unum, idemque objectum significandum.

Id ipsum dictum volumus de hisce vocibus, *animus*, *spiritus*, *mens humana*, *Angelus*, aliisque hujusmodi vocabulis, quibus substantiæ inconspiciæ, insensilesque à divinâ Naturâ distinctæ exprimi à nobis solent; hæc enim nomina & ipsa non uno, eodemque sensu intelligenda sunt, quocumque occurrant apud scriptores, & in omnium ore, quandoquidem non omnes idem sentiunt, non idem opinantur (præsertim si de veteribus Ethnicis Scriptoribus sermo sit) de animis, de mente humanâ, de aliis spiritibus, ut ostendi facillè potest, veterum, & recentiorum Ideas circa hujusmodi naturas exponendo. At nimii essemus, si hæc omnia



nia prosequi vellemus. Sufficiat ergo rem indigitasse, ne quis communi usu harum vocum apud veteres & recentiores, decipiatur, putans citra examen, omnes, qui illas adhibent, eas eodem sensu indiscriminatim usurpare.

## § II.

Verum non modo Ideæ hominum ad inconspicuas substantias pertinentes, satis dispares, & variæ invicem sunt, licet homines ea, aut similia vocabula adhibeant ad naturas illas sensiles, quales eas concipiunt, significandas; sed & Ideæ, quas habent corporearum substantiarum, non prorsus similes in omnibus sunt, quamvis omnes iisdem, aut similibus nominibus utantur ad varia corpora, qualia ea animo concipiunt, exprimenda.

Patet id luculentissimè satis obvio, & familiari experimento: si enim plures homines uti singuli, ut definiant, rogentur quid intelligant cum specifica corporum nomina proferunt, *ex gr.* quid intelligant per hasce voces, aurum, adamas, magnes, corallum, lilium, quercus, equus, &c. manifestò quisque statim deprehendit eos

M

se-

sæpe, & sæpius in nominibus illis definiendis non bene invicem convenire, quamvis in vocibus conveniant. Alii plures, & perfectiores Ideas complectuntur, alii pauciores, & rudiores, & varii varias.

Qui multiplicibus, & accuratissimis experimentis, & observationibus corporeas substantias, earumque proprietates, & attributa scrutati sunt, quique ab iis edocti sunt, qui substantiarum illarum quàm diligentissimè, & multiplici ratione per-vestigarunt affectiones, & proprietates longè ampliores, & perfectiores Ideas corporearum substantiarum sibi efformarunt, ac ii, qui vix quidem aliud noscunt, ad corporeas naturas, quod attinet, nisi id, quod corpora oculis, cæterisque sensibus offerunt.

Qui sciunt, *ex. gr.* quæ de metallorum, mineralium, fossilium, lapidum, ac gemmarum naturâ, à recentioribus cognita, ac resecta sunt, longè aliter corporum illorum specifica nomina definiunt, ac cæteri. Qui callent pulcherrima recentiorum inventa, vel ad solam mechanicam plantarum, & animalium constitutionem, vel ad solam hujusmodi corporum originem, æconomiam, & nutritionem, quod attinet,

net, profectò longè plura complectuntur; cum plantarum, & animalium nomina explicant, longè copiosiores, & politiores Ideas nominibus illis adligant, ac qui inventa illa ignorant, aut qui animalium Ideas sibi efformarunt ex Aristotele tantum, & veterum sæculorum physicis, plantarumque notiones sibi compararunt ex solis Theophrasto, Dioscoride, & Plinio.

Rursus, qui variis Physicorum Sectis nomen dederunt, qui varias hypotheses amplexi sunt ad naturalia corpora quod attinet, utique variè de corporibus cogitant, varia in corporibus imaginantur, atque adeò varias Ideas corporearum substantiarum animo complectuntur. Proindeque si eis definienda essent specifica corporum nomina, sanè dispari ratione ea definirent.

Ita, *ex. gr.* si Scholasticus rogetur ut vocem hanc *lux* definiat, ait se per vocem illam intelligere qualitatem quamdam conspicuam solis, astrorum, ignis, &c. distinctam à materiâ, & naturâ corporum lucidorum, quæ in uno, eodemque instanti à corpore lucido ad longinqua usque corpora propagatur: interrogetur Car-

tesianus, statim respondet, *lux* est materies primi elementi, seu materia ætherea constans particulis quam tenuissimis, & homogeneis omnia pervadens, ubique semper præsens, & à corporibus, quæ luminosa dicuntur compressa, & in tremulum motum concitata.

Newtonianus è contra lucem ita describit: materies fluidissima, & tenuissima à corporibus lucidis emanans, rapidissima quidem, at quæ successivè propagatur, & aliquid temporis insumit in percurrentis spatiis, constans radiis heterogeneis, seu seriebus insensilium particularum disparis naturæ, quæ series, quæ radii non eandem omnes refrangibilitatem, nec eandem reflexibilitatem habent, &c. Innumera alia exempla datâ operâ omittimus. Si igitur homines in definiendis nominibus corporearum substantiarum passim non conveniunt, consequens est hujusmodi nomina non idem prorsus in omnium ore significare; quandoquidem, ut ostendimus, cum homines eadem illa substantiarum corporearum nomina adhibent, alii arctiores, alii ampliores, & politiores, & varii varias Ideas circa substantias illas omnino complectuntur, & significare volunt  
pro

pro variâ corporum cognitione, quam habent, variisque hypothefibus, & fententiis phyficis, quas amplectuntur, & juxta quas, peculiaria corpora, corporumque species varias concipiunt, & imaginantur.

Hinc temerè, & citra prævium criticum examen arbitrari debet nemo eandem illam potestatem, & fignificationem, quam ipfe tribuit corporum nominibus, eandem illam, inquam, nullatenus diffimilem à cæteris quoque hominibus vocibus illis tribui, dum eas adhibent.

### §. III.

Quæ de nominibus intellectualityum, & fenfilium fubftantiarum fuperiori paragra-pho docuimus, eadem monenda nobis funt de vocibus, quibus variæ collectiones, & complexus modorum, feu modificationum fignificantur, cujusmodi, *ex gr.* funt hæ voces Vitium, Virtus, Pietas, Sanctitas, Juftitia, Lex, Obligatio, Amor, Ira, &c. aliæque id generis innumeræ, quibus non fubftantia quæpiam corporea, aut incorporea, non fubftantiarum fpecies aliqua, fed modorum, feu modificationum complexus varii, & collectiones ex-

182 RATIONALIS PHILOSOPHIÆ  
primuntur, ut adnotavimus *Cap. I. ubi  
de Idearum Classibus.*

Hæc igitur nomina non unam omninò ;  
eamdemque habent significationem in om-  
nium ore, siue non omnes, dum voces  
illas adhibent, complectuntur animo eam-  
dem prorsus modificationum collectionem,  
sed alii plures, alii pauciores Ideas nomi-  
nibus illis adligant, alii clariores, alii obs-  
curiores, & varii varias. Constat hoc  
ex definitionibus, quibus homines expli-  
cant, si rogentur quid per voces illas,  
Virtus, Vitium, Justitia, Pietas, Mi-  
sericordia, & ejusdem generis reliquas in-  
telligant: ex quibus definitionibus faciliè  
apparet, rarò admodum in significatione  
vorum illarum plures omninò, & ex in-  
tegro convenire.

Ad veteres autem quod attinet, qui  
voces memoratas, ejusdemque generis cæ-  
teras, nobis explicare, & definire non  
possunt, cum non vivant, ex eorum  
scriptis, & opinionibus luculenter evin-  
citur, sæpè eos in Ideis, quas animo com-  
plectebantur, dum vocabula illa, aut si-  
milis adhibebant, nec invicem, nec no-  
biscum prorsus convenire.

Rem aliquot exemplis illustremus de-  
sump-

sumptis ex nominibus, quibus virtutes, aut vitia significantur. Et quidem ut ex historiis opinionum, morum, & religionum hominum liquidò apparet, non eadem omnibus honesta sunt, aut turpia, non eadem omnibus pia, aut impia, iusta, & æqua, aut iniusta, & iniqua, non eadem omnibus vitia, aut virtutes, laude digna sunt, aut vituperio.

Lacædemoniis, *ex. gr.* id unum honestum simpliciter, & iustum erat, quod eorum patriæ conducebat, ut patet ex Plutarco in Alcibiade, ne alios scriptores appellemus. Romanorum iustitia longè abest & ipsa ab Ideâ illâ iustitiæ quam nobis divinæ Litteræ tradunt; iustitiæ primum munus est, ait *Cic. Officiorum Lib. I. Cap. 27.* ne cui quis noceat, nisi laceratus injuriâ: poterat ergo homo Romano more iustus privatis opibus injuriis sibi illatis ulcisci per sese, ut ex eorum historiis manifestò eruitur. Rursus iustitiæ nihil officere putabant Romani post indictum per Feciales bellum, hostiles agros invadere, omnia ferro igneque vastare pro arbitrio, non pro modulo, & ad pondus injuriæ à P. R. acceptæ, quæ nunquam tam levis à Romanis habebatur,

ut non esset armis in vastissimarum Provinciarum incolas , cæteroquin innocuos vindicanda.

Hinc nimiam in hostes Romanorum sævitiam carpit Tacitus in Vitâ Agricolæ , cui consonat Sallustius initio Belli Catilinarîi: Præterea si quis Populus à P. R. Sociis laceffitus erat injuriâ , Romani populum illum rogabant , ut sibi injuriam acceptam condonarent , quod si renuisset , opes Romanas in eum vertebant , idque æquum , justumque putabant.

Rursus , Romani à pietate , & misericordiâ non arbitrabantur alienos Gladiatorum ludos , quibus captivos per risum , & populi voluptatem damnabant ; cæde igitur innocentum hominum gaudere , feris innocuos laniandos tradere , & promiscuis hominum vulneribus delectari , nec impium , nec immane , penes Romanos erat , immo hujusmodi ludi omni frequentiâ & omni hominum genere celebrabantur , ut ait Cic. in *Oratione pro Publio Sextio* , nec quis ideo immitis , immanisque , aut pietatis & miserationis expers vulgò habebatur. At impius , & barbarus mos hic aliquibus videbatur , inter quos Petronius Arbiter in *Poëmate de Bello Civili* ; Seneca *Lib. VII. Ep. V.* alique.

Lu-



Ludos hosce à misericordiâ quàm maxime alienos ducebat Dæmonax etiam, & cum ipso Græci fere omnes, exceptis Corinthiis; Judæi verò ne reos quidem nedum infontes homines pati poterant objici feris; impium enim eis videbatur objicere feris homines, ut hujusmodi spectaculo alii homines delectarentur, ut narrat Josephus, *Antiq. Jud. Lib. XV. Cap. II.*

Quàm autem Gladiatorum ludi, & spectacula discrepent ab Ideâ pietatis, & misericordiæ quam Christiani ab Evangelio hauriunt, nemo non novit, nisi cui ignota prorsus sit Christiana Religio. Denique Comitatis, Urbanitatis, Humanitatis, vocabula, quæque ipsis omologa, & æquipollentia vulgò habentur, non apud omnes gentes, nec apud omnes ætates idem prorsus sonant, quæ enim ab aliqua gente, Comitatis, Urbanitatis officia dicuntur, ab aliis damnantur, & vitio vertuntur. Ita Venones abjecti animi dicebatur Parthis, qui Romanis, penes quos educatus fuerat, humanus, urbanusque appellatus fuisset, ut adnotat Tacitus, *Annalium Lib. II. Cap. 2.* ait enim de Venone Partho, prompti aditus, obvia comitas, ignotæ Parthis virtutes

nova vitia, & quæ ipsorum moribus aliena, perinde odium pravis, & honestis. Plura alia exempla omittimus, satis quippe apparet sæpe eadem vocabula, aut voces pro æquipollentibus vulgò habitas, per quas virtutes, aut vitia exprimi solent, non idem omninò apud omnes cujusvis gentis, & temporis homines significare, nec proinde apud omnes promiscuè scriptores intelligendas esse eodem sensu, aut ex nostro usu, & ex Ideis nostris, nisi velimus pluries hisce in casibus à vero aberrare.

## § IV.

Eadem monenda nobis occurrunt de nominibus, quibus objecta composita arte facta significantur. Exemplo sint primum hæ voces *munitum oppidum*, quæque his omologæ putantur, quibus veteres usi sunt, & nos quoque utimur: voces illæ penes nos significant domorum multitudinem, quibus singulis pateat accessus, ministerio viarum, quæque communibus moeniis, & plerumque fossâ circumclusæ sint; id ipsum fere significant aliatæ voces apud plures nostrorum, & præ-

te-

teritorum temporum gentes ; at si quis voces hujusmodi in historiis, *ex. gr.* veterum Britannorum, ex nostrâ praxi, & usu intelligeret, à vero plurimum declinaret ; Britannis enim munita oppida dicebantur silvæ vallo, & fossâ circumscriptæ, quo ad eludendos hostium incursus convenire consueverant, ut narrat Cæsar, *Lib. V. Cap. 21.*

Rursus, voces navis, triremis, aliæque id generis, quæque ipsis æquipollentes vulgò à Lexicographis constituuntur, ejusdem sunt naturæ. Qui enim sibi navium, & triremium Ideas ex nostro usu efformarunt, si juxta hasce Ideas, & ad usûs nostri normam voces illas, similesve apud veteres scriptores occurrentes intelligerent, utique deciperentur, & à veterum mente aberrarent ; neque enim naves veterum Græcorum, *ex. gr.* & Romanorum eâdem ratione constitutæ, & conformatæ erant. In usu quidem erant apud Veteres naves onerariæ, bellicæ, & actuariæ, sive celeriores, & expeditiores ; erant quæ velis tantum, quæ tantum remis, & quæ velis, & remis simul agebantur, quæ navium genera & apud nos sunt, at cum nostris non conveniebant multiplici ratione,

ne, licet satis compertum non sit quousque omninò à nostris discrepaverint; neque enim Veteres ullam nobis reliquerunt satis accuratam navium suarum descriptionem, ex quo fit ut plura à nobis non intelligantur, quæ à veteribus scriptoribus de classibus suis narrantur.

Occurrunt etiam sæpe apud veteres historicos hæ locutiones, quæ à nobis etiam adhibentur, *navale prælium*, *instructa militum acies*, *militaris disciplina*, aliarque hujusmodi, quæque ipsis æquipollere vulgò putantur; at non prorsus ex usu nostro, & temporum nostrorum praxi, adeoque non prorsus juxta Ideas nostras intelligendæ locutiones illæ sunt, apud cujusvis gentis, & temporis Scriptores, immò apud nullum ex veteribus ad normam nostrorum temporum sunt interpretandæ: etenim à veteribus terrâ, marique prælia non gerebantur, eâ prorsus, quæ penes nos in usu est, ratione, non eodem modo instruebantur acies, non eadem bellandi ars, non eadem disciplina servabatur, ut facile colligere est ex his, quæ Justus Lipsius de militiâ Romanorum pedestri, Joannes Schefferus, & Marcus Meibomius de militiâ navali, alique tradiderunt, qui de

de militari Veterum arte , & bellandi rationibus agunt.

Idem dicendum de pluribus vocabulis , & locutionibus ad indumenta significanda pertinentibus , cujusmodi , *ex. gr.* sunt hæ voces , pallium , toga , pileum , calceus , &c. sæpe etenim & veteres , & recentiores iisdem , aut pro omologis habitis locutionibus , & vocabulis utuntur ad plura hominum indumenta designanda , licet satis sit discriminis in indumentis ipsis apud varias gentes , variaque tempora , si invicem comparentur , ut ostendunt Balduinus de Calceo antiquo , & Julius Nigronius de Caligâ Veterum , Octavius Ferrarius vir eruditissimus de re vestiariâ , in quibus frequentia occurrunt exempla , quæ ostendunt veteres sæpe adhibuisse ea vocabula , & locutiones , ad indumenta significanda quibus hodie æquè utimur , quamvis indumenta , quæ per hujusmodi voces intelligimus , satis differant ab iis , quæ à Veteribus designabantur , cum voces illas adhibebant.

Sunt & aliæ plurimæ voces ad artefacta exprimenda à veteribus usitatæ , quas & nos adhibemus ; quamvis non idem prorsus per eas significemus , quod olim veteres.

teres per easdem intelligebant ; ex harum numero sunt , *ex. gr.* hæc vocabula , *Ara* , *Altare* , *Theatrum* , *Scæna*. Altaria apud veteres aris imponebantur , ut colligere est ex Prudentio , aliisque : hinc liquet altaris , & aræ nomina non idipsum olim significasse , ac hodie penes nos sonant ; neque enim id quod altare à nobis dicitur , quicquam est superimpositum aris , immò hæ voces *ara* , & *altare* , hodie promiscuè usurpantur.

Altaria etiam Judæorum satis discrepabant à nostris , tum illud , quod altare incensi dicebatur , tum quod holocaustorum nomine appellabatur , quorum prius describit Moses , *Cap. XXX. vers 12* , & 34. secundum describit Ezechiel , *Cap. 43*.

Theatra autem , & Scænas Veterum non idem prorsus fuisse , ac id , quod à nobis ex usitatâ praxi Scæna , & Theatrum nuncupatur , satis apparet ex Plinio *Lib. XXXVI. Cap. 15*. & ex Calliachi erudito Opere de *Ludis Veterum Scænicis*. Hinc cum voces illæ , aut eis similes in Veterum scriptis occurrunt , intelligendæ perperam non sunt ex nostrorum temporum usu , & ex Ideis nostris.

Alia

Alia innumera prætermittimus exempla , satis quippe est , paragraphi hujus thesim exposuisse , & aliquot exemplis illustrasse.

## §. V.

Nullæ autem voces, locutionesve sunt tam sæpe æquivocæ , tamque frequenter ex Ideis nostris apud omnes non intelligendæ , quàm sint voces illæ , & locutiones , quæ non absolutum sensum , sed tantùm relativum continent ; ea nimirum vocabula , quæ attributum quodpiam significant , quod tale est relatè tantùm ad aliquod objectum , aut ad aliquam Ideam , cujusmodi , *ex gr.* sunt voces omnes , quibus homines indeterminatam magnitudinem , aut exiguitatem significant alicujus rei , qualiscumque sit , ut *onus grave , longa via , mons ingens , profunda vallis , opus difficile , &c.* ejusdem etiam generis sunt , nempe inter voces relativas accensenda vocabula omnia , & locutiones , quibus attributa laudis , aut vituperii , contemptûs , aut existimationis exprimuntur , ut *eximia virtus , excellens ingenium , vasta eruditio , homo sanc-*

*sanctissimus innocentissimus, justissimus, turpis, aut inhonesta actio, &c.* quæ quidem voces, aliæque hujusmodi universæ utique non ubique temporum, & locorum, nec apud omnes idem prorsus significant.

Et sanè primùm ad voces, quod attinet, quibus magnitudo, aut exiguitas rerum significatur, profectò eadem, & constans non est apud omnes, nec omni in loco earum significatio; namque relatè ad aliquid ingentia sunt, relatè ad aliud exigua sunt, & vice versâ, ita quod grave est onus puero, fæminæ, infirmo, gracili, leve est viro toroso, & bona valetudine gaudenti; levis hasta erat Achilli, quæ Omphalæ gravissima fuit, levis clava Herculi, quam alius vibrare vix potuisset; via, quæ aspera est, & incommoda delicatioribus, & tenuibus calceis indutis, satis commoda, & plana est suctis pejoribus; opus quod parum experto arduum est, facile est perito: urbs, mons, fluvius, regio, quæ ingens ei est, qui majores non novit, haud ingens, vel etiam parva iis, qui ampliores viderunt: Maffinissa Numidiæ Rex, qui ultra nonagesimum vixit annum, lon-  
ga-



gævus ab historicis nuncupatur , e contra verò Jacobus Patriarcha , etsi ultra centesimum trigessimum ætatis annum vixisset , cum Regem Ægypti alloquebatur , attamen vitæ suæ dies breves fuisse dixit ; nimirum Massinissa longævus dici poterat relatè ad ætatem , quam ut plurimum tunc temporis vivebant homines , Jacobi autem transacta ætas brevis appellari tunc jure poterat relatè ad ætatem , ad quam ut plurimum sui ævi homines pertinebant.

Rursus , exercitus , qui Græcis ingentes dicebantur , apud Persas tenuissimi dicti fuissent.

Ad voces autem , quod spectat , laudis , aut vituperii , existimationis , aut contemptûs , manifestum est relativas esse ad Ideas , & opiniones eorum , qui laudant , aut contemnunt , & carpunt.

Hinc quæ ab aliquo laudantur , ab alio probris , & vituperio digna dicuntur ; qui sanctus , pius , castus , honestus est relatè ad Ideas , quas quis habet earum virtutum , nomina illa non meretur relatè ad Ideas , quas alter habet virtutum earundem.

Turpe non erat , *ex. gr.* penes Lacedæmonas cum industriâ , & sagacitate furari ,

ri , honestum erat Atheniensibus sorores germanas habere in matrimonium.

Laudi in Græciâ ducebatur adolescentulis , quamplurimos habere amatores ; in scenam verò prodire , & populis spectaculo esse nemini apud Græcos erat turpitudini , ne nobilibus quidem fœminis , etsi in scenam irent mercede conductæ ; à quibus penes Romanos , aliasque gentes , qui non abstinebant , nec honesti , nec probi , nec turpitudinis expertes dici poterant , neque à nobis dicerentur.

E contra honestum erat apud Romanos , aliosque , ut & apud nos honestum est , uxores ducere in convivium , nec turpe , & inhonestum Romanis Matronis erat , quemadmodum , nec nostris fœminis pudori vertitur primas partes ædium tenere , & in celebritate versari ; at inhonestatis , & turpitudinis notâ taxabantur penes Græcos uxores , quæ in conviviis accubuiſſent , nisi inter propinquiores celebrarentur , quæque in penitioribus ædium cubiculis non versabantur , quo accedere nemo poterat , nisi proximâ consanguinitate conjunctus , ut refert Cornelius Nepos de excellentibus Græcorum Imperatoribus , in præfatione ad Atticum ,

&c

& Græca Historia ostendit. Denique hæ voces *eruditus*, *doctus*, *sapiens*, &c. aliud in ore hominis sapientioris, aliud in ore indoctioris sonant, aliud penes homines unius ætatis, & gentis, aliud penes alias gentes, alioque tempore: quæ enim eruditio, & scientia admiranda est, & præclara relatè ad aliquod tempus, aut, imperito, eadem vulgaris est, exilis, jejuna, & falsa sapienti, & aliis temporibus. Atque hæc dicta sint satis ad voces, quod attinet, quæ non absolutum, sed relativum tantum sensum complectuntur.

Ex his autem, quæ hoc paragrapho differuimus, manifestò patet, primò vocabula, quibus indefinita magnitudo, & indeterminata exiguitas rerum significatur, intelligi non posse ad mentem eorum, qui ea adhibent, nisi aliunde constet, quònam mente respiciant, dum aliquid ingens, vel exiguum dicunt, seu relatè ad quodnam objectum loquantur.

Secundò voces laudis, existimationis, vituperii, reprehensionis, contemptûs, aliasve hujusmodi, probè, rectèque intelligi in aliorum ore, & scriptis non posse, nisi aliunde nobis notæ sint. Ideæ,  
N 2                      quas

196 RATIONALIS PHILOSOPHIÆ  
quas ipsi habent, aut habebant, dum vi-  
verent, earum rerum; quas laudant, aut  
reprehendunt.

## §. VI.

Denique animadvertendum ducimus an-  
tequam à vocibus ad alia transeamus,  
vocabula, & locutiones, quæ à nobis  
metaphorico, & figurato sensu usurpan-  
tur; non semper indiscriminatim, citra-  
que examen putandum esse eas à cæteris  
quoque hominibus tropico, ac figurato  
sensu adhiberi ubique temporum, & lo-  
corum; si de iis rebus sermo sit, quæ  
non obviæ cuique sint, sed aut inconspi-  
cuæ, & insensibiles, aut obscuræ suâ  
te naturâ, & varietati opinionum ob-  
noxie.

Quid sint tropicæ, & metaphoricæ lo-  
cutiones, docent Rhetores, & nemo  
ignorat tum translâtè, & metaphoricè  
nos loqui, cum voces, quæ ex pri-  
migeniâ institutione linguæ, ad aliquid  
propriè significandum inventæ sunt, &  
constitutæ, transferuntur ad alias res  
impropriè exprimendas: ita, ex. gr. per-  
turbari propriè dicuntur fluida corpora,  
quo-

quorum constituentes particulæ fus. de-  
que agitantur, translatae vero & metapho-  
ricè animus perturbari, perturbatusque  
dicitur, cum in ipso affectus aliquis vi-  
vidior excitatur, ut odium, ira, timor;  
eâdem ratione risus propriè hominibus  
competit, & de hominibus dicitur, me-  
taphoricè verò de sereno aëre, & pratis  
verno tempore. Cum tropicè quis loqui-  
tur de rebus sensibus obviis, statim meta-  
phora per sese apparet, at cum sermo est  
de rebus inconspicuis, & obscuris,  
sensibusque non obversantibus, non sta-  
tim innotescit, an qui loquitur, meta-  
phoricè, vel potius propriè loquatur,  
cum præsertim veteres scriptores legi-  
mus.

Ita, ex. gr. cum in veteri auctore oc-  
currunt hæ voces *efflare animam*, nisi  
aliunde ejus opinio de animis innotescat  
quisnam citra erroris periculum pronun-  
ciare potest, utrum reipsa animum te-  
nuissimum flatum, aut ætherem esse cre-  
diderit (ut plures ex veteribus arbitrati  
sunt), & propriè locutus fuerit, cum  
quempiam efflasse animam ait, an potius  
per metaphoram animum per flatûs ima-  
ginem expresserit? Virgilius *Æneadum*,

*Lib. IX. Vers 349*, Tætum vulnere impetitum, morientemque describens ait. *Purpuream vomit ille animam*, Homerum imitatus *Iliade*, *Lib. V. Vers 83*, quibus verbis non statim intelligitur, an propriè loquatur, & ex eorum sententiâ sit, penes quos animus tenuior sanguinis pars est, an metaphoricè sanguinem appellet animam, quia sanguis æquè, ac anima, ad vitam hanc agenda necessariis nobis est.

Penes nos quidem locutio hæc, *purpuream vomit ille animam*, metaphorica utique esset, at non ideo putandum est eam esse metaphoricam etiam apud veteres indiscriminatim, qui ut plurimum non idem, ac nos, de animâ senserunt, non eadem de animis cogitarunt, & crediderunt. Idem *Virg. Egl. VI. Vers. 32.* ait :

*Namque canebat uti magnum per inane  
coacta*

*Semina, terrarumque, animæque, maris  
fuisse,*

*Et liquidi simul ignis. . . . .*

Ubi quoque nisi aliunde perspectum sit  
quid

quid de animis senserit Vates, scire non possumus, an propriè loquatur de seminibus, seu principiis constituentibus, ex quibus animæ coalescere, & effici quidam ex veteribus opinabantur, an potius de particulis purum aërem constituentibus loqui velit, quem aërem tropicè, & translata animam appellet, ut & alii aërem vocant spiritum, teste Plinio, *Lib. II. Cap. 5.*

Rursus non illico apparet, & primâ fronte, an hæc locutio, *Spiritus ira*, qui Judith octavo, *Vers 3.* occurrit, quique Ephäimitas occupaverat, mox à Gedeone victus, & lenitus, *Spiritus Zelotipie*, *Spiritus carnis*, aliæque hujusmodi locutiones, quæ præsertim in sacris Litteris huc, illuc leguntur, metaphoricæ sint, & tantum varios animi affectus designent, nempe iram, zelum, libidinem, &c. an potius spiritus quosdam, seu substantias quasdam ex spirituum genere affectus illos animi excitantes, & foventes; ac nisi aliunde retegatur mens sacrorum Scriptorum, certò, tutòque decerni non potest, quid ipsi senserint, cum locutiones illas adhibuerunt, atque adeo an penes ipsos metaphoricæ sint, an potius obvio sensu,

&, ut ajunt, ad calcem literæ intelligendæ.

Memoratis locutionibus adscribendæ sunt, quæ apud Philosophos veteres occurrunt de Deo loquentes, humano quodam more, eique tribuentes, quæ hominibus conveniunt. Nisi enim aliunde constet hosce fuisse reipsâ anthropomorphitas, & de Deo sensisse quædam corporeæ naturæ hominum consentanea, locutiones illas proprio sensu usurpatas ab iis fuisse decerni tutò non potest, nec quidem oppositum constitui; in ipsismet enim divinis Bibliis de Deo O. M. quædam dicuntur, quæ si obviâ, propriâque significatione intelligerentur, Deum hominibus similem in pluribus esse sacri Scriptores docuisse viderentur. Et quidem Judæorum plurimi anthropomorphitæ jam dudum fuerunt hujusmodi locutionibus innixi, quas metaphoricæ esse non putarunt, cum tamen tropicæ, & figuratæ reipsâ sint, ut liquidò eis ostendit ex divinis ipsis Oraculis illustris Maimonides, Samuel Bocchartus, & interpretes passim.

Cæterum quas, quantasque rixas, erroresque pepererit in maximi momenti rebus confusio tropici, & figurati cum  
pro-



proprio, & nativo sensu vocabulorum, ii demum ignorant, qui Ecclesiasticam historiam ne à limine quidem salutarunt.

Ne autem erremus in iudicando, an veterum Scriptorum locutiones metaphoricæ sint, nec ne, *cum de rebus loquuntur, quæ sensibus non obversantur, quæque obscura sunt, & opinionum varietati obnoxia*, hæc cautio adhibenda est, nimirum quàm diligentissimè inquirendum aliunde est, quidnam ipsi senserint, quid opinati fuerint de ejusmodi rebus. Quod si aliquando id certò, tutòque dignosci non potest, neque ex integro Auctoris contextu, neque aliundè, tunc cohibendum iudicium est, nulla ferenda sententia est de ipsorum Scriptorum mente, nec ideo putandum est locutiones ab ipsis adhibitæ metaphoricæ esse, & translatitiæ, quia à nobis nonnisi per metaphoram adhibentur.

## §. VII.

Cum igitur (ut ex his, quæ toto hoc Capite disseruimus, manifestum est) Ideæ hominum invicem non satis convenient, non quaquàversum similes sint, quam-

N 5.

vis

vis eadē vocabula adhibeantur ad eas significandas, aut iis vocibus, & locutionibus utantur, quæ pro æquipollentibus, & omnino omologis vulgò à Lexicographis traduntur, per sese patet, non esse temerè, citraque prævium accuratum examen cæterorum Ideas, ac potissimum veterum ex Ideis nostris metiendas, & æstimandas, quasi per voces, quas adhibent, non potuerint non intelligere, nisi id prorsus omninò, quod nos per easdem illas voces intelligeremus, quo nil falsius ut ostendimus.

Quæ quidem thesis, ut firmiùs animo adhæreat, res enim est gravissimi momenti, certissima hæc, tutissimaque monita mente servanda, & recolenda sunt.

Primò, plurima vocabula ambigua esse partim inopiâ Linguarum, partim negligentia, & culpâ Scriptorum.

Secundò, plures voces, & locutiones à primævâ significatione, quam obtinebant, tractu temporis decidisse, & in aliam adhiberi posterioribus temporibus cœpisse.

Tertiò, iisdem vocibus, & locutionibus, modò ampliorem, modò arctiorem sub-

subjectam esse potestatem, & significationem apud varios scriptores.

Quartò, communes voces à peculiari-  
bus scriptoribus peculiari sensu haud raro  
adhiberi, & à communi significatione  
plus, minusve detorqueri.

Quintò, easdem voces, & locutiones  
ab uno, eodemque scriptore in uno, pla-  
nèque eodem sensu vix unquam, aut ne  
vix quidem usurpari, exceptis fortè  
Mathematicis, & quidem non omnibus.

Sextò, homines diversa placita foventes,  
diversisque partibus studentes, iisdem vo-  
cibus, & locutionibus Ideas planè dif-  
pares, & toto cœlo discrepantes aliquandò  
exprimere.

Septimò, scriptores quàm plurimos sæ-  
pè vocibus quibusdam, & integris locu-  
tionibus alludere vel clariùs, vel obscu-  
riùs praxi, moribus, & opinionibus sui  
temporis, quæ praxis, qui mores, &  
opiniones nisi aliunde sint præcognitæ,  
loca illa scriptorum assequi non possu-  
mus.

Octavò, longè plurima esse vocabula,  
quæ relativum tantum sensum continent,  
attributaque, quæ tantum relatè ad ali-  
quid vera sunt, intelligi non posse citra

or-

erroris periculum ad mentem auctorum, nisi prius constet, relatè ad quid ita loquantur, seu quorsum, & ad quidnam respiciant, dum vocabula illa adhibent.

Nonò, plurima scriptorum loca æquivoca esse, & obscura ob structuram Orationis, constructionemve locutionum, quæ ad mentem scriptorum tutò intelligi non possunt, nisi aliunde nobis nota sit res, de quâ scriptor loquitur, aut nisi ejus mens eruat ex contextu accuratissimè explorato.

Decimò, maximam creare difficultatem quàm plurimis scriptorum locis Rhetoricum stilum, seu figuratas, & translaticias locutiones, à quibus perpauci satis abstinere; aut sine obscuritate, & æquivocatione utuntur. Hæc, qui secum reputant, quæ publicis prælectionibus nostris disseruimus, quæque nimis vera sunt, cautior profectò evadit in judicando de scriptorum Ideis, interpretandisque auctoribus ex merâ solâ Lexicorum fide, crassâque Minervâ, ut vulgò temerè, & perperam fit.

## CAPUT POSTREMUM.

*De Animi affectibus, & pathematibus.*

**I**mmensum opus esset, qui ex animi affectibus, & pathematibus nascuntur errores, vel cursim, summamque per- censere.

Ostendemus igitur tantum, & qui- dem generatim, affectus, & pathemata animi, ut odium, amorem, spem, ti- morem, ingentem aliorum opinionem, contemptum, &c, occasione passim esse falsa judicia de rebus ferendi, & quidem sæpe de rebus gravissimis, maximique mo- menti.

Duplici autem ex capite animi pathema- mata, & affectus, si potissimum sint paulo vehementiores, judicia nostra trans- versa agunt: primò examen rerum de quibus judicandum est, præpediunt, molestumque efficiunt: secundò quæ- dam nobis optare faciunt, quædam verò è contra refugere animo, ex quo fit ut falsum pro vero, dubium pro certo ho- mines amplectantur, aut è converso, ut inferius ostendemus.

Ad

Ad primum, quod spectat cuique experientiâ compertum est, non posse nos seriò, maturiùsque de rebus cogitare, ut veritas assequatur, cum affectus aliquis vehementer animum premit, & urget. Hinc qui sollicitudine animi, & angustia quâpiam laborant, ea deprehendere non possunt, quibus maturum tantùm, accuratumque examen viam sternit, & munit.

Ad secundum verò quod attinet, latet neminem ita homines constitutos, comparatosque esse, ut facilè iis acquiescant, & ab iis ægrè admodum recedant, quæ grata, jucundaque experiuntur, ea verò respuant, refugiantque facilè, quæ ægrè ferunt, quæque incommoda, & molesta sentiunt.

Jam verò manifestum est, ea nobis grata esse, & jucundè nos afficere, quæ consentanea sunt votis nostris, & affectionibus nostris conformia, ea autem è contrà molestiam nobis parere, & animi ægritudinem, incommodamque affectionem producere, quæ votis nostris, & affectibus adversantur, cumque iis pugnant.

Hisce positis, quæ axiomata sunt penes

nes eos omnes, qui humanam indolem, & semetipfos noscunt, consequitur homines facillimè id certum ducere, id persuasum habere, iis adhærere enunciationibus, quæ conformes sunt pathematibus, quibus afficiuntur, & quarum falsitas per sese, & primâ fronte non pateat. Hisce in casibus voluptate judicant, non ratione; ideo enunciationi alicui, rationive acquiescunt, aut eam respuunt, quia enunciatio illa, aut ratiocinatio eos delectat, jucundaque eis est, vel ingrata, incommoda, & molesta, non quia nitidissima, & ineluctabilis evidentia, tutissimaque ratio eam certò veram evincat, aut certò falsam.

Hinc, si qui affectu judicant, si qui ideo enunciationem, ratiocinationemve aliquam amplectuntur, aut respuunt, quia gratam, aut injucundam, & molestam eam sentiunt, si, inquam, qui ita judicant, à vero non aberrant, id casu tantùm fit, non ratione; quod cum rariùs contingat, necessariò sequitur eos passim decipi, qui in judicando de rebus, id quod optant, quodque placet verum, quod averfantur, & displicet, falsum putant. Attamen quis hominum est, qui  
hâc

hâc ratione frequens nimium non iudicet? profectò perpauca, & rarissimi.

§. I.

Inter cæteros autem errores, quibus animi nostri affectus occasionem sunt, ii potissimum sunt accensendi, qui passim oriuntur à fide aliorum auctoritati temerè, & inopportuna adhibitâ, aut denegatâ; affectus enim animi sæpe, & sæpius fidem nostram hominibus immeritò, & inopportune conciliant, vel immeritò & inopportune ab iis arcent: atque hinc plurimi nascuntur, & longè, latèque propagantur errores, iique sæpe gravissimi, & perniciosissimi. Si quis narret, & sibi compertum affirmet, quod qui audit, verum esse optat, statim is dicenti fidem adjungit, quamvis veracitatis, & cognitionis ejus, qui loquitur, opportuna experimenta audiens non sumpserit.

Hinc, ex. gr. ægroti, qui salutem quam vehementissimè expetunt, quibuscumque eam pollicentur, statim facile credunt, eisque obtemperant inconsultò.

E contrâ, fidem loquenti sæpe homines temerè detrahunt, si quis id afferat, quod eis non arideat, quod aversentur, quod-



quodque creditum eorum, vota, & spem eludat, ut amicos exercitus profligatos ab hostibus fuisse, amicos Duces, & plurimi habitos in instituendâ, conficiendâque pugnâ, ignavè, temerèque sese gessisse, aliaque hujusmodi plurima.

Rursus, amico, & benevolo haud ægrè homines credunt, ægrè tamen, tardèque inimico; quasi non posset unquam amicus verum ignorare, decipi, & decipere, inimicus verò veritatem noscere, verumque proferre non posset.

Contemptus etiam, & existimatio, ingentisve scientiæ, peritiæ, ingenii, candoris opinio, sæpe hominibus fidem immeritò conciliat, aut detrahit: cum quidpiam asserunt, cum pronunciant ii, qui despiciuntur, fides eis denegatur, cum narrant, sententiamque ferunt ii, quos admiramur, & magni facimus, facile ipsis acquiescimus: at haud rarò homines despiciunt, quos plurimi facerent, si eos benè nossent, plurimi autem faciunt, & admirantur, quos non tanti facere par esset, & utroque casu decipiuntur. Perperam enim hisce in casibus fidem adjungunt, aut cohibent.

Ex hoc fonte, ex admiratione nimi-

O

rum

rum, ingentique opinione temerè, & im-  
meritò conceptâ, peritiæ, sapientiæ, &  
veracitatis eorum, qui asserunt, aut ne-  
gant, plurimi, gravissimique errores or-  
ti, & susè, firmissimèque propagati sunt.  
Hinc falsarum Religionum commenta, &  
vanarum superstitionum monstra à vastis-  
simis gentibus complexa, & venerata:  
hinc vanissimæ historiæ pro veris, vir-  
tutes pro vitiis habitæ, & pro virtutibus  
vitia. Hinc futiles opiniones vulgò re-  
ceptæ de rebus non satis cognitis: hinc  
præjudicia tum ad mores, quod attinet,  
tum quoad scientias.

Et sanè hi errores universi ideo radices  
egerunt suas, quia homines eos accepe-  
runt ab iis, quos summos viros, & præ-  
stantes non illusos, non mendaces, non  
vana loquentes perperam, & falsò credi-  
derunt: hâc de causâ, *ex. gr.* proximè  
elapsis potissimum sæculis vulgò genera-  
tim receptum erat, & etiam nunc apud  
plurimos obtinet, nobiles viros injurias  
sibi illatas verbis, & armis non ulciscen-  
tes turpi notâ genus suum imarete, &  
familiæ decus, honoremque omnem fœ-  
dere; hinc qui injurias dissimulant, &  
contemnunt, exhibitantur, & contem-  
nun-

nuntur à plurimis. Eâdem ratione lædit apud plerosque majorum gloriam, & avitæ nobilitati officit homines erudire, civesque ab ignorantia rerum omnium turpissimâ vindicare, eosque ad scientiam, & virtutem comparare, non autem officit otio tabescere, non officit aleâ, & libidinibus vitam conficere, equitatu, venatuque, ac vanis omnis generis exercitationibus dies terere.

Stultissimæ hujusmodi opiniones, quas numerare, immensum opus esset, hominum mentes non occuparent, si ab iis, quos magni faciunt, non traderentur; si à majoribus in natos majoribus obsequentes, & credulos non transmitterentur, aut si homines inopportunam fidem, & incautam non adhiberent iis, qui cæteros antecellere judicantur, quique cæteris auctoritate, munere, & ætate præsent; quandoquidem & ii, qui præstantiores sunt, aut dicuntur, decipi utique possunt, cum pronunciant de rebus, quæ non nisi accuratâ ratiocinatione, & meditatione dignoscuntur.

Quænam autem leges, quæ monita servanda sint, ne temerè, & inopportunè fidem aliorum auctoritati præbeamus,

212 RATION. PHILOSOPHIÆ INSTIT.  
mus, aut denegemus, tunc exponemus  
cum methodum trademus eas quæstiones  
enodandi, quarum solutio nonnisi ex alio-  
rum fide, & auctoritate haberi potest.

*Finis primæ Partis.*



R. A.



# RATIONALIS PHILOSOPHIÆ INSTITUTIONES.

## *PARS ALTERA.*



### C A P U T I.

#### *De Methodo Analiticâ.*



Stendimus jam quænam sint  
potissimæ errorum causæ,  
aut occasiones. His cogni-  
tis, cavere ab earum insidiis  
facile quisque potest, & errores declina-  
re, in quos inducunt incautos. Oſten-  
dendum jam est quânam ratione, & viâ  
incognita veritas, quæsitæque rerum no-

tiones venandæ, & inquirendæ sint, ut assequantur. Ratio hæc, & methodus absconditæ, optatæque veritatis pervestigandæ & acquirendæ, methodus Analytica nuncupatur, seu Methodus inventionis. Scientia hæc tanti facienda est, quanti interest veritates noscere, & humanæ scientiæ opes in immensum augere.

Veteres Philosophi præclarissimam hanc, immò potissimam sanè rationalis Philosophiæ partem, vix, aut ne vix quidem attigerunt, quamvis eadem præcipuus sit scopus, & apex præstantissimæ ejus disciplinæ, quæ arduam provinciam, emendandæ, regendæque mentis sibi fuscipit gubernandam.

Nonnulli ex recentioribus Metaphysicis longè accuratiùs, ac fusiùs de inquirendâ, inveniendâque veritate egerunt; at nullus horum satis, ac pro dignitate de tantâ, tamque præclarâ scientiâ scripsit.

Nos quæcumque ab aliis utili operâ hæc in re litteris consignata sunt, seligemus, plura etiam addemus, atque ea quidem utilissima, quæ Metaphysici, & Dialectici intacta reliquerunt, hæc autem omnia in novam rerum seriem, & ordinem

nam quam commodissimum redigemus, quamque fieri poterit brevissimè, nitidèque explicabimus.

## §. I.

Antequam autem opus aggrediamur, animadvertendum est eam esse hujusce mentis nostræ naturam, ut non quæcumque ei incomperta sunt, assequi possit; plura enim sunt rerum genera, quæ intellectûs humani aciem omnem effugiunt, quæque ultra humanæ scientiæ limites constituta, ac posita sunt.

Ne quis ergo fortè tempus, & operam incautè perdat in iis inquirendis, quæ crassis semper circumfusa, & involuta tenebris homines latebunt; Opportunum ducimus paucis hîc ea omnia complecti, & perconsere, quæ non ignorare non possumus.

Primò igitur nullius planè substantiæ si-  
ve corporeæ, siue incorporeæ intima natura, genuinaque, ut ajunt, essentia penitus, funditusque introspecti potest ab hominibus, quod facili negotio demonstratur; Et quidem primò, ad corporeas substantias quod attinet, neque essentia materiæ, neque pecu-

liaris natura peculiaris illius corporis, satis, & certò cognita esse nobis potest. Enimverò essentia materiæ id sanè est, quodcumque sit, per quod materies apta nata est, ad eos omnes effectus producendos, aut patiendos, quos producere, patique potest; hoc enim est, quod essentiæ nomine intelligimus: atqui quidnam id sit, penitus, certèque cognoscere minimè possumus.

Scimus quidem, experientiâ docente, materiem extensam esse; dividuam esse, seu in partes scissilem, mobilem esse, figurabilem, ut ajunt, & impenetrabilem, nimirum ejus naturæ, ut duæ materiæ partes in uno, eodemque loco coexistere non possint mutuò compenetratæ, ut physici demonstrant.\* At quidnam id sit, per quod materies ad hæc omnia apta est, & comparata, quisnam divinabit? id sanè sensus non ostendunt, ut patet, nec ratione argui citra erroris periculum, quid, qualeque id sit, potest: etenim, *ex. gr.* quis certò, tutòque decernere potest, quidnam sit in materie, quod mutuæ compenetrations partium ineluctabili, immensaque vi obsistit? profectò id ab extensione non oritur, quemadmodum à  
purâ



purâ extensione neque cæteræ materiæ proprietates per necessarium consequens dimanant. Et quidem profectò pura, ac mera extensio in longum, latum, & profundum non est scissilis, ac dividua in partes, non est mobilis, protracta est in immensum, figuræ cujuslibet incapax est, & compenetratur utique cum materia; quandoquidem corpus cubicum, *ex. gr.* cum spatio æquali cubico, seu cum purâ, ac merâ extensione locali, sibi æquali absque ullâ resistantiâ compenetratur, & in uno, eodemque loco consistunt; at duo corpora cubica æqualia profectò nullâ vi, nullâque ratione compenetrari, & in uno, eodemque loco constitui possunt: igitur proprietates materiæ ab extensione necessariò non profluunt, & consequuntur. Ergo essentia materiæ non est extensio, ut falsò arbitrantur Cartesiani, sed incognitum quodpiam subiectum, quod partibus necessariò constat, quod scissile est, quod loco moveri, & quiescere potest, quodque partium compenetrationi obsistit. Verum quidem est, quod sublatâ extensione in materie, cæteræ quoque ejus proprietates cognitæ auferuntur; at ex purâ, &

solâ extensione, phænomena, quæ materiæ competunt, veluti totidem necessariæ consecutiones non profluunt: proindeque aliquid aliud est in materie, ut animadvertimus, ex quo profluunt, atque hoc aliud quodcumque sit, ejus essentia est: atqui hoc aliud nullâ ratione introspecti, citraque erroris periculum constitui, & demonstrari non potest, quidnam, qualeve sit; ergo essentia materiæ ex iis rerum generibus est, quæ captum nostrum effugiunt, quod erat primo loco suadendum.

Ejusdem naturæ sunt essentiæ peculiæ peculiarium corporum, seu id omne, per quod peculiaria corpora apta nata sunt ad eos omnes effectus, non universis corporibus communes producendos & patiendos, quos producere, patique possunt; quæ quidem peculiarium corporum essentiæ, vel naturæ, ex quibus phænomena non omnibus communia oriuntur, variæ sunt in variis, nempe in iisdem omninò phænomenis, & effectionibus producendis, patiendisque. Essentias autem peculiarium corporum, penitus, funditusque introspecti non posse ab hominibus, ita facillè evincitur. Nam id per quod, ex. gr. aurum aptum est ad illos ef-

fec-

fectus omnes non communes producidos, & patiendos, quos producere, patique potest, vel, inquam, id omne quidpiam est à materiæ modificationibus quibilibet, à mechanismo quocumque particularum, quæ aurum constituunt, distinctum, vel nil aliud est, nisi figuræ, texturæ, combinationes, constitutionesque particularum omnium, quibus aurum constituitur, quæ omnia intrinsecus mechanismus auri, vel intrinsecum mechanicum sistema particularum, aurum componentium appellatur.

Si natura, & essentia auri quidpiam est ab intrinseco ejus mechanismo distinctum, quis divinabit, quidnam omnino, qualeve id sit? Si verò peculiaris essentia auri sita est in peculiari intrinseco mechanico sistemate particularum omnium, ex quibus aurum coalescit, ut physicorum sapientissimi docent, adhuc nulla spes subest, auri essentiam penitus, funditusque dignoscendi. Etenim integrum mechanicum corporis illius sistema nec funditus introspecti potest ope sensuum, nec certò argui potest, quodnam, qualeque sit ex phænomenis, & effectibus; non ope sensuum, nam nimis hebetes, & imbecilles sunt; mi-

CROS-

eroscopia autem non sufficiunt, quæcumque tandem sint, nam quantumvis acutissima ea supponamus, nunquam tamen poterunt particulas omnes tenuissimas, earumque particularum partes universas reddere sensiles, & conspicuas, eoque minus intimas earum structuras, & texturas, constitutiones, & ordinem nobis retegere; non igitur mechanismus intimus auri, penitus, funditusque dijudicari potest ope sensuum.

Non potest autem certò, tutòque argui ne ex effectibus quidem, & phœnomenis, quod vel hâc solâ ratione evincitur; etenim si arguendus est mechanismus auri, ex ejusdem proprietatibus, aut phœnomenis, necesse in primis est, ut phœnomena omnia ad aurum pertinentia, nullo planè excepto, in numero habeamus; atqui nunquam certò scire poterunt homines, sibi compertas esse proprietates omnes alicujus corporis, quodcumque sit, & ratio est quia proprietates rerum, quarum physica essentia penitus, funditusquè nobis nota non est, retegì non possunt, nisi per experimenta; atqui hæc numero infinita sunt, nec unquam exhaustiri poterunt, aut exhausta, & tenta-

ta esse, universa demonstrari; igitur nunquam certò scire poterunt homines sibi proprietates omnes alicujus corporis nullâ exceptâ innotescere; ergo ex effectibus, & proprietatibus nunquam vel ex hoc solo capite arguere poterunt citra erroris periculum quodnam sit intimum, integrumque mechanicum sistema particularum omnium sensilium, & insensilium, quibus aurum, aut quodvis aliud corpus elaboratum, constructumque est. Ergo peculiarium corporum intimæ peculiare essentia, nec sensibus introspecti, nec ratiocinatione à proprietatibus, & effectibus certò, & ex integro argui possunt. Ergo quænam, qualesve sint peculiarium corporum veræ, ac physicæ essentia, & naturæ nunquam non ignorabimus, quod erat secundo loco suadendum.

Ex his autem quæ diximus, patet, nunquam fore, ut homines decernere possint ullo in casu citra erroris periculum; quinam sit integer numerus proprietatum alicujus corporis.

Hinc verò consequitur scire nos non posse, an verè duo corpora in omnibus phænomenis, quæ producere, patique reipsâ possunt, mutuo prorsus conveniant;

niant; nam esto congruant in proprietatibus cognitis, quis demonstrabit convenire etiam in adhuc incognitis, & relegendis, aut quis ostendet aliquo in casu nullis aliis proprietatibus, nisi cognitis prædita illa esse?

Hinc autem sequitur ulterius, nunquam futurum fore, ut scire possimus, an duo, plurave corpora ejusdem prorsus veræ, ac physicæ speciei sint, nec ne? Id enim decerni non potest, nisi constet ea in omnibus omnino proprietatibus convenire, quod ex dictis nemo unquam demonstrabit.

Quod si vel in unâ tantum discrepent proprietate, jam specie differunt non per accidens, ut falso scholæ docent: tam enim implicat, & ἀδύνατον est duas naturas, essentiasve simillimas esse, & in proprietate quâdam, seu aptitudine ad aliquid efficiendum, patiendumve discrepare, quàm implicat duos circulos, aliasve curvas ejusdem speciei in omnibus proprietatibus non convenire. Scire igitur tantum possumus, an duo, plurave corpora sint ejusdem speciei idealis, aut nominalis, sed non realis; ad hoc enim ut sint ejusdem speciei nominalis, vel idealis, suffi-

ficit, ut eodem communi nomine appellari possint, possunt autem, quoties conveniunt in iis determinatis attributis, quæ specifico quopiam nomine significantur. *Ex. gr.* ut duo corpora aurum dici possint, sufficit, si in utroque existant proprietates illæ, & attributa, quæ hoc specifico nomine *aurum* significantur. At corpora esse possunt ejusdem speciei nominalis, seu idealis, & differre in reali specie, & naturâ.

Cæterum cum essentia corporum incognita nobis sit, rationem per consequens ignoramus, ob quam datæ quædam proprietates in uno, eodemque corpore collectæ coëxistant: hæc enim ratio ipsamet incognita corporis illius natura est.

Hinc quoties ignoramus cur datæ quædam proprietates coëxistant, toties ex unâ aliam inferre non possumus, etsi eadem simul collectæ pluribus in casibus per experientiam deprehensæ sunt; nam incognitâ ratione coëxistentiæ earundem, temerarium est decernere eas non posse non esse simul: immò è contra nil frequentius in Natura, quàm ut proprietates, quæ in aliquibus corporibus collectæ sunt,

## 224 RATIONALIS PHILOSOPHIÆ

in aliis non unâ omnes deprehendantur ,  
sed cum disparibus junctæ.

Hæc eadem omnia dicta volumus de  
substantiis inconspicuis , & insensilibus ,  
quæque immateriales , & spirituales nun-  
cupantur. Jam verò ad cætera rerum ge-  
nera properemus , quæ captum hominum  
semper effugient.

Igitur ulterius nemo scire unquam po-  
terit , quânam ratione perceptiones aliquæ  
animi excitentur , quoties excitantur de-  
terminati quipiam motus in fibris nerveis ,  
& spiritibus animalibus nostri corporis ,  
quemadmodum neque sciemus unquam ,  
qui fiat , ut datis quibusdam animi per-  
ceptionibus , & Ideis , statim excitentur  
determinati quidam motus , vel in toto ,  
vel in aliquâ parte nostri corporis : aliud  
utique est motus , aliud Idea , & per-  
ceptio animi ; attamen dato motu quo-  
piam , & impressione in aliquo ex nervis  
corporis , statim oritur aliqua animi sen-  
satio , & perceptio , datisque quibusdam  
perceptionibus , certi quidam , & deter-  
minati motus in corpore excitantur : ni-  
mirum ita constitutus , & comparatus  
est naturæ ordo ; at quomodo id se ha-  
beat , quâ ratione id contingat , nemo de-



demonstrare poterit uspiam, aut in posterum poterit.

Denique nunquam non ignorabimus, an duo, pluresve dati homines prorsus conveniant in iis perceptionibus, quæ per sensus acquiruntur, quæque esse possunt in variis, variæ.

Quænam sint hæc perceptiones, quæ in pluribus variæ esse possunt, & disparæ, licet per analogos sensus acquirantur, & ab iisdem objectis excitatæ, satis ostendimus, tum ubi agebamus de erroribus ab Ideis per sensus acquisitis ortis, tum superiori Capite. Si igitur de id generis perceptionibus sermo sit; cum nemo nemini eas definire, nemo cæteris exprimere satis possit, quales ipse eas experitur, nemo per consequens scire potest, an in huiusmodi Ideis, & perceptionibus, cum dato quopiam homine, & cum cæteris hominibus prorsus conveniat, nec ne. Atque hæc sunt potissima rerum genera, quæ ultra humanæ scientiæ spheram omnem latitant, nullâ ratione, atque adeo nullâ analyticâ methodo assequenda.

## CAPUT II.

*De quæstionum generibus, & quæsitæ rerum fontibus.*

**O**Mne dubium quodcumque sit, quæstio dicitur. Cum quæstiones circa ea rerum genera versantur, quæ superiori Capite cursim recensuimus, aut cum ab earum rerum scientiâ ipsarum enodatio pendet, insolubiles nuncupantur, cæteræ enodatu impossibiles humanæ menti minimè sunt. Cujusvis autem quæstionis solutio judicium quodpiam est, & enunciatio, quæ id continet, quod quærebatur: atqui omne judicium, enunciatio omnis hisce tantum constat partibus, nempe subjecto, attributo, & assertionem, convenientiæ, aut discrepantiæ attributi illius cum subjecto; igitur (quandoquidem enunciatio, quæ quæstionem enodat, quæque solutio quæstionis dicitur, id continet, quod quærebatur), igitur, inquam, aliqua ex illis partibus ignota erat, & quæsitæ: ergo in quacumque quæstione, vel dato attributo quæritur quodnam sit determinatum sub-  
jec-

jectum, cui attributum illud conveniat; vel dato subjecto quæritur quodnam attributum determinatum ex aliquo genere ei competat, vel dato attributo, & subjecto determinato, quæritur an illud huic conveniat, nec ne; an illud de hoc asserendum, nec ne sit? Tria igitur sunt, nec plura esse possunt summa quæstionum omnium genera.

Primi generis est, *ex. gr.* hæc quæstio: *quanam est Terra motus causa?* in hac enim quæstione dato attributo, nempe *causam esse Terra motus*, quæritur quodnam sit subjectum, cui attributum illud conveniat, nimirum quidnam id sit, cui attributum hoc competat, quod terræ motum pariat.

Secundi generis est, *ex. gr.* hæc alia quæstio; *quantumne distat Saturnus à Sole?* in hac enim dato subjecto, nempe Saturno, quæritur, quodnam determinatum attributum ex genere distantie ei competat relatè ad Solem.

Tertii generis tandem est, *ex. gr.* hæc quæstio; *an Planeta omnes primarii Solem versus gravitant:* in hac quippe quæstione dato subjecto, nempe *Planetis primariis*, datoque attributo, nimirum *Solem*

*versus* gravitare, quæritur an hoc attributum subjecto illi conveniat, nec ne.

Cuique autem rem attendenti manifestò patet nullam dari posse quæstionem, in quâ nec dato attributo quærat, quodnam, qualeve sit subjectum, cui convenit, nec dato subjecto, quærat, quodnam sit determinatum attributum ex aliquo genere, quod subjecto illi competat, nec datis subjecto, & attributo, quærat, an hoc illi conveniat, nec ne.

## § I.

Quæsitæ verò in quæstionibus notiones, nonnisi ex triplici fonte hauriri possunt; hi notionum, veritatisque fontes sunt, *Ratio*, sive *Ratiocinatio*, *Experientia*, *alienum Testimonium*.

Cum solutio alicujus quæstionis haberi non potest, nisi eam inferendo, & deducendo per consequens ab aliis judiciis, seu propositionibus præcognitis, aut prænoscentis, quæstio hujusmodi prioris fontis dicitur: cum verò data quæstio solvi potest observatione quâpiam nondum à nobis factâ, aut ope alicujus experimenti adhuc nobis incompti, secundi fontis  
ap-

appellatur : denique cum datæ alicujus quæstionis enodatio haberi non potest, nisi ex alieno testimonio, & fide, tertii fontis nuncupatur.

Quantæ verò utilitatis sit, & commodi primò quæstiones distribuisse in tria illa genera, quæ explicavimus; secundò, fontes omnes ex quibus solutiones quæstionum petendæ sunt, indigitasse, seu ex quorum aliquo hauriendæ, & expiscandæ sunt, quæsitæ quæcumque notiones, luculentissimè apparebit ex his, quæ in tradendis analyticis legibus differemus.

### C A P U T III.

#### *De Analytica Methodi legibus.*

**S**Ecretis iis, quæ humanæ mentis aciem, captumque effugiunt, ab iis, quæ intra humanæ scientiæ sphæram constituta, & posita sunt, explicatâ quæstionum naturâ, constitutis generibus, quibus pertinent universæ; ostensis fontibus, ex quibus petendæ sunt aptatæ notiones, in quæstionibus propositæ, superest, ut leges tradamus, & præcepta, quibus ducibus, lucemque afferentibus, quæsitam

230 RATIONALIS PHILOSOPHIÆ  
veritatem quamcumque , si fieri possit ;  
certò , tutòque , rectâque viâ , assequamur.  
Age igitur manum ad opus admoveamus.

§ I.

Prima Ἀνάλυσις Lex ita habet ; *enodanda cujusvis quæstionis statum accuratissime constituto* ; constituere autem statum quæstionis nil aliud est , nisi sensum vocabulorum , quibus quæstio concepta est ( si quæ ambiguitas , aut obscuritas vel minima sub ipsis , aut sub eorum aliquo latitet ) , omni curâ , exacteque prædefinire , sive seridò , maturiùsque , quid præcisè , quid omnino quærendum sit , cogitare. Obscuritas , & ambiguitas , & vagans , indeterminataque significatio vocum , & locutionum , quibus vitiis , vix ulla vox est , & locutio , quæ prorsus omninò careat , legi huic occasionem sunt. Qui eam violat , quid tandem præcisè , quid exactè ei quærendum sit , ignorat , quo eundem ei sit , nescit , ad determinatum , constitutumque scopum respicere non potest , proindeque nec apta media eligere ad id assequendum , quod in quæstione exposcitur.

Pa-

Patet ergo constituendam esse in primis, & accuratissimè definiendam significationem vocum, & locutionum quibus quæstiones conceptæ sunt.

Cum nos nobismetipsis quæstionem aliquam proponimus enodandam, possumus ejus sensum, ut libet, constituere: possumus nempe determinare ex arbitrio præcisam potestatem, & significationem vocabulorum, quibus quæstionem exprimimus: at si quæstionem quampiam ab aliquo accipiamus solvendam, ejus mens nobis innotescat necesse est, constet oportet, quonam determinato sensu voces illas intelligat, quas adhibet, qui quæstionem proponit.

Hinc si locutiones, quibus tradita nobis quæstio concepta est, in aliquâ obscuritate, vel ambiguitate laborare videantur, rogandus est, si id fieri possit is, qui quæstionem proposuit, ut mentem suam luculentius exprimat, nec ab instantiis, & interrogationibus cessandum, donec nitidissimè explicaverit, quamnam determinatam, præcisamque significationem vocibus illis tribuat: quod si is, à quo quæstio proposita est, interrogari non possit, magis est in medium quæstionem

illam relinquere, si sit obscuri aut æquivoci sensûs, quod ferè nunquam non accidit; ne nimirum si inconsulto auctore eam in determinatum quempiam sensum accipiamus, ex arbitrio ab ejus mente fortè fortunâ aberremus, & id inquiramus, quod ipse non petebat, solutionemque importunam, & à re alienam afferamus, quod sæpe contingit. Atque hæc ad primæ legis analyticæ methodi nostræ interpretationem, quod attinet, dicta sint satis.

## § II.

Secunda Ἀνάλυσις Lex ita jubet: accuratissimè præconstituito ad primæ legis præscriptum enodanda questionis sensu, si questio composita sit, singula quæque capita, ex quibus constat, sedulo invicem secernito; uniuscujusque singillatim capitis enodationem inquireto; at prius an alicujus capitis solutio ad alterius enodationem conducere possit, aut prærequiratur, cogitato; & si quid hujusmodiprehenderis ab iis enodandis capitibus, quæ simpliciora agnoscis, incipito.

Quæstio autem, notioque tunc simplicior relatè ad aliam vocatur, cum ab illa



illâ alterius illius quæstionis solutio pendet, aut alterius illius notionis acquisitio, vel cum illâ cognitâ, & assequantâ, alia facilius assequi potest.

Legis hujus quoad singulos ejus articulos utilitas patet, si de compositis quæstionibus sermo sit. Etenim primò, cum quæstiones compositæ multiplicem scopum habeant, si capita, quibus constant, non invicem distinguantur, & eorum solutio singillatim non pervestigetur, confusio, ac perturbatio mentis oriatur, necesse est, ab indistinctâ illâ disparium rerum contemplatione; quemadmodum enim qui oculis plura simul, & varia videre vult, nec ea satis perspicuè percipit, nec potest de singulis illis objectis, rectè satis judicare; ita qui plura, eaque disparia unâ simul veluti in massam mente complecti nititur, ea satis introspicere minimè potest, adeoque accurata, tutaque judicia de illis ferre utique nequit, ut experienciâ cuique compertum est.

Plurima exempla, si id opus esset, cumulare hic possemus doctissimorum cæteroquin virorum, qui ex neglectu hujus legis, quam tradimus, cum compositas quæstiones in partes non scindant,

dant, nec singillatim de singulis ratiocinantur, nonnisi permixtas, confusas, & quod pejus est vitium, incompletas, mancas, & à re alienas ratiocinationes proferunt, huc illuc declinant, & vagantur, ac inter plures ambagès implexi, plura dicunt, & aliquando quidem præstantissima, at quæstiones propositas non satis exhauriunt, non penitus solvunt, aut etiam malè. Ut autem aliquot tantùm ex præclarioribus exemplis adferamus, utque de cæteris scriptoribus taceamus, qui multi nimium sunt ex quocumque genere, exceptis Mathematicis, Joannem Seldenum, & Claudium Salmasium præ cæteris omnibus ob oculos ponimus, viros longè doctissimos & quorum scripta portentosa, ac penè incredibili, penitiorique eruditione undecumque affluunt; at ita confusa, ac permixta sunt, quæ habent, eo quod legem hanc nostram violant, quam explicavimus, ut vix labore improbo, aut ne vix quidem sæpe ad certa capita revocari possint, quæ scribunt: sæpius verò propositas quæstiones ex parte saltem insolutas, ac tenebricosas relinquunt, ut jure adnotavit eximius Criticus Joannes Clericus: quo sanè morbo præclarissima eorum

rum scripta non laborarent, si legi huic nostræ obtemperassent.

Non sufficit autem compositas quæstiones in singula quæque capita dividere, & singulorum capitum enodationem singillatim inquirere; sed incipiendum præterea est à capitibus simplicioribus, si quæ hujusmodi deprehendantur: nam qui ea compositarum quæstionum capita solvere aggreditur, quorum enodatio ab alterius cujuspiam capitis solutione pendet, tempus, & operam perdidit; cognosci autem non possunt, quæ ex aliquâ notione pendent, & consequuntur, nisi notio illa prius comperta, & præacquisita sit: *ex. gr.* si proposita sit hæc quæstio composita enodanda; *quinam sint usus, quæque constructio partium nostri corporis*; nisi secunda pars hujus quæstionis soluta prius fuerit, nisi nimirum partium constructio, & constitutio pateat, prior solvi non potest, non possunt nimirum earumdem usus cognosci. Verum ad alia transeamus.

### § III.

Tertia Ἀνάλυσις lex ita sancit: *humana*  
na

*ne scientia certos limites prædiscito, an questio enodanda vel ex integro, vel ex parte circa aliquod ex rerum illarum generibus versetur, quæ ultra humana scientiæ sphaeram posita sunt, expendito, & si hujusmodi sit questionis natura, eam intentatam relinquito.*

Ex hujus Legis neglectu factum est, ut scriptores plurimi cum nostræ, tum potissimum superiorum ætatum in eâ pervestigandâ incubuerint, de iis scripserint, de iis pronunciaverint, quæ crassis semper circumfusa erunt, & involuta tenebris nullâ hominum arte discutiendis; circa quæ quidem rerum genera nil nisi inanes conjecturæ, & arbitrariæ, malèque tutæ hypotheses afferri possunt, quod operam prorsus perdere est, humanoque generi ludibrium debere.

Quænam verò rerum genera humanæ mentis, aciemque effugiant, recensuimus jam Logices nostræ parte alterâ Cap. I. & fusiùs publicis prælectionibus nostris.

#### § IV.

Quarta Analyticæ Methodi Lex ita habet: *preconstituito semel, prædefinitoque sensu*

*su vocabulorum, quibus enodanda quæpiam  
quæstio concepta est, dum in ejus solutio-  
nem incumbis, & ad eam enodandam ra-  
tiocinaris, caveto diligentissimè, ne vocum  
illarum nativâ equivocatione, & ambigui-  
tate illusus, imprudens, & per incuriam  
aliquam ex vocibus illis in alium sensum  
accipias ab jam prædeterminato, & præde-  
finito, vel tantisper diversum.*

Ratio autem hujus Legis est, quia vel  
aliquatenus recedere à præconstituto sen-  
su, prædefinitâque significatione vocabu-  
lorum, quibus quæstio concepta est,  
idem est ac quæstionis statum immutare;  
adeoque à prædeterminato scopo aberrare,  
proindeque propositam quæstionem  
in prædefinito illo sensu acceptam non  
solvere; quod sanè vel per oscitantiam,  
vel per oblivionem, vel per illusionem à  
multiplici sensu vocabulorum partam haud  
rarè contingere hominibus experientia do-  
cet: hinc semel accuratissimè prædefinito  
sensu vocabulorum, quibus enodanda quæ-  
stio expressa est, idem ille sensus omnino  
inculpendus animo est, & præ oculis  
semper habendus, dum quæstionis eno-  
dationem venamur, cumque ad eam sol-  
vendam ratiocinamur.

## § V.

Quinta Lex Analytica hujusmodi est :  
*cum solutioni alicujus quæstionis studeas, si-*  
*quidem ei conditiones illæ, & circumstan-*  
*tia appositæ sint, ne dum in eam solvendam*  
*incumbis, aliqua ex ipsis tibi forte per in-*  
*curiam è mente excidat, sedulò caveo.*

Lex hæc manifestæ est necessitatis ; et-  
 enim problemata, seu quæstiones quibus-  
 dam circumstantiis affectæ, aut aliquibus  
 conditionibus indutæ, omninò expostu-  
 lant, ut rei quærendæ, & inveniendæ  
 exquisitissimè quadrent singulæ quæque  
 conditiones, & circumstantiæ, quæ id  
 generis quæstionibus appositæ sunt. Si  
 ergo aliqua ex iis conditionibus, & cir-  
 cumstantiis fortè fortunâ nos prætereat,  
 de iis omnibus æque solliciti minimè eri-  
 mus in solvendo problemate, nec sata-  
 gemus, ut singulæ quæque, nullâ ex-  
 ceptâ rei inveniendæ, & in quæstione  
 propositæ quadrent, atque adeo vel non  
 inveniemus, quod in problemate propo-  
 situm est inveniendum, vel casu tantum  
 inveniemus, quod indignum Philosopho  
 est, & rarissimè accidit.

¶ V

## § VI.

## § VI.

Sexta Lex Ἀνάλυσις hæc est: nullius quæstionis enodationem, cujus solutio ex terminis non pateat, aggrediuntur, nisi prænotaveris primi ne sit, an secundi, tertiiue generis, & nisi prius animadverteris, an constet ejus solutionem petendam esse necessario à secundo; tertiove notionum fonte.

Ratio hujus Legis est, quia non unâ; eâdemque viâ pervestiganda est quæstionum enodatio, cujusvis generis sit, & quocumque ex fonte petendæ sint veritates, quas quæstiones sciscitantur, quæque inveniendæ proponuntur, ut ex consequentibus legibus manifestò cuique apparebit.

## § VII.

Septima Lex Ἀνάλυσις ita se habet. Si enodanda quæstio primi generis sit, si ejus solutio ab experienciâ, aut alieno testimonio necessario non pendeat, sique attributa inveniendi subjeçti in quæstione apposita, quæsitum subjeçtum manifestò non ostendant; tunc omni mentis attentione, & nisi ex-

cogitato, quanam alie proprietates, quanam alia attributa per necessarias consecutiones profluant ex iis, quæ in huiusmodi questione constituta sunt, quaque subjecto quæsito quadrent oportet ex questionis præscripto; atque hanc deductionem proprietatum ex proprietatibus eò usque producito, quousque aut aliquam detexeris, quæ subjectum quæsitum veluti digito monstret, aut omnium collectio, & complexus in medium proferat, exhibeatque quod queritur.

Ratio huius Legis potissima ea est, quia unaquæque res præter attributa, omnibus, & pluribus communia, quædam etiam habet sibi prorsus peculiaria, ex peculiaribus verò nonnulla pathognomonica, si ita loqui fas est, & characteristica sunt; nimirum inter rerum proprietates, & attributa aliquod, aut plura sunt, quæ vel seorsim, vel cuncta simul rem manifestissime ostendunt, & ob oculos ponunt, seu quibus cognitis non potest non cognisci res ipsa, cui competunt, & quibus ignoratis ipsamet res à cæteris indistincta, & obscura latitat.

Hinc si quæsiti subjecti attributa in questionibus primi generis apposita, quodnam



nam sit subjectum illud non monstrent, eo quod non sint indicia pathognomonica, & attributa characteristica rei quæsitæ; hi characteres, hæ notæ, quibus cognitis non potest non patere res quæsitæ, utique pervestigandæ, & retegendæ sunt, ut quod quæritur, hujusmodi attributorum characteristicorum ope, manifestissimè pateat.

Optima autem methodus est characteristica hæc attributa retegendi ex attributis in quæstionibus, de quibus lex nostra loquitur, appositis alia, aliæque attributa per totidem necessarias consecutiones, quo usque id opus fuerit, inferre.

Ex quibus, Legis à nobis latæ eximius usus, & utilitas patet. Verum ejus praxim exemplo illustremus. Sit igitur propositum hoc problema enodandum, quod sanè ex iis est quæstionibus, ut cuique attendenti constabit, quas Lex nostra respicit.

Quæro quinam sint duo numeri invicem inæquales, quorum major quatuor unitatibus diminutus, æqualis fiat minori quatuor illis unitatibus aucto; minor verò quatuor unitatibus diminutus dimi-

Q. 2. dium

242 RATIONALIS PHILOSOPHIÆ  
dium evadat majoris quatuor illis unitati-  
bus aucti.

Ad hanc quæstionem solvendam accu-  
ratissimè excogito ex præscripto Legis latæ,  
quidnam necessariò sequatur; seu quæ-  
nam alia attributa quæditorum numero-  
rum per necessarias consecutiones deduci  
possint ex iis attributis, & proprietatibus  
quæ in problemate expressæ sunt. Id  
seriò, accuratèque reputans, id attentè  
cogitans faciliè deprehendo, quod si nu-  
merus major, quatuor demptis unitati-  
bus, æqualis evadat minori quatuor illis  
unitatibus aucto: debet ergo major mi-  
norem vincere excessu octo unitatum.

Jam ergo per necessariam illationem jux-  
ta methodum nostræ hujus Legis reperi  
excessum majoris supra minorem nume-  
rum: exigit autem problema, quod si  
à minori auferantur quatuor unitates, &  
addantur majori, minor evadat dimidium  
majoris. Cum ergo numerus major mi-  
norem excedat octo unitatibus, ut jam  
retexti, utique per necessarium conse-  
quens, si auferantur à minori ad normam  
problematis quatuor unitates, evadet hic  
minor altero duodecim unitatibus, ac si  
quatuor illæ unitates addantur majori a-  
lium

lium numerum duodecim unitatibus excedenti, jam ipsum excedet sexdecim unitatibus.

Vincitur ergo minor numerus quatuor unitatibus diminutus, vincitur, inquam, à majori quatuor illis unitatibus, aucto excessu sexdecim unitatum; atque hic minor numerus ex conditione problematis debet esse dimidium majoris, seu æqualis medietati majoris, nimirum excedi à majori totidem unitatibus, quotis ipse minor constat.

Ergo si major excedit alium per sexdecim unitates, ut jam per necessarias consequutiones deprehendi, necessarium consequens etiam est, ut hic unitatum excessus numeri majoris quatuor unitatibus aucti, æqualis sit minori quatuor illis unitatibus diminuto.

Ergo numerus ille minor quatuor unitatibus, diminutus erit sexdecim.

Ergo per necessarium consequens major numerus quatuor illis unitatibus auctus erit 32, qui numerus duplus est sexdecim.

Ergo per necessariam consequutionem numerus minor non diminutus quatuor unitatibus erit 20, major autem non

Q 2

auc-

auctus quatuor illis unitatibus erit 28 ; atque hi duo numeri quæstionem enodant ; explent enim conditiones omnes problematis , eisque quadrant attributa in problemate apposita ; quod erat inveniendum.

En qua ratione ex præscripto septimæ hujus Legis venandæ sint solutiones earum quæstionum , quas Lex illa respicit.

### §. VIII.

Octava analytica Lex ita habet , *data quæstione secundi , aut tertii generis , si non pateat ejus solutionem ab experientiâ , aut alieno testimonio mutuandam necessario esse , tunc à temetipso rogato , & omni diligentia , mentisque attentione meditare , quidnam tibi compertum esse oporteret , aut quidnam scire te sufficeret ad hoc , ut quæstionis solutio tibi per consequens appareret.*

Hac ratione , excitatâ animi fecunditate , haud ægrè agnosces cur ignores , quod quæris , facile deprehendes (ut praxis quotidie docet) *quid tibi prænoscendum sit ad solutionem quæstionis relegendam , & manifestò senties , quod si hoc illudve tibi compertum esset , pateret etiam per*  
con-

consequens propositæ quæstionis solutio ;  
 cognito autem luculentissimè , quod si  
 hoc , illudve scires , quæstio per conse-  
 quens soluta foret , tunc seriò animadver-  
 tito , an reipsâ certò , tutòque id scias ,  
 ex cujus certâ notione certam quæstionis  
 solutionem pendere retexisti : si sentias id  
 te certò scire , jam quæstio soluta illico  
 erit , sin verò minus , serio excogitato ,  
 an id , quo certè cognito certam quæstio-  
 nis solutionem haberes , pendeat necessa-  
 riò ab aliquo experimento , aut alieno  
 testimonio ; si constet ab experienciâ ,  
 aut ab alienâ fide pendere , consulto ex-  
 perientiam , aut alienum testimonium eâ  
 ratione , iisque cautionibus , quas conse-  
 quentibus legibus docebimus ; si verò  
 non appareat illud necessario jure vel ab  
 experienciâ , vel à testimonio pendere ,  
 tunc rursus à temetipso rogato , & omni  
 animi contentione cogitato , & inquirito  
 quidnam ergo aliud scire te oporteat , aut  
 sufficeret , ad hoc , ut id manifestò tibi  
 appareret , quo cognito statim per neces-  
 sariam consecutionem quæstionem solu-  
 tam foreprehendisti : hac ratione facilè  
 in te ipso retegēs , cur ignores , quod  
 quæris , & agnosces , quod si hoc , il-

illudve tibi constaret, pateret etiam id, ex  
cujus scientiâ quæstionis solutionem pen-  
dere vidisti; cognito autem, quod si  
hoc, illudve certò scires, pateret etiam  
id, quo cognito quæstio statim soluta  
foret, tunc seriò adnotato, an id reipsâ  
certò, tutòque tibi compertum sit; si  
sit certum, compertumque, jam per  
consequens constabit & id, ex cuius  
certâ notione, certa quæstionis solutio  
consequitur, atque adeo præcipua pro-  
posita quæstio soluta erit: si verò sen-  
tias illud certò tibi compertum minime  
esse, tunc eâdem methodo eo usque pro-  
gredere, quousque deveneris *ad aliquod  
prærequisitum* ad solutionem quæstionis,  
quod vel ex terminis pateat, notioque id-  
circo sit per sese evidens, ac tutissima,  
vel pateat è contra esse tibi cognitu im-  
possibile.

Si hâc viâ deveneris *ad aliquod prænos-  
cendum*, aut *prærequisitum* ad solvendam  
quæstionem, quod sit tibi cognitu im-  
possibile, jam patebit solvi à te quæstio-  
nem illam non posse, & cur non possit  
solvi.

Si verò *ad aliquod prærequisitum* deve-  
neris per sese patens, certum, tutumque  
jam

jam per necessarias consecutiones *cetera quoque praequisita* patebunt, atque adeo ipsamet praecipuae quaestionis enodatio.

Etenim si ad cognoscendum *A* quaesitum, & inveniendum, praerequiri sentio, ut cognoscam *B*, ad cognoscendum verò *B*, animadverto prænoscendum mihi esse *C*, ad cognoscendum verò *C*, indigere me agnosco cognitionis *D*; fac *D* mihi cognitum, perspectumque sit, jam per consequens mihi patebit *C*, quod à cognitione *D* pendet, cognito verò *C* per necessarium consequens mihi constabit *B*, quod à cognitione *C* pendere animadverteram; cognitoque *B* ipsummet quaesitum *A* luculentissimè mihi necessariò apparebit, cujus certam cognitionem à cognitione *B* certissimè consecuturam jam pridem manifestò deprehenderam.

Legis autem hujus excellens usus inde ostenditur, quia nimirum hac methodo *prænoscenda* ad quaesitam veritatem assequendam, quæ ab aliis cognitionibus deducenda est, venamur, primaque principia retegimus, à quibus cognitio rei quaesitæ profluit, & consequitur.

## §. IX.

Ad solvendas quæstiones tertii generis, in quibus quærat<sup>r</sup> verum aliquod primo fonti, rationi nempe pertinens, Lex hæc plurimum facit, & ad scopum sæpe perducit: *Si quæras an datum attributum dato subjecto conveniat nec ne, alterum alteri convenire supponito, & qua inde consequuntur attendito; alias ex aliis legitimis consecutionibus deducito, quousque ad quampiam deveneris, qua vel tutissimum, cognitumque verum contineat, vel falsum.* Si devenies ad consecutionem certe veram, ergo attributum propositæ quæstionis, ejusdem subjecto certissime convenit; sequi enim ex falso verum minime potest. Si autem ad consecutionem aliquam te perduxeris, cum tutissimo aliquo, cognitoque vero pugnantem; ergo propositæ quæstionis attributum ejusdem subjecto minime congruit. Si enim congrueret, nil falsi inde colligere per necessariam consecutionem posset, cum ex vero falsum consequi absurdum sit.

## §. X.



## §. X.

Decima Analytica Lex hæc est: *Dum in enodationem questionum incumbis, quæ priori pertinent fonti, & quarum idcirco solutio ab aliis præcognitis, ab aliis præconstitutis judiciis inferenda est; caveto diligentissimè primò ne ullam ex iis judiciis, enunciationibusve, ex quibus colligenda per consequens est questionis solutio, falsum sit, dubiumve, & pro vero, certoque ab aliquâ ex errorum causis illusum accipias; secundo ne per incuriam, dum ad solvendam questionem ratiocinaris, illationem ullam deducas, quæ non sit manifestissimo, & necessario vinculo adnexa cum iis judiciis, enunciationibusve, ex quibus aliquid inferis, accuratissimè animadvertito.*

Legis hujus maximi momenti necessitas, nedum utilitas, ex iis liquet, quæ disseruimus Rationalis Philosophiæ nostræ Parte primâ, ubi de Ratiocinationis naturâ, ex attributis egimus. Ex hujus Legis neglectu falsæ omnes, ac malè tutæ ratiocinationes oriuntur; falsæque idcirco, & malè tutæ earum questionum solutiones, quæ à ratiocinatione pendent.

Q 5

§. XI.

§. XI.

Quæ sequuntur Leges, quæstiones illas respiciunt, in quibus de aliorum hominum veris, genuinisque Ideis assequendis, verâque mente intelligendâ agitur; atque adeo iis quæstionibus consulunt, quæ enodari non possunt, nisi ex alieno testimonio.

Lex igitur undecima hæc monet: *Data quacumque enodandâ questione, siue primi, siue secundi, siue tertii generis sit, si constet ejus solutionem tertio fonti pertinere, proindeque ab alieno testimonio, dictisque alienis mutuandam esse, ne vocibus, & locutionibus illis male intelligas eorum mentem, quorum testimonium consulis, diligenter caveto.*

Legis hujus necessitas cuique per sese patet. Si enim mentem eorum non benè assequamur, quorum dictis, & testimonio data quædam quæstio solvenda est, utique eam non solvemus. Servari autem Lex hæc facta tecta minimè potest, nisi iis, quæ consequuntur, legibus, quasque hîc adjungimus, obtemperemus.

§. XII.

## §. XII.

Sit igitur Lex duodecima: Si qui aliquid asserit, negative, vocibus utatur dubiis, & equivoca potestatis, voces illas, locutionesve ex tuo usu, Ideisque tuis, ne temerè, & perperam intelligito; sed si qui eas adhibet, consuli potest, eum rogato, ut quid sibi velit explicet, & interrogationibus eo usque urgeo, quousque voces suas ita definierit, ut nulla supersit circa ejus mentem, sensumque obscuritas, nullum scrupulum.

Lex hæc nullâ indiget probatione: tantum opportunè hîc monemus perpauca esse vocabula, & locutiones, quæ aliquo obscuritatis, aut saltem ambiguitatis vitio non laborent.

## §. XIII.

Lex tertiadecima Ἀνάλυσις hæc est: Si is, cujus testimonio eges, cujusque mentem assequi tuâ interest, linguâ non tuâ utatur, & rogari, consuli que non possit, sed ex ejus tantum scriptis ejusdem mens tibi sit eruenda; caveo diligentissimè, ne  
citra

*citra accuratum examen voces, & locutiones, quas adhibet, eo sensu accipias, in quem tu met ipsas adhiberes, neque ex meris solis Lexicorum definitionibus eas temerè, & inconsultò interpreteris.*

Legis hujus necessitatem manifestò evincunt, quæ de vocibus fusè disseruimus Rationalis hujus Philosophiæ Parte primâ, Capite penultimo, & potissimum paragrapho finali, quæ omnia recolere lectorem non pigeat.

#### §. XIV.

Ad decimam quartam analyticam Legem gradum facimus. Hæc ita se habet. *Ad veram, genuinamque scriptorum intellectionem assequendam monita hæc servando te comparato: primò instituta, & consuetudines tum publicas, tum privatas, & opiniones tum ad religionem, & mores, tum ad res naturales spectantes ejus gentis, cujus scriptor est, & temporis, in quo vixit, diligenter addiscito. Secundo sectæ placita, & locutiones, si cui scriptor intelligendus favebat, aut si cui addictus erat, accuratè prenoscito.*

Ratio est, quia plurimæ scriptorum  
lo-

locutiones, & vocabula plurima absolutum sensum non continent, sed relativa sunt ad instituta, & consuetudines, & opiniones suarum gentium, & temporum; ad quas consuetudines, & opiniones planius, aut obscurius sæpe auctores alludunt: allusiones autem locutionibus contentas intelligi non possunt, nisi id præcognitum sit, ad quod alluditur.

Secundò, quia homines diversis sectis addicti, diversaque placita foventes iisdem vocibus, & locutionibus, Ideas invicem longè dispares, sententiasve planè discrepantes haud rarò exprimunt, ut laudato Paragrapho finali Capitis penultimi Partis primæ innuimus, pluribusque exemplis publicis prælectionibus nostris demonstravimus.

Tertiò, quia haud rarò, nisi aliunde nobis notæ sint scriptorum opiniones de iis rebus, quæ sub sensum non cadunt, quæque sententiarum multiplicitati sunt obnoxiae, scire non possumus an hic, illeve auctor locutiones quasdam, quibus huiusmodi res exprimuntur, in metaphoricò, & figurato sensu, an potius ad calcem litteræ intellexerit. Vide quæ in hanc rem diximus de locutionibus tropicis,

cis, & metaphoricis, in laudato Capite penultimo Partis primæ.

Cæterum ad scientiam morum, institutorum, consuetudinum, & opinionum exterarum, veterumque gentium tibi comparandam consulendi, & invicem conferendi sunt, qui de hisce omnium optimè scripserunt.

Ad Romanos quod attinet plura nobis tradidere Polybius, Dionysius Halicarnassæus, & Plutarcus. Justus Lipsius plura collegit lectu dignissima de Romanis antiquitatibus, præsertim de militiâ pedestri Romanorum: De navali scripsere Joannes Schefferus, & Marcus Melbonius. Octavius Ferrarius rem vestiariam eorundem illustravit. Franciscus Balduinus de indumentis pedum egit. Calliachus de ludis scænicis eruditè scripsit. Plurima verò paucis tradidit Petrus Josephus Cantellius in Romanâ Republicâ, qui omnium primus legendus est. Consulendum præterea tum ad Romanas, tum ad Græcas res, quod attinet, Samuelis Pitsci Lexicon eruditissimum, & Potteri Archeologia. Scientia autem Religionis Græcarum, & Romanarum Gentium petenda est potissimum ab Hesiodo in Theo-

goniâ, & Lib. Operum, & Dierum; ab Ovidii Metamorphosis; ab Apollodori *Lib. I*, & à Seldeni eruditissimo Opere de *Diis Syriis*.

Philosophicæ verò antiquæ opiniones tum ad res sacras, tum ad mores, tum ad res naturales, quod attinet, hauriendæ sunt à Diogene Laërtio de placitis Philosophorum, editionis Menagianæ; ab Historiâ philosophicâ clarissimi Starlei; ab Archeologiis philosophicis Thomæ Burnetii, aliisque id generis.

Recentiorum autem seu Christianorum tum orthodoxorum, tum heterodoxorum dogmata, instituta, sectæ, mores, discenda sunt ab Ecclesiasticâ Historiâ, cujus auctores omnium optimos non indigitamus, cum satis noti sint in amplissimo hoc Athenæo.

Ad recentiores philosophicas sectas quod tandem attinet, harum placita, systemata, & opiniones ab institutionibus philosophicis cujusvis sectæ, & scholæ, sunt addiscenda.

## §. XV.

Lex Ἀνάλυσεως decima quinta ita habet:

*Tem*

*Temporum, & locorum notitiam, si scriptores intelligere tuâ intersit, ne negligito.* Ratio hujus Legis hæc est, quia qui Chronologiam, & Geographiam ignorant, ab auctorum mente haud raro aberrant, aut non satis eorum sensum assequantur necesse est; plures enim in scriptoribus occurrunt locutiones, immò integræ periodi, aut narrationes integræ, quas nisi locorum situm, & tempora eventuum noverimus, aut non satis intelligimus, eut ab eorum mente deflectimus.

Præterea in rebus geographicis, & chronologicis, sæpe vel doctissimi cæteroque viri, at harum rerum parum periti peccant. Hinc periculum subest, ne ab ipsis decipiamur, & à vero aberremus, si harum disciplinarum expertes simus. Ita, *ex. gr.* ad geographicos errores quod attinet, Q. Curtius Caucasum montem, qui inter mare Caspium, & Pontum Euxinum est, apud Indos collocat, & duo illa maria confundit *Lib. VII. Cap. 4, & 5.* & Virgilius, Florus, Manilius, Lucanus Philippos urbem Tessaliæ, ubi J. Cæsar Pompejum vicit, cum Philippis Macedoniæ Urbe miscuerunt,  
ubi



ubi Marcus Antonius, & Julius Cæsar Octavianus Marcum Brutum, & Cajum Cassium profligarunt: ac ad errores chronologicos quod spectat, D. Ambrosius in *Lib. de Sacris*, qui perit, Platonem ab Hieremiâ Prophetâ Judaicæ Theologiæ, dum apud Ægyptios Plato ageret, imbutum fuisse ait, ut fidem facit D. Augustinus, qui idipsum falsò credidit. Verum hæc dicta sint obiter.

Chronologia, seu tempora præcipuorum temporum, & eventuum in historiâ gentium, & præstantissimorum virorum satis commodè disci possunt ab Historiâ antiquâ Christophori Cellarii, & parte primâ Rationarii temporum doctissimi Petavii, ne Lexica historica accuratiora memoremus, quæ suo non carent usu.

Ad notitiam verò locorum, sive geographiam addiscendam, uti quis poterit primò introductione ad Geographiam Sansonis Gallicè editâ, & Compendio geographico Philippi Cluverii: mox etiam addeunda est integra ejus Geographia cum notis Londinensibus, & notitiâ Orbis antiqui ad Constantini tempora à Christophoro Cellario editâ. Græciam omnium optimè descripsit Nicolaus Sophi-

R

nus;

258 RATIONALIS PHILOSOPHIÆ  
nus ; Italiam , Romanumque Imperium  
laudatus Philippus Cluverius. Utilia e-  
tiam sunt ad Geographiam veterem &  
recentiorem addiscendam Lexica Geogra-  
phica Caroli Stephani, Jacobi Hoffman-  
ni, & Philippi Ferrarii, cujus Lexicon  
ab Antonio Baudrando ingens incremen-  
tum sumpsit.

### §. XVI.

*Nisi passim à scriptorum mente aberrare  
velis, integrum auctorum contextum accu-  
ratissimè consulito.* Lex hæc Ἀνάλυσεως  
decima sexta, ex his verò, quæ genui-  
nam scriptorum intellectionem respiciunt  
quarta, maximi momenti est.

Etenim primò, locutionum plurimarum  
sensus ad mentem auctorum ope contex-  
tus assequitur, qui alioquin nos effugeret.

Secundò, peculiare auctores haud rarò  
usitatas voces in peculiari sensu accipiunt,  
ut Capite penultimo Partis primæ monui-  
mus, qui peculiare sensus, nonnisi à  
contextu, nempe ab his, quæ præce-  
dunt, & consequuntur, erui possunt.

Tertiò, ex contextu deprehenditur, an  
scriptor de iisdem rebus idem sentiat,  
fir-

firmus ne sit , an vacillet in opinionibus , an seriò loquatur quibusdam in locis , aut potius ironicè , an assentetur alicui , nec ne , an ex animo loquatur , aut dubium id sit , aliaque hujusmodi ; quæ quidem notiones ad verum scriptorum sensum intelligendum , genuinasque Ideas assequendas , necessariæ sunt.

Quartò , ex contextu haud rarò apparet , cujus gentis scriptor fuerit , cujus temporis , cujus sectæ , aliæque circumstantiæ ad auctorem pertinentes addiscuntur.

His verò cognitis , si aliunde nobis notæ sint consuetudines , & opiniones ejus gentis , & temporis , cujus scriptorem fuisse ope contextûs reteximus ; sique prænoverimus , quænam fuerint sententiæ , quique sermo ejus sectæ , cui scriptorem addictum fuisse ope contextûs collegimus , poterimus vocabulorum , & locutionum illarum sensum ad mentem auctoris constituere , quibus ad consuetudines , & opiniones suæ gentis , suorumque temporum adludit , notasque supponit , & ejus mentem assequemur , cum sectæ , & partium , quibus adhærebat , phrasés , & vocabula adhibet , cumque ex usu sectæ illius loquitur.

Possent & aliæ rationes addi ad suadendam latæ à nobis Legis utilitatem, aut potius necessitatem; at quæ attulimus satis eam demonstrant.

## §. XVII.

Decima septima Lex. *Ἀνάγνωσις* hæc est: *Si scriptor de re sensibus minimè obviâ, & cognitu minimè facili verba faciat, locutionibusque utatur obscuris, aut dubiis, & multiplicis significationis, nec ex contextu, aut alieno testimonio fide digno constet, quid de re illâ senserit, ad Pyrronicam epocham confugito, sententiamque de sensu scriptoris hisce in casibus cohibeto.*

Qui hanc Legem violant, temere de alienâ mente judicant: attamen interpretes passim eam violant.

## §. XVIII.

Servatis Legibus, quas de legitimâ, genuinâque scriptorum intellectu assequendâ tradidimus, primò pluries veram eorum mentem introspiciemus, quæ alioquin nos lateret. Secundò nunquam falsam, dubiamve interpretationem pro verâ,

râ, certâque amplectemur. Ad solvendas autem quæstiones, quæ nonnisi ex alieno tēstimonio enodari possunt, & quarum solutioni consulunt septem postremæ Leges à nobis latæ, non sufficit, ut eorum mens probè, rectèque intelligatur, quorum tēstimonio ad enodationem hujusmodi quæstionum egemus; sed requiritur præterea, ut sciamus fide ne digni sint, nec ne. Nam si fidem temerè, & perperam adhibeamus, aut negemus iis, ex quorum assertis propositionibus enodanda sit data quædam tertii ordinis quæstio, aut eam malè solvemus, verum putando, quod falsum est, aut casu tantum solvemus, non certâ ratione duce. Igitur jure, meritòque Lex hæc decima octava condita est: *ne perperam, & inconsultò ceteris fidem adhibeto, aut denegato.* Servari autem Lex hæc non potest, nisi & aliis, quas hîc atteximus, quæque sequuntur, obtemperemus.

## §. XIX.

Igitur decima nona Lex analytica, earum verò prima, quæ fidem nostram aliis

liis denegandam, aut adhibendam moderantur, & regunt, ita habet.

*Cum alicujus gentis, hominisve, aut sectæ placita, opiniones, rationes, resque gestas inquiris, vel cum hac noscere ad aliquam solvendam questionem tuâ intersit, ne perperam fidem habeto scriptori, qui genti illi, sectæve, aut homini infensus sit, cum aut minus honorifica, & probrosa, aut à ratione aliena, & absurda invise sectæ, gentive, aut homini tribuit.*

Etenim qui partibus studet, qui impartialis non est, qui odii, contemptûsve affectibus tenetur, iniquus judex habendus est, iniquus adversariorum extimator, inclementiùs quippe carpit, omnia in contrariam partem extorquet, alia occultat, alia malâ fide minuit, alia exaggerat.

Hisce vitiis, aliisque hujusmodi, nimis frequens eos laborare, qui de adversariorum, & hostium opinionibus, rationibus, rebusque gestis loquuntur, ii tantùm ignorant, qui Historicos partibus addictos, aut eristica scripta nunquam criticâ acu tetigerunt. Sacri, profanique scriptores nimia exempla hujus rei suppeditant, quæ doctis quibusque  
vi-

viris cognita sunt, & facile ab omnibus reperiri possunt.

## §. XX.

Vigesima Ἀνάλυσις Lex ita jubet : Si scriptor de opinionibus, institutis, moribus, rebusque gestis extranearum gentium loquatur, quas nonnisi ab illis discere poterat; nisi hic scriptor accuratissimus sit, nisi manifesta, tutaque monumenta praebeat diligentiae, curae, exactitudinis in rebus illis noscendis, quas narrat, & nisi omni careat male fidei suspicione, ne imprudens integram, plenamque fidem adhibeto.

Etenim extranearum gentium extraneâ linguâ utentium opiniones, mores, consuetudines, instituta, dicta, factaque certò discere nemo potest, nisi extranearum illarum gentium idiomata optimè calleat, & nisi plures, peritioresque, & candidiores ex illis gentibus adloquatur, consulat, examinet, & interrogationibus, dubiisve tandiu urgeat, quandiu opus sit ad res illas ex eorum ore perspicuè penitusque addiscendas : quæ sanè curæ multum laboris, & sagacitatis, multumque molestæ diligentiae expostu-

lant ; quas curas , quos labores , eos tandem impendisse putandum est , qui id manifestissimis , & indubliis indiciis ostendunt. Quod si non constet , cohibendum judicium est , nec temerè integra fides eis est adjungenda.

## §. XXI.

Si scriptorem opposita iis , quæ asserit , aut negat , impunè profiteri , & narrare non potuisse appareat , eum mendacii , & dissimulationis reum esse suspicari , nisi aliunde nil nisi verum protulisse ostendatur. Ratio hujus vigesimæ primæ analyticæ Legis est , quia pœnarum timor & incommodi nudam veri professionem , narrationemque cohibet.

Hinc historicus , *ex. gr.* qui sub tyrannide vivit , plura dissimulat , ne Tyrannum provocet ; quique pœnas , & incommoda metuit , si ea palam proferat , quæ sentit , ab ingenuâ veri professione sese deterret , & ita loquitur , & scribit , ut nil inde ei sit sibi metuendum.

## §. XXII. Scrip-



## §. XXII.

Scriptorem, qui ea scribendo, quæ scribit, commoda, & honores ei potentiori quopiam sibi polliceri poterat aut sperare, potentiori illi assentari saltem dubitato. Nam plus student sæpe homines præmiis, & commodis, quam veritati.

## §. XXIII.

Si quis scriptor affectu, & studio partium captus, manifestò appareat eum non exaggerare, quæ suis partibus favent, nec minuere quæ contra faciunt, ne putato, nisi oppositum manifestissimis rationibus ostendi possit. Ratio hujus vigesimæ tertiæ Legis hæc est, quia nimirum hic est mos, & indoles eorum, qui affectu quopiam tenentur; qui impartiales non sunt: hosce enim effectus pariunt animi affectiones, & pathemata, ut ex his colligere est, quæ Partē primâ Philosophiæ hujus, Capite ultimo adnotavimus.

tempore perituras, si homines Legi huic gravissimæ, tutissimæque obtemperarent.

§. XXV.

*Quod peritiores unanimi consensione de iis rebus pronunciant, quæ nonnisi experientiâ, & praxi addiscuntur, & de quibus sunt periti, certum, ratumque ducito, nisi obftet justa malæ fidei in peritos suspicio; quæ tamen suspicio rarò justa est.*

Ratio hujus Legis est, quia periti cum de iis rebus, quarum sunt periti, quæque merâ experientiâ, & praxi dignoscuntur, fidem faciunt, primò de iis rebus testantur, quas experti sunt, secundò non est (nisi rarissimè, & paucissimis in casibus), cur suspicemur eos hisce in rebus unâ omnes mentiri; sciunt enim eorum mendacium facilè aut ab aliis, aut reipsâ deprehendi posse, & pœnas mendacii, malæque fidei, & reprehensionem, & odium, & probra, & contemptum sibi ex mendacio imminere.

§. XXVI.

*Si quis ex mendacio, & mala fide, bona,*

*na, & commoda percipere potest, enim mala fidei esse & mentiri suspicari, fidemque tuam cohibeto, nisi tibi aliunde certissimis indiciis de ejus in loquendo candore, & morum honestate integerrimâ constet.*

*Lex hæc nulla indiget probatione, ejus enim æquitas per sese patet.*

## §. XXVII.

*Caveto diligentissimè ne præ affectu quopiam fidem adjungas, aut deneges; nimirum ne cuquam fidem adhibeto, quia id asserat, negetve, quod optas; nec assensum denegato, quia id asserat, negetve, quod nolles, quodque adversaris.*

Animi affectus, & pathémata inter cæteras mentis illusiones, cæterosque errores, hunc potissimum pariunt, ut assensum nostrum sollicitent, urgeant, rapiant, aut retradant, & avertant, non ratione quidem ita suadente, sed animi voluptate. Id satis explicavimus Philosophiæ hujus Parte primâ memorato Capite ultimo, quod adire non pigeat. At assensus animi præbendus, & cohibendus est, & denegandus merâ ratione suadente; neque enim quis ideo non deceptus est,

est , nec decipit , quia nobis arridet , placetque quod asserit ; nec quis ideo illus est , aut decipit , quia quæ asserit , negative , molesta nobis sunt , & ingrata , votisque nostris adversantur.

## §. XXVIII.

*Si quod quis asserit , negative observationibus , & experientia tua adversatur , aut consonum est , non ideo quod asserit , aut negat , falsum ducito , quia tuis observationibus , tuæque experientia adversatur , nec ideo verum putato , quia experientia tua consonum est ; nisi forè demonstrare possis manifestissimè non posse secus contingere.*

Si quis asserat , ex. gr. (quod Auctor Atlantis Sinici fecit) , apud Sinas , ne festucas quidem , & paleas quibusdam fluviis innatâre , aut mentitur , aut deceptus est ; non quia quod narrat ab experientiâ nostrâ dissonum est , sed quia demonstrare possumus ad mathematicam evidentiam usque , non posse paleas in aquis pluviis , proindeque in fluminibus demergi. At si quis nostrum fidem denegaret narranti mare aliquando gelu concrefcere in Norve-

vegiâ , quod sanè experientiæ nostræ ad-  
versatur , temerè , & perperam negaret fi-  
dem , quia etsi mare penes nos non con-  
crescat gelu , demonstrari tamen non po-  
test nuspiam in Globo terraqueo secus con-  
tingere , immò oppositum certissimum  
est.

Rursus si quis narranti crederet apud  
Siamenses quotannis ningere , & ideo cre-  
deret quia consona narraret experientiæ  
nostræ , cum penes nos quotannis nin-  
gat , malè , & perperam fidem adjunge-  
ret. Neque enim demonstrare possumus  
id ipsum contingere debere apud Siamen-  
ses , immo oppositum ostendi posset.

### §. XXIX.

*Cum quod plures asserunt , ab aliquo acce-  
perunt , ne eos pro totidem testibus accipi-  
to , nec ex eorum auctoritate judicato. Et  
ratio est , quia vel infiniti homines ut-  
ut per sese gravissimi , & fide dignissimi ,  
utut loquantur de rebus cognitu facilibus ,  
& sensibus obviis , pro nihilo habendi  
sunt , cum non ea testantur , quæ per  
sese agnoverunt , sed ab aliquo accepe-  
runt , & alicui crediderunt : etenim  
qui*

qui in alterius fidem aliquid asserunt , aut negant , ne hilum quidem addunt ponderis , & auctoritatis rei assertæ , & negatæ.

Hinc hisce in casibus superest tantum pondus originariorum testium , eorum videlicet , à quibus cæteri rem acceperunt ; proindeque eorum tantum expendendum est momentum , & auctoritas , atque ex eâ judicandum , non ex numero quantumvis ingenti eorum , qui in originarii alicujus testis loquuntur verbo.

### §. XXX.

*Si quis id asserat , quod solâ inspectione , solâ sensuum approximatione cognoscitur , sique omni malæ fidei suspitione careat , ei assensum præbet , eo magis si testes hujusmodi rerum originarii plures sint , quibus in casibus res asserta , aut negata ad moralem usque evidentiam assurgit , ut colligere est ex his , quæ Parte primâ adnotavimus , ubi de moralis evidentie naturâ , & characteribus verba fecimus , quæ adeunda sunt.*

### §. XXXI. Tri-

## §. XXXI.

Trigesima prima Lex Ἀνάλυσις, earum verò tertia & decima, quæ fidem nostram alieno testimonio, & auctoritati habendam, denegandamve moderantur, & regunt, ita habet: *Si cui scriptori fides jure, meritòque habenda sit, ne aliena fraude supposititia, spuria, & interpolata scripta, pro geminis, & intactis auctoris illius monumentis illius accipias.* Impositori enim incautam fidem adhiberes, dum auctori fide digno assentiri te putares.

Ut autem necessaria Lex hæc facilius servetur, addimus hîc canones aliquot de locis auctorum, & scriptis spuris, aut interpolatis à genuinis, & intactis dignoscendis.

## §. XXXII.

Vetustissima igitur, nec rara fraus, & scelus est, ut eruditi quique probè norunt, celeberrimum potissimum scriptorum operibus integras periodos audaci manu inferere, plura eorum loca datâ operâ immutare, integrosque libros iis supponere.

Ha-

Harum fraudum causas non hîc inquirimus, plures enim sunt; at res certum est. En autem quibus indiciis spuria hæc loca, & supposititia opera ab intactis, & legitimis dijudicantur.

### C A N O N I.

Si stylus dati operis satis discrepet à noto alicujus scriptoris stylo, opus illud ejus non est, etsi ejus nomen præ se ferat. Ita, *ex. gr.* inepta historia de excidio Trojæ, cui præfixa est epistola ad C. Sallustium Crispum, perperam, & falsò Cornelio Nepoti tribuitur, adeo enim infecta, & barbarâ latinitate lurida est, ut scriptore Romano Ciceroni contemporaneo, minimeque indocto, cujusmodi fanè erat Cornelius Nepos, prorsus indigna sit.

Plura exempla non addimus, at eruditi satis norunt quantæ impostorum, & falsariorum fraudes ope hujus Canonis feliciter resectæ sint.

### C A N O N II.

Si liber Veteris alicujus nomen præ se ferat,  
S rat,



rat, at in eo occurrant voces sequiori ævo invec̃tæ, & vetustioribus incognitæ, liber aut est alicujus recentioris, aut est interpolatus.

Ratio Canonis patet. Atque hâc de causâ, *ex. gr.* Galenus parem libri de naturâ hominis Hippocrati tributi, veluti supposititiâ criticâ censurâ inurit, quia nimirum in eâ parte vocabula occurrant à posterioribus Medicis invec̃ta veterem linguam ignorantibus.

Rursus ope hujus, & superioris Canonis plurimæ Epistolæ vetustissimis Romanæ Ecclesiæ Pontificibus tributæ, potissimum ante Siricii Papæ tempora, & in Corpus Juris Canonici insertæ, supposititiæ, & apocriphæ deprehensæ sunt à doctis viris, & politioris Criticæ peritis, inter quos Pagius, & Blondellus, aliique.

### C A N O N III.

Si liber inscitiâ refertus sit, viro, de cujus doctrinâ liquidò constat, referri non potest, nisi falsò; nec ineptiis, & ridiculis fabellis scatens, tribui jure potest scriptori, qui aliunde gravis, castigatique judicii ostenditur; quamvis in  
ve-

veteribus catalogis, & apud veteres id generis libri hujusmodi scriptorum nominibus insigniti appareant.

Ex vi hujus Canonis Servii Commentaria, *ex. gr.* esse interpolata agnoverunt viri eruditi; constat enim aliunde de Servii eruditione, & doctrinâ, & tamen Commentaria, quæ ejus nomen præferunt, infecta sunt huc illuc erroribus adeo crassis, ut in eos delabi non possit vir, cujusmodi est Servius.

Eâdem de causâ cum doctissimus Erasmus inter ea, quæ D. Hyeronimo tribuuntur scripta quædam reperisset, quovis Hyeronimi discipulo prorsus indigna, ea meritò veluti supposititia, aut saltem interpolata rejecit. Alia exempla innumera præmittimus, ne nimium longi simus.

#### CANON IV.

Opus, in quo narrantur res, vel personæ memorantur scriptore, cui tribuitur, recentiores, vel falsò tributum ei est, vel saltem ab alio interpolatum.

Canon hic nullâ indiget probatione, exemplum tantum afferemus. In Opere Dionysio Areopagitæ tributo; ea memo-

rantur, quasi jam fuisse, quæ post ejus tempora contigere: *ex gr.* inter alia plurima meminit Epistolæ D. Ignatii, quam paulo ante mortem scripsit. At Dionysius Apostolicis temporibus floruit. Ignatius verò sub Trajano Imperatore Martyr Christi occubuit, ut optime animadvertit sagacissimus Photius in Bibliothecâ, Codice primo. Hoc etiam indicio multos libros, qui veteribus tribuebantur, à recentioribus falsariis confictos fuisse, aut interpolatosprehenderunt viri docti decimi septimi potissimum sæculi, inter quos Cavæus, Joannes Albertus Fabricius in Bibliothecis græcâ & latinâ, aliique.

### C A N O N V.

Liber, in quo asseruntur, aut propugnantur sententiæ, quibus oppositas enixè tuetur is, cujus nomine liber inscribitur, aut supposititius est, aut interpolatus; siquidem sententiæ alicujus sint momenti, nec constet, scriptorem illum sententiam, quam ante tuebatur, aut cui inhærebat, correxisse, immutasse, damnasse.

Id, *ex. gr.* de Divo Augustino patet;  
nos

nos enim ipsemet hac de re docet suarum retractationum opere. Hippocrates errores quosdam honestissime professus est, ne posterius auctoritate suâ deciperentur. Cicero aliquos à se editos libros aliis postea scriptis diserte damnavit, aliique plures id factitarunt. At cum non apparet ex ipsiusmet scriptoris confessione, aut alieno testimonio fide dignissimo, ipsum, priorem sententiam suam deseruisse & in aliam concessisse; tunc si opus aliquod sub ejus nomine circumferatur, in quo sententias inveniamus discrepantes, alienasque prorsus ab iis, quas tuetur, quibusque adhæret in aliis operibus non dubiis, opus illud utique suspectum habendum est, vel interpolati, vel supposititii insimulandum.

### C A N O N VI.

Ob nudam auctoritatem recentiorum recensendum non est opus aliquod cujusdam esse veteris auctoris, si scriptores contemporanei, proximive, disertè id negent, aut in dubium revocent. Canon hic ex terminis, ut ajunt, patet.

## C A N O N VII.

Si Veteres veluti genuinum opus aliquod amplexi sint, non ideo tantum genuinum opus habendum est, si graves occurrant aliunde suspicandi rationes.

Exemplo esse possunt Sybillina scripta, quæ à veteribus Christianis amplexa libenter fuerunt, & mox à recentioribus meritò rejecta sunt, ob clara fraudis indicia à veteribus aut non affecuta, aut forte etiam dissimulata. Ita etiam nonnulla D. Clementis scripta pro genuinis à veteribus inconsultò habita, veluti apocripha, & supposititia à superioris sæculi criticis jure rejecta sunt. Verum hæc exempla sufficiant. Brevitati enim studendum nobis est.

## C A N O N VIII.

Afferta alicujus archetypi operis translatio, in qua agnominationes occurrant, quæ esse nequeunt in idiomate, ex quo facta putatur translatio, vel translatio non est, sed supposititium est opus, vel ad minimum interpolata est. *Ex. gr.* inter Origeniana extat opus, quod dicitur latini-  
ti-

tina versio Græci Operis Origenis; inter cætera, quæ in ea translatione occurrunt, quæque monstrant vel supposititiam esse, vel saltem interpolatam; hæc de D. Luciano Martyre habentur. *Ita consummatus est Beatus, atque gloriosus Lucianus, lucidus vitâ, lucidus & fide, lucidus etiam tolerantia consumatione; ob hoc enim Lucianus cognominatus est tanquam lucidus, aut proprio lumine sibi fulgens, aut aliis lucens: quæ agnominatio Luciani, lucidi, lucentis, proprio lumine fulgentis, &c. esse in Græcâ linguâ non potest, ut liquet iis, qui eam aliquatenus callent; proindeque commentitia hæc translatio aut supposititia omninò est, aut saltem interpolata. Quo quidem exemplo satis constat constituti Canonis ratio, & usus.*

## CAPUT. IV.

*De Synthetica Methodo, ejusque legibus.*

**V**eritas analytica methodo quæsitâ & inventa, Syntheticâ methodo aliis demonstratur. Est igitur Synthesis penes nos methodus doctrinæ tradendæ,  
S 4
feu

280 RATIONALIS PHILOSOPHIÆ  
seu veritatis quàm commodissimè fieri  
possit demonstrandæ.

Demonstrare autem est tam aptè ad sua-  
dendum ratiocinari, ut qui idioma, in  
quo loquimur, intelligunt, assensum de-  
negare ferid, & ex animo minimè possint  
ineluctabili evidentiâ coacti. Ut verò  
ineluctabilis hæc, & irresistibilis aliorum  
suasio obtineatur, quatuor hæc leges captu  
facillimæ sactæ, tectæque servantur ne-  
cesse est.

### §. I.

Prima Lex. *Συμπεριέως* ita habet: *Nullam  
vocem, locutionemve, que caliginosa, aut  
ambigua sit, vel esse posse suspiceris indefi-  
nitam adhibeto, sed determinatum sensum,  
precisamque significationem, in quam huius-  
modi voces, locutionesve accipere vis, lucu-  
lentissimè præconstituito.*

Ratio hujus Legis est, quia si inter ra-  
tiocinandum voces adhibeamus, aut lo-  
cutiones caliginosæ & obscuræ signifi-  
cationis, non intelligemur, atque adeo a-  
liorum assensum non evincemus; quod si  
æquivocis, & ambiguis vocabulis uta-  
mur, periculum est, ne in alio sensu ab  
aliis

aliis intelligantur, ac nos eas accipimus; proindeque ne vim ratiocinationum nostrarum sentiant.

Denifiniendæ igitur sunt ad demonstrandum, voces, & locutiones obscuræ, ambiguxque significationis. In definitionibus autem cavendum est ne alias voces caliginosi, & ambigui sensûs adhibeamus inexplicatas. Id enim esset obscurum, & æquivocum explicare per alium obscurum, & æquivocum. Voces autem quæ definitione indigent obscuritatis, aut æquivocationis causâ, longè plures sunt, ac vulgò homines putent, ut Parte primâ Philosophiæ hujus Rationalis ostendimus, ubi de Vocibus.

## §. II.

Secunda Synthetica Lex hæc est: *Prædefinitas semel voces, & locutiones in intensionibus ratiocinationibus in alium sensum per incuriam, ne tacitè usurpato.*

Ratio est, quia qui nos audiunt, aut scripta nostra legunt, voces intelligent in eo sensu, quem præconstituimus in eis definiendis. Hinc aberrabunt à mente nostrâ, nec quod volumus, assequentur, si



nos inter ratiocinandum voces semel definitas in alium sensum à præconstituto quomodocumque disparem clam, & tacitè accipiamus.

Hinc in intexendis ratiocinationibus eadem voces in eodem sensu adhibendæ erunt, vel si in alium sensum quomodocumque disparem, & varium à præconstituto adhibeatur, id disertè monendum est, ne æquivocatio ulla inde oriatur, neve alii a mente nostra declinent, poindeque ratiocinationum nostrarum vim non sentiant, atque adeo eorum assensus non evincatur. Pauci sunt, qui voces æquivocas, & obscuras definiant, pauciores qui in eis definiendis perspicuissimi sint, & nullas alias voces caliginosas, & ambiguas adhibeant, paucissimi, qui præconstitutis definitionibus firmissimè, constantissimèque inhæreant.

### §. III.

Tertia Synthetica Lex hæc jubet: *Nullam illationem deducito, quæ non sit necessario vinculo, & immediato adnexa cum iis propositionibus, ex quibus eam colligis.* Etenim si propositio illata, & veluti per  
con-

consequens deducta necessario vinculo cum eis adnexa non sit, ex quibus inferatur, suspecta sit, & dubia necesse est. Neque enim hisce in casibus luculentissime apparet eam ita adnexam esse cum præmissis propositionibus, ex quibus colligitur ut falsa esse nullo modo possit, quin falsæ sint etiam eæ omnes, ex quibus deducta est.

Idem contingit si propositio illata reipsa adnexa quidem sit cum præmissis propositionibus necessario vinculo, at non immediato; si enim non immediatè ex præmissis propositionibus profluat, dubium erit, an verè ex ipsis consequatur, nec ne, & probatione indigebit: atque adeò ad assensum hominum ineluctabilis evidentiae vi, consequendum, apta non erit. Patet ergo latæ à nobis Legis necessitas.

#### §. IV.

Ad Quartam denique *Συμπερίεως* Legem gradum faciamus: *Omnis propositio, ex qua aliquid per consequens colligendum, inferendumve est, vel simplicis intuitionis esto, vel ex aliis præmissis propositionibus simplicis*

*cis intuitionis per necessarium consequens ;  
atque evidentissimum deducta.*

Postremæ hujus Legis omnimoda necessitas ad demonstrationem conficiendam per sese liquet : nam si aliqua enunciatio ex iis, ex quibus aliquid inferendum sit, aut falsa sit, aut dubia, jam demonstratio prorsus corruat, necesse est ; at vel falsa, vel saltem dubia utique est propositio, nisi aut sit veritas simplicis intuitionis, nimirum axioma ; aut saltem sit propositio per necessarium evidentissimum consequens collecta, deductaque ex aliis propositionibus simplicis intuitionis, adeoque evidentissimis, probationeque nullâ indigentibus.

Violari ergo quarta Lex hæc à nobis lata minimè potest, quin vis omnis rationationis obtundatur prorsus ; atque adeo omnino necessaria est ad demonstrandum, videlicet ad aliorum assensum irresistibili evidentiæ actione evincendum.

Cæterum hæ Leges non modò suapte naturâ necessariæ sunt ad demonstrationem numeris omnibus absolutissimam conficiendam, sed solæ sufficiunt. Quoniam enim pacto manca, dubia, fallax, obscuraque esse possit ratiocinatio, in quâ voces

ces dubiæ , & æquivocæ potestatis , in certo, præciso, & nitidissimo sensu adhibentur, in qua nulla subesse potest æquivocatio, in qua omnis consecutio necessaria est, & immediato vinculo evidentissimè adnexa cum iis propositionibus, ex quibus infertur, in quâ tandem omnis propositio, ex quâ aliquid inferimus, vel est simplicis intuitionis, & ex naturâ axiomatum, vel est deducta per evidentissimum consequens ex aliis præconstitutis propositionibus simplicis intuitionis, & nullâ probatione indigentibus?

Sufficiunt igitur quatuor hæ positæ Le-  
ges ad absolutissimam, tutissimamque de-  
monstrationem intexendam; quod erat  
suadendum. Utinam autem quatuor hæ  
Leges nostræ, ubi id possit, sanctè, reli-  
giosèque ab hominibus servarentur.

## DIACRISIS

*In Artem Syllogisticam.*

**I**Nvaluerat per plura sæcula, & etiam-  
num hodie apud plures obtinet opinio,  
Syllogisticam Artem divinum propemo-  
dum inventum, præstantissimumque scien-  
tiarum organum, & instrumentum esse;  
quasi modi, ut ajunt, & figuræ Syl-  
logismorum magicâ quâpiam vi ita ve-  
ritatem allicerent, ita perstringerent, ut  
nec latitare, nec effugere mirificam can-  
tionem possit.

Verùm, bonâ pace eorum, qui ita  
opinantur, iis subscribendum apparet,  
qui artem Syllogisticam, nec ad inveni-  
endum verum factam, nec ad inventi de-  
monstrationem satis commodam jure, sanè,  
meritòque pronunciant. Et quidem pro-  
fectò, quid ad verum inveniendum con-  
ducit, in quod quis incumbat, scientia  
modorum, & figurarum jactatæ Artis?  
Quum sciveris cujusnam quantitatis, &  
qualitatis esse debeant Enunciationes duæ,  
ut inde tertia colligatur, quomodo scies

an duæ illæ, ex quibus tertia consequitur, veræ sint, nec ne? Certè non ex Syllogisticâ Arte, quæ tota est in docendo, quibus in casibus ex duabus præmissis tertia Enunciatio confectetur.

Fac ergo aliqua ex præmissis falsa sit, & pro verâ habeatur ob aliquam ex iis errandi occasionibus, quæ passim hominibus illudunt, quasque sanè Ars Syllogistica nec novit, nec ostendit; jam colliges consecutionem. Quid inde? Syllogismum conficies ad præscriptum Artis; attamen non nisi errorem collegeris. Sarcas tectas servare ergo potes Syllogisticæ Artis leges omnes, & falsum pro vero inferre. O præclarum igitur inventum ad quæsitum, latentisque veri consecutionem! O divinum scientiarum instrumentum, cujus ope facultates universæ mirificè profecerunt! Indices, quæso, si possis, quicumque inutilem illam Artem admiraris, quodnam verum alicujus momenti utiles disciplinæ, aut vitæ usus, Syllogisticæ Arti debeant.

Nullus mehercle sapientum hominum de Syllogisticâ Arte cogitavit unquam, dum in aliquam enodandam quæstionem incumberet, dum rationis humanæ the-  
sau-

sauro præclaris inventis ditaret, E contra quis in arte hâc peritior, quàm qui ineptissimus Sophista?

Viginti ferè sæcula imperium tenuit Syllogistica Ars, & quidem infaulto quopiam fato: nulla enim sæcula fuere tam barbara. Quandiu Syllogistæ disciplinas tractarunt, tandiu rudes fuerunt, indigestæque somniorum, errorum, ineptiarum moles. Utinam ergo nunquam extitisset Ars illa, nunquam enim in eâ callendâ reposita fuisset sapientiæ laus, nunquam tricosi, garruli, impudentes Sophistæ pro Philosophis habiti fuissent.

At, ajunt, esto Scientia figurarum, modorumque concludentium Syllogismorum ad latitans quodcumque verum retegendum inepta sit; esto Ars Syllogistica nulum contineat utile præceptum, quomodo quæsitum verum inveniat, ut animadvertit Cicero de Oratore; commodissima saltem methodus est ad resectum quodcumque verum demonstrandum, proindeque opportunissimum saltem est scientiarum vehiculum, & instrumentum, ad imperitos instruendos, evincendumque assensum.

Verùm, si alia methodus sit opportunior

nior Syllogisticâ, expeditior, luculentior; neque erit ergo Syllogistica Methodus doctrinæ tradendæ, evincendoque assensui accomodatissima. Atqui in compositis Ratiocinationibus, quoties nempe duarum idearum connexio, aut disjunctio, & discrepantia ex unicâ tantum Ideâ mediâ colligi nequit, usus longè commodior est, & luculentior.

In Sorite rectè constructo nulla Enunciatio est, quæ probatione indigeat, quia prima vel esse debet per sese apertissima, vel ex prædemonstratis manifesta, & quælibet subsequens Enunciatio Soriticam constituens ratiocinationem, simplicis esse debet intuitionis, ex terminis patens, nullâ indigens probatione.

Cum enim Sorite quis utitur ad demonstrandum, primò de subjecto ostendendæ Enunciationis asserit attributum aliquod, quod ei certissimè convenit, vel ex terminis, vel ex prædemonstratis, & de attributo illo asserit, quod ei per sese, & omninò ex terminis competit; mox de præcedentis Enunciationis attributo asserit pariter aliquid, quod ei adnexum est necessario, & immediato vinculo, sive ex terminis patente; atque eâdem progreditur



tur ratione, quousque ad aliquam Enunciationem deventum sit, cujus attributo conveniat manifestissimè, luculentissimè, & ex terminis ipsummet attributum ostendendæ Propositionis.

Quo facto, evidens statim, & apertissimum fit attributum ergo ostendendæ Propositionis, sive affirmativum sit, sive negativum, subjecto Enunciationis ejusdem reipsâ convenire. En Soriticæ demonstrationis exemplum. Ambitiosi sunt qui dignitates captant, ad ampliora contendunt semper, nunquam honoribus satiantur; qui ita animo affecti sunt, continuis premuntur curis, molestisque sollicitudinibus, quibus finis nullus, nisi cum vitâ; qui continuis premuntur curis, & agitationibus serenâ animi quiete, dulcique, & placidâ voluptate, tranquilloque vitæ genere frui non possunt; qui animi serenitate, & respondente votis voluptate innocuâ carent, miseram agunt vitam, etsi sani, & commodi. Ergo ambitiosi miseram agunt vitam, etsi sani, & commodi. In quâ Ratiocinatione idearum nativa connexio immediata ubique servatur, omnis Enunciatio simplicis intuitionis est, omne attributum subjecto  
suo

fuo immediato vinculo adnexum est: & consecutio sponte suâ à nitidissimâ illâ idearum connexâ serie profluit.

At fac adhibeas Syllogisticam methodum; jam cum Ratiocinatio illa composita sit, nec unicâ ideâ mediâ confici valeat, non poterit sanè unico Syllogismo concludi. Si ergo pluribus indiget Syllogismis, & eis utaris, jam nativa illa concinna, perbrevis, luculentissima idearum connexio, & series interturbetur, necesse est. Quocumque enim alio modo disponas componentes ideas allatæ, aut cujuscumque alterius Soriticæ Ratiocinationis, quàm illo qui à Sorite præscribitur, ordinem illum non turbare non potes, qui tamen nativus est, & idcirco optimus.

Potest quidem omnis Sorites in Syllogismos construi, at infelix opus esset, & à ratione alienum. Sensit id periculo suo Clavius, qui Geometrica elementa contortis Syllogismis constanter demonstrare aggressus fuit, at eum pænituit incommodæ cogitationis, inconsultique laboris. Citò ab Instituto deflexit, ad Soriticam methodum conversus, inter Geometras ratiocinatores maximos usitatissimam.

Insistunt tamen. Sorites inexpertorum mentes fatigat nimis, efficitque, ut Ratiocinationis vim non sentiant. At nonne magis mentes fatigabit Syllogismorum series ad idem demonstrandum, quod Sorite confici posset?

Præterea hæc una cautio sufficiet, ne nimirum, in longum nimis protrahatur E-nunciationum Soritica series, sed post quintas quasque, aut sextas Soriticas propositiones intermediæ consecutiones inferantur, quæ mentis contentionem ex intervallo relaxent.

Uterius, si quatuor absolutissimæ Demonstrationis leges Syntheticae methodi constanter servantur, quibus utcumque violatis vel ex integro, vel ex parte, nulla consistere Demonstratio potest, quasque jam exposuimus postremo Capite, nonne intentum quisque habebit? Nonne erit Demonstrationum constructor numeris omnibus absolutissimus? Nonne conficiet, si placeat, quotquot velit, Syllogismos, & quamcumque Syllogismorum seriem, quin unquam à Demonstratione aberrer, & quin noverit uspiam tricosam Syllogisticam artem? Quid ergo ad rem operosa figurarum, & modorum doctrina?

na? Si Syntheticam ullam legem violes, in Paralogismum incidis necessario jure; si intactas serves, fallere, & falli non potes.

Habes ergo & necessariam, & adæquatissimam, & luculentissimam, & perbrevev demonstrandi rationem, assensumque evincendi eorum, qui cordati sunt, nec satis impudentes, ut negent, quod demonstratum est; quod sanè impudentissimorum hominum execrabile genus fuste, & fannis, non rationibus excipiendum. Non modo igitur vana, & inutilis est ad inveniendum latitans quodcumque verum, augendasque disciplinas Ars Syllogistica, sed nec commodior, nec opportunior, nec minus inutilis ad inventum quodcumque verum demonstrandum.

Attamen Patroni inutilis Artis instant adhuc: Si Syllogisticam ignores doctrinam, quomodo ab insidiis sophismatum cavebis? Tollas divinam hanc Artem, jam obsident undique Sophistæ verum, jam urgent, premunt, obruunt. Proh miseram Veritatis conditionem! Triste præstantissimarum disciplinarum fatum?

Nonne vides, inepte, vim solam memoratarum Syntheticarum Legum Sophisma-

tum quorumcumque præstigia ictu oculi solvere, vanosque Paralogismorum conatus evertere, ut nil sit Veritati mesuendum? Ad Syntheticas leges captiosam quamcumque ratiocinationem exige, ad trutinam illam, fallere nesciam, suspende; quicquid vitii erit in Ratiocinatione quamcumque, & circa quæcumque versante, latitare non poterit, ad oculum patebit luculentissimè. Et sane Sophistam coge, ut voces, quas adhibet in intexenda Ratiocinatione definiat omninò, & apertissimè, genuinumque sensum Enunciationum omnium constituat, palamque faciat sine fuko; jam assequeris quicquid in præmissis asserat; jam intelligis quicquid in consecutione complectitur; jam cum præmissis consecutionem ipsam confers; ergo si hæc illis adnexa est immediato, & necessario vinculo, vinculum illud non videre non potes. Si per sese non profluat à præmissis illis deducta consecutio, id ipsum statim itenes, jam sentis temerè illatam consecutionem. Non ergo decipieris usquam. Quamobrem Leges illæ eadem perbreves, tutissimæ, & nunquam impunè violandæ, Syntheticæ nimirum Leges, quibus omnis Demonstratio de-

be-

betur, à Sophismate quovis mentem, verumque certissimè tuentur.

Quid igitur obtrudis adhuc scientiam modorum, & Figurarum? Quid despicias, qui eam jure despiciunt, & quasi aras violassent, & in disciplinarum perniciem nati essent, clamas, objurgas, crimini vertis?

Cæterum Syllogisticam Artem (ut moris est), non exponimus, quia ubique prostat in quocumque vulgaris, & ineptioris Logicæ Syntagmate.

*Exemplar hoc Autographum esto, cætera pro spuriiis habeto. In quorum fidem ego met Auctor nomen meum adscripsi.*

JANUS GUALBERTUS DE SORIA.

F I N I S.





## MENDÆ TYPOGRAPHICÆ.

Ad Auctoris monitum, &amp; Operis delineationem.

## ERRATA CORRIGE.

Pag. 7. lin. 12. peritioribus. penitioribus

Ad Caput primum.

Pag. 10. lin. 5. &amp; constitux. &amp; constituta

Pag. 11. lin. 19. deprehensa juncta. depre-

hensa sunt juncta

Ad Caput tertium.

Pag. 31. lin. 21. discrepationes. disceptationes

Pag. 35. lin. 1. passim occasione sunt. erran-

di passim occasione sunt.

Pag. 39. lin. 12. aut haud ægè. ut haud ægrè

Pag. 40. lin. 6. color voluptas. dolor voluptas

Ad Caput quintum.

Pag. 46. lin. 18. universale cum. universale est cū

Ad Caput sextum.

Pag. 57. lin. 13. adtributum convenire. adtri-

butum quod convenire.

Pag. 58. lin. 19. id possit? ea possit?

Pag. 62. lin. 23. sapientia est. sapientiæ est

Pag. 67. lin. postrema ut hujusmodi autem. ab

hujusmodi autem

Pag. 69. lin. 4. respiciunt. versantur

Ad Caput septimum.

Pag. 75. lin. 21. hypothetica hæc. hypothetica

est hæc.

Pag. 78. lin. 19. operâ suâ efficere. dele cir-

cumflexum ab opera sua

\* Pag. 80.



Pag. 80. lin. 25. a vero aberret. a vero aberremus

Pag. 82. lin. 1. alibi non profint. alibi raro profint

Pag. 87. lin. 18. id tantum ita. id tantum itaque

Ad Caput octavum.

Pag. 90. lin. 9. si motus B motui B sit æqualis. sit

motus B & hinc motui C sit æqualis

Pag. 90. lin. 19. mentis nostræ. dele punctum post

vocem nostræ, & prosequere

unico Contextu si cõster &c.

Pag. 93. lin. 10. objectis quibulibet. Post vocem

quibulibet adde punctum, & comam ut am-

binq̃itus sensus evanescat.

Pag. 94. lin. 10. cum ex falso consequatur. cum

ex falso non consequatur

Ad Caput nonum.

Pag. 96. lin. Capitis octava. quæ ratione. quæ

que ratione

Pag. 96. lin. postrema intercidit nulla. nulla

intercidit

Pag. 98. lin. postrema. etenim corpora. etenim

cum corpora

Pag. 99. lin. 23. et Et edmundus. ut clar, Ed

mandus

Pag. 103. lin. 21. per ipsa moventur. per ipsa

movemur

Pag. 105. lin. 7. cum utriusque. cūque utriusque

Pag. 106. lin. 4. non obfisterent. Post vocem

obfisterent, adde quæ ad calcem hujus Ta-

bule vides impressa

Pag. 106. lin. 15. superficie concluso? dele

punctum interrogationis

Pag. 107. lin. 7. gravitatis. gravitatis specificæ

Pag. 113. lin. 11. ad Ideis. ab Ideis

§. 2. De Criterio verisimilitudinis, quæ convenit propositionibus facti, deque majori, & minori que id generis Judiciorum probabilitate. pag. 81

CAP. VIII. De Ratiocinatione in genere.

Definitur, & explicatur Ratiocinationis natura. pag. 89

CAP. IX. De potissimis errorum causis, aut occasionibus.

Ipsasmet ideas nostras tum passivè receptas, tum a mente affirmatas præsentissimam esse errandi occasionem; ac primo Ideas per tactum acquisite decipere ad peculiariu corporum gravitatem quod attinet. pag. 96

§. 1. Tactum circa gravitatem ambientium fluidorum nos decipere. pag. 102

§. 2. Etiam ad resistentiam fluidorum quod attinet. pag. 103

§. 3. Ideas per tactum asperitatis, & levitatis corporum esse mendaces, tactumque nos decipere circa existentiam, & motum innumerabilium materiæ partium. pag. 108

§. 4. Ideas caloris, & frigoris errandi occasioni esse. pag. 109

§. 5. Ideas per olfactum, & gustum acquisite non esse externis rebus conformes. pag. 112

§. 6. Idem dicendum de Ideis sonituû. pag. 118

§. 7. Collocatio corporum per sonitum indicata fallax est. pag. 123

§. 8. Ideas per oculos acquisite partim prorsus falsas esse, partim falsi maxime suspectas quod primo ostenditur de Ideis quantitatû.

- five extensionū per oculos excitatis. pag. 124
- §. 9. Quæ insectilia oculis videntur extensa  
semper esse, & circa materialium partiū ex-  
istentiam oculos passim decipere. pag. 128
- §. 10. Oculos iniquos esse Judices æqualitatis,  
& inæqualitatis extensionum plurimis in ca-  
sibus. pag. 130
- §. 11. Ideæ figurarum per oculos falsæ sem-  
per. pag. 132
- §. 12. Ideæ circa motum per oculos mendaces  
passim. pag. 135
- §. 13. Verus gradus velocitatis per oculos non  
dijudicandus. pag. 140
- §. 14. Oculorum errores circa corporum si-  
tum. pag. 141
- §. 15. Ideas lucis, & colorum non esse rebus  
conformes. pag. 144
- §. 16. Infidæ, & falsæ Ideæ per sensus acquisite  
infidas, falsasque Ideas innumerarū relatio-  
nū inter objecta sensuū producant. pag. 150
- §. 17. Ideæ quoque non acquisite per sensus,  
sed a mente efformatæ plurimis erroribus  
occasioni sunt, quod primo de hypothesebus  
ostenditur, quæ totidem sunt Ideæ per com-  
positionem efformatæ. pag. 152
- §. 18. Idearum per abstractionem efformata-  
rum abusus, & potissimum Idearum abstra-  
ctarum causæ, & potentie. pag. 156
- §. 19. Reliquarum Idearum abstractarum abu-  
sus, & cautiones. pag. 164
- §. 20. Ipsamet privatio, & deficientia Idearū  
præcipua causa est errorum omnium, qua  
subla-

# I N D E X

## CAPITUM, ET PARAGRAPHORUM.

### CAP. I. de Ideis.

**Q**uid per totum opus Ideæ nomine intelligendum sit. pag. 1

§. 1. De Ideis substantiarum, Modorum, & Relationum. pag. 2.

§. 2. De Ideis simplicibus, & compositis. pag. 4

§. 3. De Ideis adequatis, & inadequatis. pag. 6

§. 4. De Ideis perspicuis, & obscuris. pag. 8

§. 5. De Ideis a mente efformatis, & receptis, seu de Ideis phantasticis, & realibus. pag. 16

§. 6. De Ideis singularibus, universalibus, & particularibus. pag. 12

### CAP. II. de Judiciis.

Quid sit judicare, deque Judiciis affirmativis, & negativis. pag. 21

CAP. III. de Judiciis nominalibus, Idealibus, & Realibus.

Quid Judicialia sint. pag. 26

§. 1. Divisio, & usus Judiciorum nominalium. pag. 28

§. 2. Adnotationes circa Judicialia idealia. pag. 33

§. 3. Divisio Judiciorum realium, & in ipsa adnotationes. pag. 36

CAP. IV. de Judiciis simplicibus, & compositis.

Quid sit Judicium simplex, quid & quodplex, compositum, & in ipsa Judicialia adnotationes. pag. 42

- §. 11. Lex Analyseos undecima earum vero prima, quæ iis quæstionibus consulunt, quarum enodatio haberi non potest nisi ex alieno testimonio. pag. 250
- §. 12. Lex duodecima, & earum secunda, quæ ad Quæstiones memoratas pertinet. pag. 251
- §. 13. Lex decimatertia Analyseos, & ex dicto genere tertia. pag. eadem.
- §. 14. Lex decimaquarta, memoratorum vero quarta. pag. 252
- §. 15. Decimaquinta Lex Analytica. pag. 256
- §. 16. Lex sexta, & decima. pag. 258
- §. 17. Lex decima septima. pag. 260
- §. 18. Lex decima octava. pag. 261
- §. 19. Lex decimanona, earum vero prima, quæ assensum hominibus adhibendum, aut denegandum moderantur. pag. 262
- §. 20. Lex Analyseos vigesima, & ex dicto genere secunda. pag. 263
- §. 21. Lex vigesima prima, ex eodem autem genere tertia. pag. 264
- §. 22. Lex vigesima secunda, & ejusdem generis quarta. pag. 265
- §. 23. Lex vigesima tertia Analyseos, dicti vero generis quinta. pag. eadem
- §. 24. Lex quarta, & vigesima, sexta vero ex dictis. pag. 266
- §. 25. Lex vigesima quinta, septima vero inter memoratas. pag. 267
- §. 26. Lex vigesima sexta memoratarum autem octava. pag. 268
- §. 27. Lex septima, & vigesima, ex dictis autem

tem

tem nona .	pag. eadem
§. 28. Lex vigesima octava , ex humanæ fidei moderatricibus decima .	pag. 269
§. 29. Lex vigesima nona , prædictarum vero undecima .	pag. 270
§. 30. Trigesima Analytica Lex , memoratarum undecima prima .	pag. 271
§. 31. Lex trigesima prima , ejusque necessitas .	pag. 272
§. 30. De necessitate constituendorum Canonum , quibus spuria , & interpolata auctorum monumenta a genuinis , & intactis discerni possint .	pag. eadem
Canon 1.	pag. 273
Canon 2.	pag. eadem
Canon 3.	pag. 274
Canon 4.	pag. 275
Canon 5.	pag. 276
Canon 6.	pag. 277
Canon 7.	pag. 278
Canon 8.	pag. eadem
<i>CAP. IV. de Synthetica Methodo . . . . .</i>	
Quid sit Synthesis .	pag. 279
§. 1. Prima Lex Syntheseos , ejusque ratio .	pag. 280
§. 2. Lex secunda Syntheseos , ejusque necessitas .	pag. 281
§. 3. Lex Syntheticarum tertia ejusque usus .	pag. 282
§. 8. Quarta Lex Syntheseos , ejusdemque absoluta necessitas .	pag. 283
Diacrisis in artem Syllogisticam .	pag. 286

sublata reliquæ inefficaces essent. pag. 166

CAP. X; de Vocibus.

A similitudine Vocabulorum arguendam non esse similitudinem Ideatum contra vulgare præjudicium, & primo sensationes per homologos sensus acquisitas, & iisdem vocibus a variis hominibus designatas non esse in omnibus plane similes, & fortasse in nullis esse pares. pag. 170

§. 1. Ideas substantiarum insensilium varias esse in variis, & si iisdem utantur vocabulis, & locutionibus ad eas significandas. pag. 173

§. 2. Idem dicendum de Ideis substantiarum sensilium. pag. 177

§. 3. Idem constituendum de Ideis modorum mixtorum, quamvis iisdem vocibus, aut pro synonymis vulgo habitis ab omnibus exprimentur. pag. 181

§. 4. Idem de Ideis & nominibus artefactorum verum esse. pag. 186

§. 5. Nullas voces tam æquivocas, nec ex propriis Ideis minus intelligendas in aliorum ore, & scriptis, quam vocabula relativa, quæ innumera sunt. pag. 191

§. 6. Sensum proprium, & figuratum loquentium, & Scriptorum non esse pluribus in casibus ex Ideis nostris, nostroque usu dijudicandum. pag. 196

§. 7. Decem monita, ut quisque facilius sibi caveat ab arguenda Idearum in omnibus similitudine ex similitudine locutionum, aut ex vocibus vulgo habitis pro æquipollentibus. pag. 201

*CAP. postremum de Animi adfectibus.*  
 Adfectus animi, & pathemata errorum fontes. pag. 205

*P A R S A L T E R A.*

*CAP. I. de Methodo Analytica.*

**Q**uid sit methodus analytica, quantique momenti. pag. 214

§. 1. Quænam sint potissima rerum genera humane menti inaccessibilia, quæque analysis relinquere debet intentata. pag. 215

*CAP. II. de Quæstionum generibus, & quæsitum notionum fontibus.*

Quid sit Quæstio, & ad quænam capita omnes necessario jure sint redigendæ. pag. 226

§. 1. Notionum inquirendarum fontes constituuntur. pag. 228

*CAP. III. de Analytica methodi legibus.* pag. 229

§. 1. Lex prima Analyseos, ejusque expositio, & usus. pag. 230

§. 2. Lex secunda traditur, & explicatur, ejusque usus ostenditur. pag. 232

§. 3. Lex tertia. ejusque necessitas. pag. 236

§. 4. Quarta Lex Analytica. pag. 237

§. 5. Lex V. ejusque necessitas. pag. 238

§. 6. Lex sexta, ejusque ratio. pag. 239

§. 7. Lex septima, ejusque ratio, & præstantia. pag. 239

§. 8. Octava lex, & ejus usus. pag. 244

§. 9. Nona Lex traditur, ejusque ratio. pag. 248

§. 10. Decima Lex, & ejus necessitas. pag. 249

§. 11.



Pag. 115. lin. 13. Ellephitim. Mephitim.

Pag. 117. lin. 16. odorum sensationibus. sapor-

um sensationibus

Pag. 124. lin. 13. extensionum, figurarum. post

vocem figurarum, adde motuum

Pag. 127. lin. 3. ad Annum. ad Annum 1696.

Pag. 131. lin. 3. longa sit ac. longa sit æque ac

Pag. 133. lin. penultima. superficies ex. gr.

superficies quæ videntur ex gra.

Pag. 138. lin. 23. Conficiant quæ inequalia. con-

ficiant spacia quæ inequalia

Pag. 144. lin. penult. non reflexis sed &c. post

reflexis dele punctum & junge contextum

Pag. 161. lin. 6. Ex Ideis illis. & Ideis illis.

Pag. 161. lin. 12. aliud Ideas abstractas. aliud

est Ideas abstractas

Pag. 167. lin. 3. spe verò. sæpè verò

Pag. 167. lin. 19. non esse adequatam & rudem

non esse inadequatam, & rudem

Ad Caput decimum.

Pag. 177. lin. 10. ea aut similia. eadem aut similia

Pag. 192. lin. 11. namque. namque

Pag. 203. lin. postrema intelligi non posse. eaque

intelligi non posse

Ad Caput primum Partis secundæ.

Pag. 218. lin. 22. nempe in iisdem. nempe quæ

ties non congruunt in iisdem

Pag. 219. lin. 13. adpellatur. appellantur.

Pag. 225. lin. 1. demonstrare poterit. demon-

strari poterit

Ad Caput tertium Partis secundæ.

Pag. 229. lin. 22. aptæ notiones. optatæ notiones

Pag. 248.

4  
Pag. 248. lin. 11. contineat vel falsum. adde post  
hoc vocem falsum, ex quorum alterutro ipsum  
audimur assumptum necessario confectetur.

Pag. 248. lin. 15. ex falso verum. ex vero falsum

Pag. 253. lin. 8. contentas. contentæ

Pag. 257. lin. 12. precipuorum temporum. precipuorum operum.

Pag. 263. lin. 13. fidem adhibeto. fidem ei  
adhibeto

Pag. 265. lin. 3. ei potentiori. a potentiori

Pag. 274. lin. 6. partem libri. partem libri

Pag. 277. lin. 10. recensendum non est. recensendum non est

Ad Diacrisim in artem Scholasticam.

Pag. 289. lin. 8. usus foritis usus

Ad Caput nonum Partis primæ pag. 106. lin. 4. post  
verba non obfisterent, adde: quæ hinc sequuntur:

Nisi enim particule fluidorum sensilium aliquatenus  
coererent, disparitas velocitatum memora-

torum corporum tantis dumtaxat esse deberet ex  
allegibus hydrostaticis, qualis consequtur a dis-

pari excessu gravitatis inequalis corporum illo-

rum supra gravitatem æqualis molis fluidi am-

bieptis, nimirum supra specificam ipsius gravi-

tatem, at discrepantia velocitatem in allatis ca-

sis major est, & indicatam legem excedit, ut  
experimenta evincunt; proindeque particule

fluidorum omnium sensilium, aliquatenus invi-

cem coereant necesse est; quamvis coesionem  
illam tactus non diiudicat.

A 1 1453900



